

**NATIONAL ASSEMBLY OF
SEYCHELLES**

Tuesday 27th February 2024

The Assembly met at 9am

National Anthem

Moment of Reflection

Mr Speaker in the Chair

MR SPEAKER

Bonzour tou Manm Onorab. Bonzour nou bann zofisye Lasanble. Bonzour nou piblik ki pe swiv nou. E byenveni pour nou travay pour sa lazournen.

E lo nou *Order Paper* nou annan repons lo mesaz Prezidan lo Leta Lanasyon. E pou konmanse, mon ava envit Onorab Sebastien Pillay *Leader* Lopozisyon pou prezant son repons. Onorab.

(APPLAUSE)

HON SEBASTIEN PILLAY

Mersi Mr Speaker. Bonzour Mr Speaker. Bonzour tou koleg Onorab e bonzour tou sa pep Seselwa ki pe ekout nou.

Mr Speaker, avan mon konmans mon prezantasyon lo repons diskour Leta Lanasyon ki Prezidan in fer, mon ti a kontan fer en pledwari avek ou *as a matter of privilege* ki ou

revwar sa *speech list* ki ou'n donn Lasanble. Dan lespri sa ki sa *speech* ki ou'n fer kot ou ti dir poudir sa lannen i en lannen petet ki nou ava fer keksoz diferaman.

Parey ou konnen lo sa *speech list*, apre ki dernyen Manm US pou koze, pou reste 5 Manm LDS ki pou koze. Nou pe demann ou pou anmenn en pe plis balans dan sa *speech list*, dan lespri sa diskour ki ou menm ou'n fer dan louvertir Lasanble semenn pase.

Nou pa ti *attend* sa diskour akouz nou pa krwar ki i annan lenparsyalite dan Lasanble Nasyon. Ozordi nou met boul dan ou kare pou nou vwar si vremen bann parol ki ou'n dir dan sa diskour, ou'n pare pou onor li. Mersi Mr Speaker.

Mr Speaker, ozordi i mark osi 5an depi lanmor ansyen Prezidan Rene e Per Fondater Parti US. E pour bokou bann siporter *United Seychelles* e en kantite Seselwa, zot rekonnent Mr Rene konmen enn bann pli gran dirizan ki nou pei in deza annan.

Avek sa antet Mr Speaker, mon *Caucus* nou remerci Mr Rene pour kontribisyon ki in fer. E nou rekonnent son kontribisyon dan devlopman e lepanouisman nou pei.

(APPLAUSE)

HON SEBASTIEN PILLAY

Mr Speaker, mon pran laparol ozordi akoz i annan en gran lekspektasyon la deor lo sa ki mon pou al dir ozordi bomaten.

Mon dir en gran lekspektasyon akoz pour premye fwa mon lofis in ganny sa kantite *call*, nou'n ganny sa kantite let. E nou'n osi resevwar sa kantite mesaz lo bann diferan size ki zot krwar zot santi nou devret adrese dan en larepons ki nou pou donn lo sa diskour ki Prezidan in fer.

Pou met an konteks sa ki nou pe fer ozordi bomaten Mr Speaker, semenn pase Zedi le 22 Fevriye, Mr Ramkalawan dan son kapasite konman Prezidan Larepublik nou pei, i ti delivre son katriyenm Diskour lo Leta nou Nasyon.

E swivan sa, mwan e mon lekip *United Seychelles* e mon parti an antye, nou'n al ver dimoun pou nou ekout zot reaksyon. Nou'n menm al dan distrik sa Sanmdi pou nou konpran en pti pe ki bann dimoun pe dir lo sa diskour ki Prezidan in fer.

Mr Speaker, i enportan pou etabli ki en Diskour lo Leta Lanasyon i sa lokasyon kot Prezidan pei, dan sa ka Mr Ramkalawan. I sipoze etal plan son Gouvernman, adres

bann size ki pe afekte nou nasyon. Prezant solisyon pour bann problem ki nou nasyon pe rankontre. E propoz bann *way forward*.

Si ou le, donn nou nasyon en sans direksyon lo kote li ek son Gouvernman i oule anmenn nou.

Alors kekyon fondamantal se, eski Prezidan Ramkalawan in kapab vremen etal Leta nou Nasyon e montre nou plan ki son Gouvernman i annan?

Mr Speaker, petet dimoun i ava krwar poudir mon pe zis kritike. Reaksyon lamazorite Seselwa i se ki malerezman, Mr Ramkalawan pa'n sezi sa loportinite.

Bokou i santi ki malgre ki sa msye in koz pour plis ki 2erdtan, i pa'n kapab koz lo letan nou nasyon e adres bann size ki pe preokip nou nasyon ozordi.

I annan dimoun ki'n demande si Prezidan ti'n menm prepar li pour sa diskour. Akoz i annan serten dimoun ki obzerv bann keksoz tre byen, in remarke ki Prezidan ti menm napa en lalis protokol devan Lasanble, e in bezwen pret sa enn ki ti avek ou Mr Speaker.

(APPLAUSE)

HON SEBASTIEN PILLAY

Eski sa se apel en Prezidan ki'n pare pour son diskour? Pa ankor ler pou zot konmans ankoler la. Espere.

Sa diskour i pli move ladres lo letan nou nasyon ki en Prezidan in deza fer devan nou Lasanble. Seselwa dan son gran mazorite i konvenki ki i annan en o nivo lenkonpetans a latet nou pei. E sa in anmenn li en linefikasite anvlope dan en kiltir koz mansonz pou sey anbet nou pep.

E legzanp i la devan nou pou ilistre sa. E sa enn i komik dan li menm. Ler Prezidan i tap son lestoman e dir in donn lord ki okenn pye dibwa pa pou ganny koupe Beau Vallon. In menm koz mirak dimoun ki'n konplent.

Dan nouvel sa menm swar, ki raportaz i montre nou? I montre nou ki mannyer plizyer pye dibwa in ganny koupe Beau Vallon. Sa i en lanbarasman.

(APPLAUSE)

HON SEBASTIEN PILLAY

E la nou konnen nou. Nou konnen ki parey son labitid, in demande ki sa *coverage* dan nouvel i ganny tire. Me tro tar, Seselwa in fini vwar sa. E bann *video* in konmans sirkile.

E ou konnen lekel ki'n sirkil bann *video*? Se bann

ansyen siporter fidel Prezidan Ramkalawan ki dezapwente avek li.

(APPLAUSE)

HON SEBASTIEN PILLAY

Me sa *Telenovela* pa fini la. Son landmen in al vizit Beau Vallon pou fer *damage control*. E kekfw mon krwar i panse ki li i ti kapab replant sa bann pye dibwa. Mr Speaker, sa pa konportman en Prezidan.

En lot legzanp enteresan ankor, se ler i dir avek Lasanble ki sityasyon manze zannimo in fini rezourd. Tou zafer in fini *ok*. Me lamazorite fermye ki mon'n kontakte i dir, zis avan *SONA* zot in ganny en mesaz ki'n dir zot lavant manze zannimo i *on hold!* Be zot, aret koz lalang avek sa pep!

(APPLAUSE)

HON SEBASTIEN PILLAY

E ler...

MR SPEAKER

Onorab! Onorab, mon pou fer en lapel avek ou. Ou bezwen evite apel Prezidan lalang, koz mansonz.

Si ou annan en diferan versyon keksoz, ou dir ou diferan versyon. Ou dir kot ou pa dakor. Me selman, i demann en pe respe dan sa Lasanble. Mersi.

HON SEBASTIEN PILLAY

Mersi Mr Speaker. Eski i laverite si nou dir ki manze zannimo in fini rezourd, kan manze zannimo in mont pli o? Eski i laverite si nou dir manze zannimo in fini rezourd, kan ou prop Gouvernman pa pe vann manze zannimo, e manze zannimo pe pouri dan *warehouse*?

(APPLAUSE)

HON SEBASTIEN PILLAY

Mon napa lot fason pou dir pour li konpran. Si mon koz ek li diplomatik, i pa le tande. So mon bezwen dir li dan en fason ki i konpran.

Mr Speaker, se sa problem nou pei. Nou annan a latet nou pei en dimoun ki demontre en lanvi patolojik pou *mislead* e pa dir nou pep laverite. Li e son Gouvernman i sitan enkonpetan e inefikas. E i annan en karakter kontrol tou keksoz. Les mwan ilistre sa.

Ler keksoz pa dan son faver, i maltrete e entimid bann ki'n oze kestonn li. Petet se sa rezon dan en *Cabinet Minis full house*, person pa'n oze dir li ki ti pe vremen pase Beau Vallon, oubyen avek bann fermye. Or i pa enterese. Li ki la. Lepep pou *vote* pour li e nenport kwa ki i

dir. Sa i apel larogans pouvwar dan tou son splander.

(APPLAUSE)

HON SEBASTIEN PILLAY

Mr Speaker, an 2020 Mr Ramkalawan ti dir ki Lepep Seselwa i en nasyon entelizan. E en Prezidan i bezwen konpran ki dan en diskour lo Leta nou Nasyon, ou pa zis vin dir nenport kwa.

I a fer plis ki 30an ki sa msye i anvi vin o pouvwar. In dir met li la e i a montre nou ki mannyer i kapab travay. Eski sanmenm sa ki apel travay?

Travay Mr Speaker, se ler ou a la oter konfyans ki pep in met dan ou. *United Seychelles* i konvenki ki nou, nou annan sa kapasite pou diriz Sesel dan en meyer fason e adres bann size pertinan.

(APPLAUSE)

HON SEBASTIEN PILLAY

En Prezidan *United Seychelles* dan sa letap ki nou pei pe pas ladan, pou asire ki i verifeye bann *statement* ki i fer devan nou nasyon. En Prezidan *United Seychelles* pou donn nou nasyon en vre sans direksyon!

(APPLAUSE)

HON SEBASTIEN PILLAY

Nou koz dan sa fason Mr Speaker, akoz se par respe ki nou annan pour sa pep. Nou pa la pou zis kritik Prezidan Ramkalawan. Nou konnen sa. O kontrè, nou osi la pou montre ki nou nasyon i devret fer konfyans *United Seychelles* pou form prosen Gouvernman.

(APPLAUSE)

HON SEBASTIEN PILLAY

E la, mon soumet avek sa Lasanble, ki dan nou repons SONA nou pou sistematikman montre atraver legzanp, nou pou montre nou nasyon ki manner Mr Ramkalawan pe *fail* pou elev nivo governans dan nou pei. I pe fer tro bokou promes ki i pa pe kapab garde.

La mon le dir, ki i inakseptab ki Mr Ramkalawan pa'n verifye bann *statement* ki in fer, prenan kont tou sa resours ki Leta i met a son dispozisyon.

I pa pe montre nou ki i pare pou oner bann parol ki i prononse. E i zis konplent, blanmen, *mislead* e sey fer nou krwar tou keksoz i *ok*. E ki li i pe fer en bon travay, e ki problem i avek tou lezot dimoun. Si i annan problem dan son Ladministrasyon, sa msye i devret get dan laglas.

Nou ti'n ava ekspekte ki apre 26 *meeting* piblik. Prenan kont tou sa problem ki nou

tou nou'n vwar bann dimoun souleve, Prezidan ti ava vin fer en lot diskour pli reel.

Malerezman, nou ti dir avek Lepep Seselwa zot bann pwen, zot bann konsern dan sa bann *meeting* pou fini lanmenm. Petet. Petet tou keksoz pou li i *ok*, akoz li. La mon pou dir. Sa ki pa kontan, pa kontan. Li i *travel First Class*. I manz *caviar* e i bwar sanpanny *on a regular basis*.

(APPLAUSE)

HON SEBASTIEN PILLAY

Be i la realite. Napa naryen pour zot ankoler. Li i ganny tou sa ki li i bezwen. Me pour lamazorite Seselwa, bann travayer *IOT* ki'n vir an ron akoz zot trezyenm mwan. Bann zenn *surveyor* kot *MLUH*.

Mr Speaker, bann *Fireman* ki pe rod en nouvo kondisyon travay. Bann *cleaners* ansyen *Cleaners'* Korperativ ki zot saler in ganny koupe.

Bann zabitan Cascade, Petit Paris, Parson Estate. Bann biznesmenn Providence. Annefe, pour lamazorite Seselwa Mr Speaker, tou keksoz pa *ok*.

(APPLAUSE)

HON SEBASTIEN PILLAY

Vre Leta nou Nasyon ozordi ki pri lavi pe pet plafon. Sekter biznes i lo pause. E bann fermye Mr Speaker. Bann fermye ki sipoze garanti sekirite alimanter nou pei, i fristre.

Seselwa in ariv en staz kot zot menm per pou al kot en dokter Gouvernman, akoz ziska dra napa. Larantre lekol, menm meb nou napa dan lekol. Depi kan nou ti tann sa dan nou pei?

Problenm *sewage*. Larzan kontra ki ganny peye tar. Nou'n menm ariv en staz kot sak fwa lapli i tonm en pe for, i annan dezans partou. E nou tou nou mars lanmen lo latet. *DRMD* anba Ladministrasyon Mr Ramkalawan in vin inefikas.

Nou sitan dan mal. Sitan dan mal, ki pou dil ek problenm delo monte Pointe Larue, trafik i bezwen ganny *divert* kote? Lo *runway*.

(APPLAUSE)

HON SEBASTIEN PILLAY

Depi kan dan sa pei ou'n vwar sa. Zanmen nou nasyon i deza *witness* sa kalite demagozi. Ki mannyer tou keksoz i kapab *ok*? Ozordi se sa realite nou pei, Mr Speaker. E sel dimoun ki pa vwar sa se Mr Ramkalawan. A sa pwen, mon konnen ou anbarase avek serten keksoz

ki mon pe dir, e ou angwase. I normal. Ou osi *Leader LDS*. Petet ou pa kontan mon kritik ou Prezidan.

Me, mon bezwen fer kler ek ou, mon pa pou kasyet deryer *political correctness*, ler en dimoun i vin dir ek Lasanble sitwayen, aret met Gouvernman Ankour.

(APPLAUSE)

HON SEBASTIEN PILLAY

I ti'n kapab swazir meyer fason pou li dir sa. Sa i montre en karakter diktater. I inakseptab Mr Speaker.

Par kont, li menm li Mr Ramkalawan, konbyen *case* in met Ankour kont Gouvernman? Konbyen fwa in ganny domaz ek Gouvernman? Ziska Onorab Loze in met Ankour.

(APPLAUSE)

HON SEBASTIEN PILLAY

Ki mannyer sa ki aplik pour li, pa kapab aplik pour lezot dimoun? Ozordi sa msye i oule kontrol tou keksoz. Li i ti proteste. I ti le Gappy *out* akoz Gappy ti ganny kontrole par Gouvernman. I ti le Onezime *out*, akoz Onezime ti ganny kontrole par Gouvernman.

Ozordi i kontrol *SBC*. I oule kontrol Lasanble Nasyonal. I oule kontrol Zidisyer. Vwala Leta nou

Nasyon. En Leta dirize par en dimoun ki oule kontrol tou keksoz e kasyet laverite kan i pa dan son faver. Kasyet laverite Mr Speaker.

La mon annan en *Press Release ARID*. En lorganizasyon ki napa naryen pou fer ek *US*. Ki admet ki sak fwa Gouvernman i fer en desizyon, en desizyon anbarasan, nek Gouvernman i kasyet laverite!

(APPLAUSE)

HON SEBASTIEN PILLAY

La, la. E i pa pou etonn mwan akoz *SBC* pa le pas *Press Release* ankor, akoz sa msye pa oule ganny kritik. Me nou dan sa Lasanble nou pou fer sir nou denons li a tou moman ki nou kapab.

(APPLAUSE)

HON SEBASTIEN PILLAY

Be nou, nou konnen nou. Sa bann *statement* ki Prezidan in fer i relye an gran parti avek leksplozyon *CCCL*. Kot i konnen tre byento bann zabitan e *businessman* Providence pou met li Ankour.

Lefe ki i pa'n oule fer en lanket piblik endepandan i kler. E la mon koz mon parol byen la. I kler pour bann ki konpran psikoloji Mr Ramkalawan, ki i annan en keksoz ki i oule kasyet!

(APPLAUSE)

HON SEBASTIEN PILLAY

Taler Mr Speaker, ou ti dir mwan aret dir pou dir Prezidan i koz lalang. So, mon pou bezwen met sa dan sa fason.

Prezidan dan son Diskour Leta Lanasyon i dir bann Konpanyen Lasirans in konmans pey bann dimoun. Wi i annan konpanyen ki'n konmans peye.

Be eski Prezidan i konnen poudir i annan 2 konpanyen ki pa pe pey bann dimoun akoz zot pe esper rezilta lanket? En lanket ki zis li ki konn rezilta.

Akoz i paret lanket in menm fini. Akoz nou'n demann *CCCL* pou vann son materyo, pou met disel dan boubou avek lekel? Bann zabitan Petite Paris, Parson e Cascade!

(APPLAUSE)

HON SEBASTIEN PILLAY

Eski sa bann materyo pa i sipoze lo en *crime scene*? Alors pa i sipoze levidans?

Mr Speaker, i annan trik dan zwe. I annan keksoz ki pe ganny kasyet. E la nou, *United Seychelles*, nou'n vizit plizyer lakour ki Lotorite in defini konman siporter Lopozisyon. E wi nou pou dir ek Prezidan,

in annan faver ki'n ganny fer dan donn led bann dimoun!

(APPLAUSE)

HON SEBASTIEN PILLAY

Siporster *US*, wi in ganny defavorize! Kontan pa kontan, nou pou dir.

Alors, ler i met devan Lasanble pou dir dimoun pa met Gouvernman Ankour, i oule ankour enn fwa entimid nou popilasyon.

E sa Mr Speaker, nou pou fer byen kler. Ki i drwa sitwayen pou rod rekour devan lazistis. E i fondamantal dan en sosyete demokratik. E nou *United Seychelles* nou pou defann lentere okenn Seselwa ki oule met Gouvernman Ankour, aköz sa i son drwa konstitisyonnèl.

(APPLAUSE)

HON SEBASTIEN PILLAY

Be nou konpran aköz Gouvernman *LDS* pa konpran ki savedir drwa konstitisyonnèl. Aköz ler i al siny Protokol *WHO* lo bann pandemik, i pa realize ki i pe al kont Lartik 28 nou Konstitisyon.

(APPLAUSE)

HON SEBASTIEN PILLAY

At least i ti a vin devan, i ti ava eksplike. Me nou pa'n tann naryen lo la Mr Speaker.

Mr Speaker, nou vwar sa malere. Nou vwar tou sa bann keksoz ki pe arive dan nou pei. Be eleksyon i annan bann konsekans.

Me, dapre Mr Ramkalawan e dapre ou menm Mr Speaker. Mannyer mon pe get ou reaksyon dan sez anler la, sa i paret alors ki nou pa oule linite. Nou ki pa oule linite.

Kestyon pour sa pep ki la deor se, eski Prezidan Ramkalawan li menm i annan Lotorite moral pou koz ek nou lo linite?

(APPLAUSE)

HON SEBASTIEN PILLAY

Si i annan en dimoun ki'n anmenn plis divizyon dan sa pei, se Mr Ramkalawan li menm.

(laughter)

HON SEBASTIEN PILLAY

In pas 30an kritike. Kritike, detri, demantibile aköz son laswaf pouvwar in fer ki in diviz nou pep e kontinyen diviz nou.

Li menm ozordi i pe pini dimoun aköz zot pa sipor li. Oubyen kritik son Gouvernman. I annan dimoun pa gannyen kontra. E zot, zot

fer li dan en fason *smart way*.
Sa i apel pinisyon *smart*.

Si petet i annan serten dimoun ki santi mon pe zis kritike *for the sake of* kritike, *lets judge him by his actions*. Akoz i pe pran en paz dan sa bann liv *judge him by his actions* la li.

Premyerman, Veronique Adeline i ganny arete e met dan kaso pour en pos lo *Facebook* ki'n swadizan fer *incitement*. Nou pas li lo televizyon pe ganny trennen dan kordgard, eksetera.

CID i fouy kot sa madanm ki reste North East Point. *CID* i tir sa madanm North East Point, i anmenn li anvil. Sa madanm i en manman. Devan son zanfan zot in fouy dan son lakour.

Pa fini la, zot tir sa madanm, zot anvoy li kote? Dan kaso Kordgard Takamaka!

(APPLAUSE)

HON SEBASTIEN PILLAY

Now, incitement i en krim serye sa dan nou pei. So mon ti ava ekspekte ki 2 semenn pli tar, Gouvernman i met en sarz kont Veronique.

Naryen pa'n mete kont Veronique. Ni en sarz napa kont li. Zot pa onte pran en manman, trenn li ziska Takamaka akoz sa ki in dir lo *Facebook*?

I annan 2 madanm ki ti travay *State House* plizyer lannen. Zot pa'n zanmen ganny problemm zot. Lo son lord, enn sa madanm ki ti'n al war Dokter Herminie i ganny met deor dan son travay. En manman 3 zanfan. Son rikord travay, *without* okenn problemm.

Ki mannyer ou ekspekte sa manman ek sa 3 zanfan ini avek ou? Ki mannyer ou ekspekte fanmir Veronique Adeline ini avek ou? Ki mannyer ou ekspekte zanfan Veronique Adeline ini avek ou?

Resaman nou'n vwar en biznessmenn prominan ganny mete dan kaso. Avek li, en lot dimoun, en ansyen siporter *LDS* ki'n sanz son – ki'n vir kote. Ki'n menm koz pour *United Seychelles*. Ou a dir nou poudir sa ou pe fer lanket? Sa se viktimizasyon politik. Sa se pa anmenn linite.

(APPLAUSE)

HON SEBASTIEN PILLAY

La, les mwan pran sa enn akoz sa enn i pli gou pour nou. Akoz nou nou'n ganny trete plizyer nou akoz sa.

Alors, Dokter Patrick Herminie, ki probableman kapab vin prosen Prezidan Sesel. Mon krwar i pou vin prosen Prezidan Sesel.

(APPLAUSE)

HON SEBASTIEN PILLAY

Sa boug i ganny akize pou fer koudeta atraver gri, gri kont Prezidan kont Prezidan Ramkalawan. Konmsi dan nou pei nou'n ariv en staz kot menm ziska gri, gri nou anmennen? *Ok.*

Vin fouy dan biro Mr Rene Maison Du Peuple. Zanmen i deza annan sa. Sa msye i en papa, i en Dokter. Son zanfan i en bann dimoun, zot in travay dan lasosyete. Nou detri son repitasyon.

Nou anmenn 59 sarz kont sa bann akize! 59 sarz. Ekout sa byen pep Seselwa. 59 sarz. Lo son lord sa. E li menm dan son konvansyon i dir poudir si in pey \$4mil. Li i konnen poudir Dokter Herminie in pey \$4mil.

Bann diplomat etranze ki'n zwenn mwan in dir pou dir Gouvernman in *brief* zot lo sa *case*. E aparaman ti annan lekor dan Maison Du Peuple tou. Zot ki ti pe dir sa. Gouvernman, ek bann diplomat etranze.

Selman ki nou vwar apre? Tou le 59 sarz i ganny *dropped*. Sa msye i ganny large. Son repitasyon in ganny afekte, zis akoz? En boug in oze debout ek ou e i pou *challenge* ou dan eleksyon prezidansyel. Ki mannyer nou kapab apel sa Mr Speaker?

MR SPEAKER

Onorab, ou pe fer bann alegasyon ki ou pa pe *substantiate*. I annan. I annan en diferans ou bezwen fer ant sa ki arive e zis pran li pou blanm Prezidan.

Koz lo size ki'n arive. Me selman fer sir ki bann alegasyon ki ou fer i pa al ver dimoun ki napa naryen pou fer ladan. Mersi.

HON SEBASTIEN PILLAY

Mersi Mr Speaker. Annou regard pli gro siny ki'n montre poudir nou napa linite dan nou pei. Ler Prezidan i fini son diskour, ou Speaker Lasanble e petet ou okouran, i kriy 'nou pa pou zanmen les tonbe'. En *battle cry* politik dan Lasanble zour SONA. *Unparliamentary*.

Zanmen in deza arive dan en SONA ki menm okenn Gouvernman. Menm US an mazorite, Parti Lepep, SPPF in deza kriye koumsa. Ki ou'n fer ou Mr Speaker, ou'n anpes li? Oubyen ou'n les li?

Ler zot koz nou lo linite la, get zot lekor dan laglas. Akoz se Mr Ramkalawan menm ki kontribye pou pa anmenn linite dan nou pei.

(APPLAUSE)

HON SEBASTIEN PILLAY

Sa Sanmdi pase Mr Speaker, mon ti Les Mamelles. E 2 zenn

garson aze 18an ti rakont mwan ki mannyer en tim ibou, zot apel sa ibou. Ti agres zot, koup zot sak, koup zot savat e pran zot larzan.

Ok, aret sa 2 marmay wi. Akfer ou bezwen koup zot sak? Akfer ou bezwen koup zot savat? E sa bann lensidan pe vin pli frekan dan nou pei.

E personn kot lapolis i paret pa konnen ki sa tim pe fer. Zot pe *harass*. E se sa ki Prezidan i dir nou poudir Seselwa pa le annan linite avek li. Se sa ki i pa oule Seselwa met li Ankour.

Be si ou pa oule Seselwa met ou, aret pran bann desizyon pou fer Seselwa met ou Ankour.

(APPLAUSE)

HON SEBASTIEN PILLAY

Mr Speaker, sitan sa msye in zwe avek fabrik moral nou pei, ziska nou paviyon atraver zot *LDS*, in vin en senbol divizyon dan nou pei.

Zanmen dan listwar mon pei mon ti ekspekte mon pou vwar mon paviyon dan en pye mang anpandan tou desire, desire. Lo en lakaz lisyen tou desire, desire.

E ki ou ekspekte bann zenerasyon fitir ler zot regard nou paviyon koumsa? Pour bann dimoun ki bann ansyen solda zot konn tre byen poudir

paviyon i ganny trete avek en respe.

Be bann zenn pa pou krwar poudir en paviyon i zis en naryen ditou? Eski sa i normal? Senbol nasyonal nou pei zot in arive vin en senbol divizyon. E ou a pe koz nou linite dan Lasanble Nasyonal dan Leta Lanasyon.

(APPLAUSE)

HON SEBASTIEN PILLAY

Koz lo size ki Seselwa i anvi koz lo la. Aret koz lo bann size ki pa fer sans Mr Speaker. Si nou nasyon pa ini, si napa linite. Parey mon'n dir, regard li dan laglas.

Mon bann frer ek ser, Leta nou Nasyon i pa enn ki nou devret pran a la lezer. E malerezman se sa ki nou Prezidan in fer. Devan nou in refize adres bann size serye ki pe enpakte lo nou. Akoz son *track record* abilite pou dil avek i *at best* medyok. Alors i plito konplent e blanm nou, konmsi nou ki lakoz tou sa ki pe al mal dan nou pei.

Legzanp pli kler devan nou se pri lavi, Mr Speaker. Mr Ramkalawan ti promet pou fer desann pri lavi. E son Minis Hassan in dir sa i zis en lenvansyon. En lot mo pour en lenvansyon set en mansonz.

Savedir, Minis Hassan pe dir Prezidan Ramkalawan ti koz en mansonz ler i dir pou

fer desann pri lavi. Mon pa konnen. Be annou rod laprev. Ou le mon donn ou laprev? Mon a donn ou laprev.

Le 20 Zilyet Mr Speaker, 2019, Mr Ramkalawan ti dir dan en *meeting* avek bann aktivis *LDS*, ki li i annan solisyon pou fer desann pri lavi baze lo en Mosyon ki Onorab Henrie ti'n anmenn dan Lasanble pou fer desann pri lavi par 30poursan.

Ozordi pri lavi in mont par lao 30poursan. Eski sa i apel mansonz, lot? Mon pa konnen kwa. Sa Prezidan in *fail* nou. En bwat dile in monte. En *kilo* ponmdeter in monte. En *kilo* zonnyon in monte. En pake dipen in monte.

Larealite Mr Speaker, i se ki Sesel in vin pli ser depi ler Mr Ramkalawan i o pouvwar. E bokou fanmir pe ganny afekte. Fanmir pe ganny difikilte.

Annou pran nou bann dimoun aze. Mr Speaker, nou bann dimoun aze ozordi avek sa sekirite sosyal ki zot gannyen, pa kapab viv. Ler mon tann *SBC* in dir mwan in fer 60milyon profi. Lo ledo lekel? Lo ledo malere.

Par egzanp.

(APPLAUSE)

HON SEBASTIEN PILLAY

En dimoun aze ozordi Mr Speaker, i ganny li R5000 ekek. Avek pri lavi mon konn en madanm ki reste Baie Lazare e in dir avek mwan koumsa poudir li i bezwen pey pirat *at least* R1200 tou le mwan. Akoz i bezwen al kot Dokter. Par lo la i annan serten latizann i pa pe gannyen kot *Pharmacy* i bezwen al pey kot *Pharmacy* Prive, ki i bezwen met R500 tou le mwan.

R1700. Vwala leta nou pei, kot en dimoun sa laz ki'n travay tou sa letan 70an pe depans sa larzan.

Me sa ki pli enteresan, vwala kot leta nou pei i dan mal. Laliny i sitan long kot *SOPD* ki ler sa madanm i vin son apwentman yer, i pe debout ziska dan semen dan lapli pou li ganny son apwentman. Ki mannyer nou kapab dir Leta nou Nasyon i *ok*?

(APPLAUSE)

HON SEBASTIEN PILLAY

Eski zot mars Sesel oubyen zot mars dan en lot landrwa? Mr Speaker, Prezidan i devret realize ki lamazorite Seselwa pe ganny difikilte pou fer 2 bout zwenn. E *while* mon lo sa size Mr Speaker, mon ti kontan note vwar ou pe fer en pti *milage* avek sa size

logmantasyon saler dan Legzekitiv, enteresan sa.

Ou koman Speaker ki'n koz lo la. Mon ti ava swete Mr Speaker, ki Prezidan i vin kler akoz si li i pe rod R200 mil. Me selman i pe donn en travayer 10 poursan. E ladan menm en travayer *IOT* ki sipoze ganny son 13eme mwan R1200 mil i ganny zis R400 mil, nou pei i dan problem Mr Speaker.

(APPLAUSE)

HON SEBASTIEN PILLAY

En Gouvernman responsab i bezwen zwe son rol pou reponn a bezwen nou pep.

E la nou, nou dir ki en Gouvernman *United Seychelles* an 2025 pou montre zot ki mannyer ou reponn a bezwen en pep. E nesese pou travay pou en pep.

(APPLAUSE)

HON SEBASTIEN PILLAY

I responsabilite Mr Ramkalawan pou fer son Gouvernman reponn e bezwen konsern nou pep. Akoz se li ki a latet nou pei. E se li ki devret fer bann travay ki nesese ganny fer.

Me Gouvernman Mr Ramkalawan, i pran en tandans ki ler i pran bann pozisyon parfwa kontrovers,

menm lo lasenn enternasyonal san enform nou, i ankoler.

In al rod lager ek *Houthi* dan *Red Sea*. I paret mwan poudir bann pouvwar deor pa respe nou, akoz zot zis met nou non ladan. E nou, nou pa konnen kwa ki pe pase.

Minis Lasante i pran en plezir pou li al siny en lagreman avek *WHO* san eksplik nou. Konmsi, eski Seselwa nou *matter* dan nou prop pei? Eski nou *matter*?

Me mon a montre zot ki mannyer nou pa *matter*. Lo sa proze *west coast* ki Gouvernman pe koz sitan lo la, Mr Speaker. Propriyeter *Cheval Blanc* li, i pa sipoze donn *wayleave* pou son later li. Semen in kontourn son later, be tou pti Kreol malere i bezwen donner *wayleave*.

E Minis Derjaques ki'n dir avek *SLTA* ki propriyeter *Cheval Blanc* pa pe donner *wayleave*. Sa i lenformasyon konkret ki nou annan Mr Speaker. Eski sa i apel travay pou Seselwa?

La an relasyon ek sa size *WHO*, *United Seychelles* i donn en *commitment* ki nou pou met presyon pou fer sir ki sa Minis i vin devan Lasanble pou li eksplik nou kwa ki annan lo sa Komisyon, lo sa protokol.

(APPLAUSE)

HON SEBASTIEN PILLAY

E si ou Mr Speaker, ou sey blok sa, dimoun ava vwar *whether or not* sa bann parol ki ou'n dir dan *opening* Lasanble *were words or just lip service*.

(APPLAUSE)

HON SEBASTIEN PILLAY

I rol Gouvernman pou defann lentere nou dimoun, e koz lo bann size ki pe afekte dimoun.

Mr Speaker, sa R500 ki zot met lo sa bann pti biznesmenn, pti antreprenner la. Me zot in kalkile ki lenpak pe annan lo sa bann pti dimoun? Gro biznesmenn i al *State House*, me sa bann pti dimoun napa landrwa pou ale.

US i donn langazman ki nou pou met presyon ankor lo sa size. E nou pou anmenn li dan Lasanble pou Minis eksplike, ki mannyer sa i kapab ganny redwir pou fasilite sa bann dimoun.

(APPLAUSE)

HON SEBASTIEN PILLAY

Leta nou Nasyon ozordi malerezman mon pep, i ki Seselwa ordiner napa menm drwa ki lezot dimoun. E ki malerezman Gouvernman in bliye pour ki rezon i la.

Ankor enn fwa i preski pa rol Gouvernman pou asire ki nou tret tou dimoun dan en fason ki responsab?

Akoz ki nou bezwen ankoler ek Michelle Murray si in fer en gran raportaz lo *SBC* lo lanmar o bot *Lotel Cheval Blanc*? E ki dan ou *speech* ou bezwen vin nonmen ki *Cheval Blanc* pa anvi reste o bor lanmar pouri? Ki sa eski ou, ou konsiltan *Cheval Blanc* ou?

(APPLAUSE)

HON SEBASTIEN PILLAY

Dan US nou pa dakor ek sa *statement* ki nou, nou pa kontan konpran ki rol Gouvernman. Se li ki pa konpran rol Gouvernman.

Me si dimoun i krwar poudir mon pe egzazere ozordi bomaten. Ki mannyer en Gouvernman ki'n anvi vin o pouvwar pou 30an, in apwent plizyer dimoun ki in dir i pli kalifye. I lev son *Cabinet* preski antye, son Legzekitiv preski antye i anmenn Abu Dhabi pou aprann *leadership*?

(APPLAUSE)

HON SEBASTIEN PILLAY

6 mwan dan zot manda zot ti al fer *retreat* pou al resarz batri *Silhouette*. Zot rapel sa enn? Ziska ozordi nou pa konnen konbyen in koute.

La, tou *PS* i bezwen al Abu Dhabi pou al aprann fer *leadership*. Be mon pe sey konpran, ler ou apwent en dimoun dan en rol sitan eleve.

I pa sipoze annan serten konpetans *management*?

La bann *graduate* ki pe ekout mwan, ki'n al *interview* ki ankor pe esper larepons sa *interview*. Ekout mwan byen la, se sa en pei ki nou pe viv ladan. E nou, nou krwar sel dimoun ki devret fer *training leadership* se Prezidan li menm, Mr Speaker.

(APPLAUSE)

HON SEBASTIEN PILLAY

Mon ti ava ekspekte zot in pare pou *lead*, me mon pa krwar zot in apre Mr Speaker.

Mr Speaker, en Gouvernman US pa pou bezwen al fer en *leadership training* pou konnen ki rol en Gouvernman. An 2025, en Gouvernman US pou asire ki ler i donn en *commitment* pou pey en 13eme mwan travayer *IOT* i pou fer li.

(APPLAUSE)

HON SEBASTIEN PILLAY

Ou pa kapab annan en manman ki annan 4 zanfan ki ti ganny R1200 mil, ki'n prepar li pou larantre lekol. E ou donn li zis 4000 mil e ou dir mwan *IOT* ki'n fer kalkilasyon. Be ou ki ou louvraz ou? Ou pa gete si sa kalkilasyon i normal par rapor a lazistis sosyal dan nou pei?

(APPLAUSE)

HON SEBASTIEN PILLAY

En Gouvernman US pa ti pou ferm *Cleaners Corporative*, e apre al tay deryer bann *cleaners* pou asire ki zot ganny zot lapey ki zot devret gannyen.

Mon ti dir sa devan Lasanble Mr Speaker, e Gouvernman pa'n ekoute. Me sa ki enteresan, Mrs Mohideen li menm ki *Chairman PSB* ki ti dir nou ki tou keksoz pou *ok*. Li osi in al fer *leadership training*.

(APPLAUSE)

HON SEBASTIEN PILLAY

Rol en Gouvernman se delivre pou son pep. I annan tro bokou lenterferans partou. E i annan tro bokou inefikasite ki pe fer nou vwar poudir Gouvernman i dan problem Mr Speaker. E la zot kasyet tou keksoz, akoz zot santi ki sak fwa dimoun i kritike i en lanbarasman pou zot.

La mon oule fer kler Mr Speaker. Mon oule fer kler, ki i annan en Lalwa ki zot, zot in pase an relasyon avek koripsyon. Sa Lalwa se ki bann *spouse* e bann zanfan bann politisyen deklar zot byen. An 2025, nou pou *repeal* sa Lalwa.

(APPLAUSE)

HON SEBASTIEN PILLAY

E tou fanm, piti, kouzen, tantin, kouzin la, nou a regarde ki i bezwen deklar zot byen, al deklar zot byen. Akoz si ozordi kot nou'n arive nou pe koz transparans, se sa laliny ki nou bezwen pran.

Larealite Mr Speaker, i se ki ozordi bokou dimoun i vremen dezapwente avek sa diskour ki Prezidan in fer. E mon krwar li menm i dezapwente avek son prop lekor. I napa ase lanfaz ki'n ganny mete lo par egzant ledikasyon e nou sistenm lasante. Nou dan US nou krwar ki en pep ki edike, an bonn sante i lakle pou sikse devlopman nou sosyete.

(APPLAUSE)

HON SEBASTIEN PILLAY

Ozordi nou sistenm ledikasyon pe gradyelman regrese. E toulezour lo *Facebook* ou vwar en lager antre bann zanfan.

Nivo *behaviour* in desann e performans dan bann lekol Segonder pa'n ogmante parey Minis Valentin ti promet nou. Eski i pou ganny *held accountable* par sa Lasanble pou sa bann promes ki in fer?

Sa ki pli enteresan i annan en o mankman *teachers*. E ziska ou vwar menm resours ki bann

teachers i bezwen, zot napa. Bokou *teachers* i demoralize, e mon konnen bokou *teachers* in apros mon bann koleg lo lot kote latab e demann avek zot pou ki Gouvernman i revwar son pozisyon lo *long service allowance*.

(APPLAUSE)

HON SEBASTIEN PILLAY

E mon donn en langazman tou *nurse*, tou *teachers*, tou *fireman*, tou dimoun ki travay dan Gouvernman ki US pou revwar sa *long service allowance*.

(APPLAUSE)

HON SEBASTIEN PILLAY

Nou pou *reward* zot pou zot lwayote, pou zot zefor, zot profesyonnalizm e zot devosyon dan zot louvraz. Se sa ki en Gouvernman i fer.

En ansennyan ki'n dan lansennyman pou plis ki 25an i dir mwan sa. I soke ler i tann Prezidan demann ek lepep pou tret bann ansennyan pli byen. Akoz i dir mwan "be lekel ki o pouvwar?" Eski se Prezidan oubyen se lepep?

Akoz Prezidan ki annan pouvwar pou asire ki tretman bann ansennyan i *improve*. Petet ki i devret fer, al retourn fer 26 *meeting* dan 26 lekol e i a konpran ki sityasyon bann ansennyan i ladan.

Mr Speaker, nou annan gro problem dan nou pei. Nou Sistèm Lasante Mr Speaker, in ariv en staz kot dimoun i per pou al kot dokter.

I enteresan Mr Speaker, mon pou dir ou sa akòz mwan mon konn en dimoun ki pros ek mwan resaman in ganny en blesir dan son lanmen. In al kot dokter, panse, apre sa son *wound* i sitan ganny *badly managed* ki in bezwen al kot en dokter prive. E pey plizyer R1000 pou ki i kapab ganny tretman pou ki son lanmen i kapab refer.

En madanm 70an i dir mwan poudir li i annan en latizann ki i pe espere. E sak fwa dokter i preskri lo *store* napa ase. Bann manman ki'n al lopital i dir mwan, menm dra napa lo lili pou mete lopital. E pli gou ankor Mr Speaker, konmsi mon vwar sa i bizar. Nou Prezidan i vin devan Lasanble e i pa donn nou direksyon ki'n arive avek sa nouvo lopital ki i ti promet nou ki sipoze pe al komanse. Naryen i pa dir nou lo la.

E *still* nou koman Lasanble nou pa pou *hold* li *accountable* pou sa ki i vin dir devan nou Lasanble. E la mon koz lo lapar bann dokter. Sa plan spesyalizasyon ki nou, nou ti'n met an plas ki prezan *LDS* in adopte dan plas se

innovate li, pe kre bokou fristrasyon parmi dokter.

E an zeneral dan Minister Lasante, moral i tre ba Mr Speaker. Akòz *leadership* pa pe konnekte avek bann dimoun ki pe travay.

Eski sa, pa ti ava en size ki ou devret mete dan ou diskour Leta Lanasyon?

(APPLAUSE)

HON SEBASTIEN PILLAY

Mr Speaker, sa kalite konversasyon ki nou pe fer i nesaser. Akòz fodre koman en nasyon nou pa per pou *hold* sa Gouvernman *accountable* lo tou proems ki in fer. La mon dir "in *fail TRNUC*" Prezidan Ramkalawan in *fail TRNUC*.

(APPLAUSE)

HON SEBASTIEN PILLAY

Zis parey in *fail* lo diversifikasyon ekonomik, akòz nou ankor pe esper lavanniy, nou ankor pe esper kannel. E la ki nou pe vwar, nou pe vwar tout sort demagozi kot nou pe met presyon lo bann biznes atraver diferan kalite *tax*. E Sekter Biznes pe soufer.

Mr Speaker, ler Prezidan i dir nou lekonomi in fer sirplis, ki mannyer i kapab fer en sirplis kan son prediksyon *tax* lannen pase ti ganny revize

pou desann. Pa i ti fer sa devan Lasanble?

Eski sa pa mansozner? Eski sirplis i baze lo bann proze ki pa ankor ganny fer? Annefe Mr Speaker, dan sa 4an ti devret annan 4 klinik Baie Lazare. Akoz tou le-z-an nou gannyen Klinik Baie Lazare ki pe fer.

La i tap nou avek en nouvo kart, e zot konnen kot in tir sa kart, sa kart pyer fondasyon la, zot konnen kot in tire sa? Dan sa liv la, la i tap nou avek en nouvo kart pyer fondasyon la.

Mr Speaker, nou'n la, nou konnen. Me lepep pa'n anvi nou kontinyen dan sa fason. Alors, akoz *LDS* pe ensiste pran menm *template* ki deza egziste san *innovate* li. Rezon i senp, i pa konnen kot nou pe ale.

E sel opsyon ki nou annan en Gouvernman *United Seychelles* o pouvwar 2025.

(APPLAUSE)

HON SEBASTIEN PILLAY

United Seychelles i mentenir ki Sekter Prive i moter lekonomi. E wi, nou pou admet, nou pou fer en *mea culpa*. Petet par lepase nou pa'n fer ase. Me nou'n realize kot nou'n al mal.

Par kont Gouvernman *LDS* pe fer egzaktaman sa ki nou, nou ti fer. *Only a fool* i fer

menm keksoz parey e i eksepte en rezilta diferan Mr Speaker.

Sa ki mon pe dir Mr Speaker, i enportan pou nou pei realize. E ki anba *leadership* Mr Ramkalawan, nou pei pe bite. Si Mr Faure pa ti'n komans 24, 24 mon demande kote Mr Ramkalawan ti pou kapab al koup riban?

Seselwa nou bezwen fer fas avek en realite penib. Lamazorite zot ki ti oule sanzman, me ozordi sanzman pe trangle nou tou. Nou tou pe ganny kwi lo pti dife. 2025 si nou pa ranvers sa sityasyon *either* nou pou vin en *mini Abu Dhabi*. Mon dir byen la, nou pou vin en *mini Abu Dhabi* oubyen nou por, nou *airport* e tou sa ki nou annan ki enportan pou'n ganny donnen.

Napa okenn dout, nou pei i dan bokou problem. Drog in anvair nou kominote, kriminalite in ogmante.

Oli sa lalis bann *dealers* ki Prezidan ti pe fer konversasyon avek?

(APPLAUSE)

HON SEBASTIEN PILLAY

Pa mwan ki ti dir, li ki ti dir. E ler i debout dan Lasanble pou dir bann parti politik siport son konbat kont drog, pa vin get nou ek karakter. Akoz si i annan en dimoun ki konn tou

bann *dealers*, get dan laglas i a konnen lekel.

Ozordi mon ti a kontan dir ki se Prezidan ki'n demantibil tou bann lazans ki'n lager kont drog. *Commence an* par NDEA ki in akize pou vol larzan lepep, ziska ozordi si bannla in vol larzan be anmenn zot Ankour.

(APPLAUSE)

HON SEBASTIEN PILLAY

Ziska ANB kot nou ti dir poudir sa bann larzan i koronpi, e nou'n pran sa bann zofisye *well train* e nou'n trenn zot partou dan labou e zet zot dan lanatir.

Se sa problemn ki nou ladan ozordi Mr Speaker. E si li ek Onorab Ferrari pa ti fer son problemn ek Dokter Herminie vin en problemn personnel pou tou Seselwa. Nou ti a'n fini annan nou 2 sant reabilitasyon dan sa pei ozordi.

(APPLAUSE)

HON SEBASTIEN PILLAY

Onorab Georges Mr Speaker, atraver ou i konn sa tre byen. I ti dan sa *meeting* avek mwan kot APDAR.

Mr Speaker, larepons pou nou bann problemn ozordi i annan en sel landrwa pou nou regarde kote i sorti.

Rezon det pou sa ki pe arive dan nou pei i annan en sel landrwa, e sa nou regard *on top of the hill, State House*.

Problenm se nou pei i annan en *poor leadership*. E akoz nou annan en *poor leadership*, nou pa pe kapab met an plas bann stratezi e bann plan ki ava fer nou anmenn nou pei pli devan.

Plizyer dimoun in demann mwan ki arive ek en *freedom fighter* ler i vin en *oppressor*? I enteresan sa. Akoz resaman dan SBC, kot SBC mon ti ganny en *meeting* ki ti dir mwan poudir bann *meeting* parti politik pou sorti 13 minit pou vin 6 minit. E ki bann *press release* i komans vin en problemn pou SBC pase.

There can be only one person ki kapab fer en *Board SBC* bouze pou fer sa. E sa se Prezidan Larepublik Mr Speaker. *The bucks stop with him*.

Mr Speaker, ler mon apros mon konklizyon, pa ou a note poudir ou'n aret mwan 2 fwa. Mon vwar poudir Prezidan in sey bat latet son bann siporter avek detrwa sanzman Konstitisyon. *Fix date for election*, mon vwar zot in bat lanmen.

Retir liminite pou fer bann Prezidan ki'n pase ki responsab pou zot aksyon. Me eski sa pou retroaktif? non.

Siporater *LDS* la deor, *SNP* pa pou retroaktif.

(APPLAUSE)

HON SEBASTIEN PILLAY

Ankor enn fwa i pe anbet zot. E ler i kriy “pa les tonbe” in fini les zot tonbe depi 2020 li.

Lazenes nou pei i kontinyen demann sa Gouvernman pou ed li. E ler Prezidan i koz lo inovasyon *SNYC*, dir li pa pran kredi pou travay lo dimoun. Akoz se en lot lorganizasyon pe fer sa louvraz ki pe rod larzan, pou fer sa travay Mr Speaker.

(APPLAUSE)

HON SEBASTIEN PILLAY

Minister Lafanmir. Minister Lafanmir ek Sport in sitan *fail* ki bann zwer *volleyball*, zwer *volleyball* in bezwen vin lo televizyon plere, konplent pou ganny sipor pou al *Indian Ocean Club Championship*?

Be sa i devret en *done deal*, akoz i en lenvestisman dan sport. En Gouvernman *US* zanmen ti pou fer *sportsman* ale vini koumsa.

(APPLAUSE)

HON SEBASTIEN PILLAY

Mr Speaker i enteresan. E ler i dir nou poudir son Gouvernman pa enterfer dan sport, mon annan *email* la ki

Minis Zialor ti ekrir. Oli sa *email*? Mon bezwen rod sa *email*. Wi, la i la sa *email*, ki Minis Zialor ti ekrir apropo Simon Backman kot i ti dir poudir apre diskisyon ek Prezidan, Simon Backman pa sipoze partisip dan sa konpetisyon. Mon dir be...

(APPLAUSE)

HON SEBASTIEN PILLAY

What is this Mr Speaker?

Nou, nou ti devret en nasyon bokou pli lwen. Me sa 4 lannen ki’n pase in met nou en bon pe retar. Nou’n gradyelman pe al ver diktatik kalkile. E Seselwa fodre nou ouver nou lizye. E le moman in arive pou nou pran en lot direksyon.

Nou pa kapab kontinyen avek en dirizan ki ou *best friend* zis ler ou ponp li. Me ler ou dezagree ek li, i pou fer tou pou detri ou. Menm anmenn diskord dan ou fanmir.

Sa mesaz i sorti kot enn zot ansyen siporater. Gran siporater, laprev i la e i en zanmi pou mwan. Sa in arive avek plizyer zot kolaborater pros. E ou konn li sa enn Mr Speaker, ou konn li tre byen.

Yer swar mon’n ganny enformen ki la Sesel pe nepli aksepte transfer sorti Larisi. Eski sa i korek? Be vin devan dir nou. Ki lenpak sa pou annan lo nou Lendistri

Tourism, akoz lamazorite tourist ki nou ti pe gannyen i sorti *Russia*. Si wi, eski Gouvernman pa devret vin devan e eksplik nou? Ankor enn fwa, keksoz i ganny kasyet.

MR SPEAKER

45 minit Onorab. Konklir.

HON SEBASTIEN PILLAY

Mersi Mr Speaker. Mon pou konklir. Mon konnen i en problem ler mon koze, alors mon ava arete.

I annan en sel opsyon devan nou. I annan en sel parti ki kapab retir sa Gouvernman e son Prezidan ki'n fini dekonekte avek bezwen son pep.

Ki ou sa *fireman* ki'n vin vwar mwan, sa bann travayer dan *MLUH*, ki sa bann *nurse*, dokter, *teachers*. Bann travayer *IOT*, ki'n dir poudir zot pou al dan semen, bann *cleaners* ki'n dir zot pou al dan semen. Mon annan en sel opsyon, i annan en sel opsyon pou remet lazwa *de vivre* dan nou zanfan, dan nou fanmir, dan bann kominote.

I annan en sel opsyon pou Sesel reganny son dinyite lo lasenn enternasyonal. Pou nou aret ganny maltrete, akoz ou'n al rod lager ek *Houthi*. I annan en sel opsyon pou anmenn lazistis sosyal dan nou pei kot nou tou nou ava

egal. Pa serten msye ki annan kontak avek Prezidan i pas avan tou.

I annan en sel opsyon pou fer sa ki pli byen pou Sesel. *US!*

US CAUCUS

US Sesel!

HON SEBASTIEN PILLAY

Mersi Mr Speaker.

(APPLAUSE)

(Standing ovation by US Members)

MR SPEAKER

Mersi Onorab. Mon aprezan adonn laparol Onorab Bernard Georges, *Leader* Biznes Gouvernman dan Lasanble. Onorab.

HON BERNARD GEORGES

Mersi Mr Speaker. Bonzour Mr Speaker. Bonzour tou bann Manm Onorab dan nou Lasanble. Tou bann dimoun ki pe swiv nou dan lakour.

Mr Speaker, mon'n byen leve bomaten, mon'n vin Lasanble avek en leker ranpli avek lanmour ek lazwa. E napa okenn diskour par okenn dimoun ki pou anpes mwan ozordi, malgre tou sa ki'n ganny dir pou vin isi e koz avek Lepep Seselwa lo sa tenm "Linite" ki nou Prezidan in met

devan nou Zedi pase dan sa Lasanble.

(APPLAUSE)

HON BERNARD GEORGES

Zedi pase Prezidan Larepiblik Mr Speaker, in vin fer sa ki li menm li in apel son katriyenm diskour lo Leta nou Nasyon depi ki Lepep Seselwa in donn li sa manda pou diriz nou pei an Oktob 2020. E parey Prezidan in fer nou rapel, se Konstitisyon ki obliz Sef Deta o komansman lannen vin devan Lasanble e anmenn en mesaz pour son pep lo leta sa nasyon ki i dirize.

Lasanble Nasyonal i sa landrwa kot sa diskour i ganny fer, kot sa mesaz i ganny pase. Me se pa anver sa 30enn Manm Lasanble ouswa sa 50enn *staff* Lasanble, ouswa sa bann envite ki ti dan Galeri ki mesaz Prezidan i diriz avek.

En mesaz lo Leta nou Nasyon, se en mesaz pour tou nou nasyon, tou nou sitwayen isi e aletranze pou tou dimoun ki en fyer Seselwa, pou sakenn parmi nou sa pep larkansyel ki annan loner ek lasans viv a sa moman dan sa pei anba sa Ladministrasyon.

Prezidan ti pe adres ou Mr Speaker, parey i bezwen. Me, son parol e son mesaz ti depas sa *Chamber*, e ti repann atraver nou pei e al rezwenn

tou Seselwa dan 4 kwen lemonn.

Mesaz lo Leta nou Nasyon se en kontrandi sa ki nou'n akonplir dan sa dernyen lannen. Bann defi ki nou pei i bezwen fer fas avek, e en regar lo lannen ki pe vini.

Dan son fason karakteristik Prezidan Ramkalawan in ranpli son latas avek konpasyon, konpetans e dinamizm. Dan en diskour ki'n dir pou lerdan edmi, nou'n vwar en zonm ki annan tou bann fe lo son bout ledwa. Ki pa'n bezwen lir en diskour ki ti'n ganny prepare pou li. Me ki in koz kler sa ki lo son leker avek fransiz, ki pa'n kasyet naryen avek son pep.

Kot i annan defi in dir, kot i bezwen amelyore in aksepte. Kot i mal in *warning* nou. Kot ti fodre koz ek *solennité* in fer li. Kot in merit felisite, in felisite. Kot ti bezwen ouver lebra in ouver. Kot ti bezwen aksepte ki direksyon i bezwen sanze, in aksepte. Kot ti bezwen enterfer pou trouv solisyon in enterfer.

Kot nou bezwen annan lespwar, in enspir nou, bref. Sa ki'n nou'n annan lokazyon pou eksperyanse Zedi pase sete en zonm o some son konpetans. En zonm dinamik, en zonm ki annan lenerzi pou diriz nou pei. En zonm ki annan son ledwa lo pou nou

nasyon. En ledwa lo tou size ki merit ganny aborde lo tou laspe en Ladministrasyon.

(APPLAUSE)

HON BERNARD GEORGES

Nou nasyon Mr Speaker, i merite *enjoy* sa moman dan nou listwar. Akoz sa bann moman pa ariv souvan. Nou pep i vremen beni ki nou viv dan pli zoli pei dan lemonn e ki nou annan en Sef Deta alaoter sa paradi ki Bondye in donn nou e ki Lepep Seselwa in swazir pou diriz son pei a sa moman.

(APPLAUSE)

HON BERNARD GEORGES

Tenm prensipal ki travers mesaz Prezidan lo Leta nou Nasyon se “Linite”. In etabli sa tenm byen boner dan son mesaz. E in annan rezon pou fer sa. Kwa bon Mr Speaker ki nou viv dan en zoli pei avek en nivo lavi pli o dan Lafrik, kot drwa sitwayen i ganny respekte e defann. Kot bann lenstitisyon i alaoter, kot sakenn i lib si nou pa annan linite dan en fanmir, dan en lakour dan en kominote, dan en pei. E wi, dan en Lasanble.

San annan linite parmi nou tou sa bann zoli keksoz napa okenn signifikan. E sakenn parmi nou, nou bezwen viv sa lespri linite dan

tou sa ki nou fer, dan tou aksyon ki nou pran, dan tou parol ki nou koze. A kwa bon Mr Speaker, ki ou kol en lapriyer lo laport ou lakaz, si ou pa viv parol ki dan sa lapriyer?

A kwa bon ki nou annan en zoli moto “Linite dan Diversite” lo *logo* nou Lasanble Nasyonal si nou promot diversite e inyor linite. Se sa refleksyon ki Prezidan i demann nou pou fer dan son mesaz. Gouvernman ek son pep i en sel. I pa 2 dimoun separe par lespas ek letan. Sa ki Gouvernman i fer, i fer pou sakenn son sitwayen. Sa ki sakenn son sitwayen i fer, i fer pou Gouvernman.

Akoz nou en sel alor, nou bezwen sakenn parmi nou pran nou responsabilite endividyel e kolektiv e aret depan lo Gouvernman pou fer tou keksoz. Prezidan in ankor enn fwa demann sakenn parmi nou pou met nou move konportman deryer e pou propaz en mesaz lespwar e pozitivite dan tou sa ki nou’n fer.

Si nou konpran e aksepte ki Gouvernman se nou menm, ki Gouvernman napa larzan pou depanse apar ki nou larzan. Ki sak sou ki nou gaspiye ou depanse mal apropro se nou larzan ki pe perdi. La nou ava kapab komans vwar ki sa

responsabilite ki Prezidan pe demann nou pran se pou nou prop benefis, pa pou benefis en lot lenstitisyon ki pa tous nou.

Se sa, sa lide ki Ladministrasyon e sa Prezidan pe met devan nou. Napa naryen ki pli fasil pou dir ki donn plis larzan parey en bann i fer. Ogmant lapey, fer desann laz pansyon. Fer monte saler minimonm, donn 13eme mwan.

Sa Mr Speaker, se bann parol fasil ki nou pou tann ankor e ki nou'n tande bomaten.

Mesaz Prezidan se annou azir avek lentelizans. Annou depans sa ki nou annan, annou vin responsab, annou ini koman en pep. Akoz se avek linite ek responsabilite ki nou pou avanse koman en nasyon. Pli vit ki nou kapab travay ansanm koman en pep dan en fason responsab, pli vit ki nou pou ariv la kot nou anvi arive. Kot tou fanmir i ava annan en lozman, kot tou saler i ava permet sak Seselwa viv byen. Kot tou servis pou alaoter, kot nou a kapab regard deryer e dir "wi, nou'n fer li".

Si mon kapab dekrir mesaz Prezidan lo Leta nou Nasyon, Mr Speaker, se dan sa fason swivan.

Nou pei i annan en demokrasi vibran avek en

lekonomi solid e en Gouvernman angaze. Sa se en reset pou reisit. *A recipe for success* parey Angle i dir. Ini koman en pep e avek en responsabilite endividyel e kolektif pou nou pei e pou nou menm, nou fitir i enn ki vreman solid.

Dan ou mesaz pou louvertir Lasanble pou sa lannen, Mr Speaker, ou'n fer nou rapel ki nou sistenm demokratik i annan a son baz plizyer parti politik. 2 sa bann parti i reprezante dan sa Lasanble.

Politik, enn son dezavantaz parey nou konnen, se ki i diviz dimoun. Sa ki siport en parti pa siport en lot e la divizyon i rantre. Me sa se en divizyon siperfisyel. I pa devret en divizyon fondamantal, me senpleman en divizyon lo fason administre en pei, lo bann Polisi e bann keksoz parey.

Nou kapab siport diferan tandans politik, pa dakor lo Polisi en Ladministrasyon, me *still* form parti en sel lepep. Se sa ki nou moto 'Linite dan Diversite' i oule promouvwar. Sesel in fer gran lepa pou ariv lo nivo demokrasi ki nou zouir ozordi.

Ou menm ou, Mr Speaker, ou konn sa *first hand*. Ler ou ti konmans fer politik, nou pei ti pe viv anba en sistenm parti inik kot ti

napa okenn drwa fondamantal dan Konstitisyon, kot ti napa okenn Lopoziyon, kot ti napa zournal lib, kot okenn kritik kont sa Gouvernman sa lepok ti amenn sa deskripsyon 'lennmi lepep'.

I alor en gran lazwa pou rekonnet ki, 30an pli tar, nou pei in kapab atenn en nivo demokrasi osi ouver ki nou zouir ozordi kot lennmi lepep yer in ariv Prezidan Sesel, Speaker Lasanble ek Minis Dezinyen.

(APPLAUSE)

HON BERNARD GEORGES

E kot sa ki Mr Rene ti kontan apel 'en pti parti' in ozordi pli gro mouvman politik dan nou pei avek en mazorite absolli dan Lasanble Nasyon.

(APPLAUSE)

HON BERNARD GEORGES

Mon dir sa, Mr Speaker, pa pou ponp nou lekor. Non. Mon dir sa pou souliny sa ki ou ek Prezidan ti fer resorti Zedi pase. Ki nou zouir en demokrasi ouver, alaoter, kot drwa tou sitwayen i ganny respekste. Menm drwa pou parti minoriter dan Lasanble met zot iniform rouz ek nwanr, pa asiste louvertir Lasanble, pa vin akey Sef Deta ler i arive, e apre vin asize trankilman

parey pti sren lo en difil elektrik.

(APPLAUSE)

HON BERNARD GEORGES

Nou viv Mr Speaker, dan en demokrasi vibran, gras a travay serten vizyoner pou realize ki se sel fason pou bouz devan. Kot sa 3 Brans Gouvernman i balans kanmarad e kot tou drwa i ganny respekste e siporte par Lakour Konstitisyonnel. Se sa demokrasi vibran ki permet mon koleg dan Lasanble *Leader* Lopoziyon reponn diskour Prezidan lo Leta nou Nasyon an premye.

Ki se li e pa mwan ki diskut avek ou Mr Speaker, lo lalis Lalwa ki vin devan Lasanble. E ki donn li sa prominans ki i merite menm si i pa pran dan en sistenm ouver e dan en sistenm lib.

(APPLAUSE)

HON BERNARD GEORGES

Me parey. Me malgre ki nou annan en demokrasi solid, tou i kapab baskile en sel kou.

Prezidan Obama in byen dir, ler in dir avek zournalis CNN, Christianne Amanpour ki demokrasi pou sirviv si nou lager pou anpes li mor. Nou pei i bezwen *l'eau qui vive* pou sofgard nou demokrasi a tou moman. Medya sosyal e

parfwa menm medya ofisyel i vitman kapab detourn en laverite e fer *fake news* pran menm lanplè ki laverite.

Tout an respektan nou laliberte ki nou'n lite pou gannnen, nou bezwen osi asire ki a tou moman ki se laverite ki triyonfe lo mansonz, e pozitivite ki pran kontrol lo negativite.

(APPLAUSE)

HON BERNARD GEORGES

Mon kontan alor ki ou'n pran loportinite dan ou ladres louvertir Lasanble Mr Speaker, pou ofer 2 propozisyon pou ranforsi e amelyor nou demokrasi lo kote Parlman. Ou'n sizer en logmantasyon lo kantite manm proporsyonnel pou deservi nou Lasanble. E ou'n osi retourn lo sa size lotonomi finansyel e administratif pou sa Brans Gouvernman. Lo sa kote latab nou sipòrt sa 2 propozisyon, Mr Speaker.

(APPLAUSE)

HON BERNARD GEORGES

Tou le de i annan merit e nou pa devret. Nou napa drwa les zot zis lo nivo parol. Dan en lot bor, Prezidan in dekrir plizyer mezir ki i pou anmenn devan Lasanble pou nou debat lo la an sa ki konsern 11enm lamannman Konstitisyon. Sa

parey in ganny dir bomaten, i annan pour bi asire ki en Prezidan pa kapab fer eleksyon ler i anvi pou fer faver pou son Vis-Prezidan. Me i bezwen respekte sa manda 5an ki en pep in donn li.

Sa iminite prezidansyel ki egziste e ki Onorab Flory Larue ti esey agrandi pou sorti 3an pou vin 5an, me ki lo lot kote ti bloke. Nou ti napa mazorite 2 tyer e nou ti ankor dan lepok pas baton a sa moman.

Sa pou prezan disparet konpletman. E Konstitisyon Mr Speaker, i en zouti vivan. E i responsabilite tou Ladministrasyon pou demann avek Lasanble pou *fine tune* li tanzantan pou ki i reponn a legzistans en pep a en moman donnen.

Mon fyer ki sa Gouvernman in rekonnet e i pe pran langazman ki lepep in mandat li pou pran. Me se pa tou.

Nou bezwen konpran filozofi deryer sa bann propozisyon. A lanver bann Ladministrasyon lepase ki ti fer lamannman Konstitisyon avek en sel bi pou ranforsi zot pouvwar. E la mon bezwen senpleman mansyonn 2. Premyerman rediksyon dan lakantite Manm Proporsyonnel pou anpes nou parti ganny plis plas dan Lasanble. E dezyenman,

pas baton e fer eleksyon boner, tou lede ki Mr Rene ti anmennen e ki zot parti ti vot an faver aköz sa ti bon pou zot.

Sa bann propozisyon ki pe vini pou retir lavantaz ki Prezidan i annan e remet sa dan lanmen lepep.

(APPLAUSE)

HON BERNARD GEORGES

Mesaz deryer sa, Mr Speaker, se ki Prezidan Wavel John Charles Ramkalawan pa per nanryen. I pa bezwen rod lavantaz pou li e son parti politik. I konnen ki i napa okenn leskelet dan son larmwar e alor i pa bezwen iminite.

Plito, i anvi ki se lepep ki deside ouvertman e libreman a en dat *fix* lekel ki pou ganny elekte, san lavantaz lo okenn kote.

Se sa ki pou ranforsi nou demokrasi ankor. E ler Prezidan napa iminite kont proseksyon, i forse azir pou benefis lepep e non pa pou son prop benefis. Rezilta, se ki nou demokrasi i ranforsi.

An sa ki konsern nou Lasanble, mon anvi adres de pwen lo sa size kot mon krwar ki annan ankor pou fer.

Premye i konsern Lopozisyon. Mon pa la Mr Speaker, pou donn okenn leson okenn parti politik. Sa i pa mon rol. Me mon'n asiz ase

lontan lo ban Lopozisyon dan sa Lasanble pou mwan konnen ler en Lopozisyon i efektif e ler i pa. Lopozisyon i ganny rekonnèt dan nou Konstitisyon konman en parti entegral nou striktir demokratik e konstitisyonnel. E i neser, dan nou sistenm parti politik miltiparti, ki i annan en Lopozisyon for e efektif dan nou pei. En Lopozisyon i en parti nou *state apparatus*, nou mekanizm Leta.

Se li ki la prensipalman pou balans sa ki Ladministrasyon i fer. Se en Lopozisyon ki premye pou gard Gouvernman in *check* e zwe en rol *oversight* lo Legzekitiv. En Lopozisyon efektif i fer sa par partisip an plen dan striktir Leta. I devret vizib e pran son plas konman sa dezyenm lafors politik dan pei.

Leader Lopozisyon, malgre sa ki nou'n tande e nou'n vwar bomaten. An term pozisyon dan nou pei i debout dan Konstitisyon a kote Prezidan. Aköz i sa dimoun ki si eleksyon ti pou'n al dan lot direksyon li ki ti pou Prezidan Sesel. Mon dir tousala, Mr Speaker, aköz i vre.

Nou striktir konstitisyonnel in ganny *design* koumsa. E sa de ansyen *Leader* Lopozisyon, Mr James Mancham e Mr Wavel

Ramkalawan, ti konpran sa e ti zwe zot rol konman *Leader* Parti dan Lopozisyon byen dan sa striktir.

Me, malerezman, sa Lopozisyon dan Lasanble ki nou annan ozordi, ou ti a krwar in abandonn son rol. Kot en Lopozisyon i devret pe propoz solisyon alternatif pou nou pei, sa enn i *nil by mouth*. Kot i sipoze pe amelyor Lalwa pou anmenn bann sizesyon lamannman, i senpleman poz keston, kritike, abiz Minis dan Lasanble, e la bomaten abiz Prezidan e pa anmenn okenn propozisyon konkret.

(APPLAUSE)

HON BERNARD GEORGES

Kot i sipoze pe partisip dan bann lokazyon nasyonal pou reprezant bann dimoun ki'n lev boner e debout dan laliny pou vot pou zot e fer grandi nou demokrasi, Lopozisyon i absan. Zot pa la dan Seremoni Lev Paviyon pou Lendependans, zot pa la pou Lafet Nasyonal, zot pa la pou louvertir Lasanble, zot pa la pou bokou resepsyon avek lanplur nasyonal.

Les mwan dir mon bann koleg dan Lopozisyon ki zot pa pe fer zot lekor okenn faver ler zot *boycott* levennman nasyonal. Zot pe trai nou striktir konstitisyonnel e zot pe les Sesel tonbe e sa bann

dimoun ki'n vot pou zot, tonbe.

Mon lans en lapel alor Mr Speaker, avek mon bann koleg lo lot kote latab pou silvouple grandi e aret azir parey bann ti marmay ki son paran in aras li en draze. Parey nou'n vwar avek Dirizan Lopozisyon bomaten.

(APPLAUSE)

HON BERNARD GEORGES

Pran zot plas veritab konman en Lopozisyon. Aret azir parey en parti minoriter. Aret boude, aret konplent, aret komans lannen Lasanble par en *matter of privilege* parey zot in fer bomaten silvouple. Fer parey Prezidan Ramkalawan in fer pa get politik konman en destinasyon. Get li konman en langazman ki apel sakenn parmi nou pou travay la kot nou'n ganny apele pou travay, pou amelyor nou pei e lavi nou pep.

Mon konnen Mr Speaker, sa ki mon pe dir. Akoz, apard sa 3 dernyen lannen mon'n pas tou mon lavi politik lo zot kote latab. E mwan mon'n aprann *from the best*.

An mezir ki zot pe *focus* lo detrwa pye dibwa, nou dan *LDS* nou regard lafore an antye. Se sa diferans ant nou.

(APPLAUSE)

HON BERNARD GEORGES

Mr Speaker, bomaten mon'n tann sa fraz en Gouvernman *US* an 2025 pou fer sa, pou fer isi. Les mwan fer zot konpran en sel keksoz. Mon bann zanmi, pa pou annan en Gouvernman *US* an 2025.

(APPLAUSE)

HON BERNARD GEORGES

Pa pou annan en Gouvernman *US* zanmen ankor dan sa pei.

(APPLAUSE)

HON BERNARD GEORGES

Met sa dan zot lasyet e manze. Met sa dan zot pip e finen.

Dezyenm pwen ki mon anvi adrese, Mr Speaker, se sa ki ou menm ou, ou'n koz lo la dan ou ladres pou louvertir lannen Lasanble.

Sa se pou fer ki Lasanble e mon mazine Zidisyer osi, ganny plis lotonomi finansyel e administratif *de sort* ki sa 2 Brans Gouvernman a kapab ganny plis laliberte pou travay e vin 2 brans ki kapab pli byen desarz fonksyon ki Konstitisyon i donn zot pou balans travay Legzekitiv.

Mon pa bezwen al an detay lo sa size, parey mon'n dir Mr Speaker nou pou annan plen letan pou fer li sa lannen. Me mon anvi zis reasir ou dan sa demars ou kapab kont lo nou lo sa kote latab. E la mon

krwar nou kapab osi kont lo mon bann koleg dan Lopoziyon, pou fer sa demars aboutir, aköz ankor enn fwa-aboutir ankor enn fwa pou kontinyen ranforsi bann striktir demokratik dan nou pei e pou fer ki nou demokrasi i a vin pli vibran ankor.

Dezyenm tenm ki mon'n dizernen dan mesaz Prezidan. Se ki nou pei i bezwen benefisye avek en lekonomi solid malgre bann defi nasyonal e enternasyonal ki nou'n fer e nou ankor bezwen fer fas avek. Mon pa bezwen retourn lo sa bann size *COVID*, lager *Ukraine*, Larisi eksetera Mr Speaker. Tousala, Seselwa i konnen e in abitye tande.

Me sa ki mon bezwen repete se ki, malgre sa bann defi e malgre sa doub dezans le 7 Desanm 2023 dan rezyon Nor ek Les Mahe, nou lekonomi in demontre en rezilyans e en solidite eksepsyonnel. E sa se gras a bon zesyon par Ladministrasyon Ramkalawan e son Minis Finans Naadir Hassan.

Me osi aköz lamazorite Seselwa in konpran filozofi sa nouvo Ladministrasyon, ki ou depans sa ki ou annan e ou depans li byen. A sa moman dan lemonn i nepli letan pou al rod larzan prete partou kote e zanmen annan lentansyon re

peye e les sa ki vin apre anmas lepokase.

Malgre sa bann laroul e tirbilans, Mr Speaker, e akòz nou pep in konpran fason fer sa Ladministrasyon, travay pe avanse lo tou kote nou zil, lo tou kwen nou bann zil lo nouvo proze e pou repar sa bann e amelyor sa ki'n kase.

Prezidan in donn en long lalis bann proze ki son Ladministrasyon pe al antreprann sa lannen e mon pa bezwen repet sa ozordi.

Me mon pa pou kapab mank sa lokazyon pou rekonnèt e felisit sa Gouvernman pou angaz li pou fer rapidman dan sa 3an ki'n pase otan pour remet nou pei lo nivo lenfrastriktir ki i ti merite.

Apre sitan letan, dan mon distrik Les Mamelles, twa lakaz ki *tiles* ti koule pe ganny refer. Byento bann blok *flat* pou ganny repenn, nou *day care* pe al konmanse nenport ki moman. E travay pou konstri lakaz dan kan Plaisance kot parti *US* ti pe mars marse Sanmdi pase, e dan vilaz li menm, i lo plan.

Me i tris pou konstate ki *mindset* en bann se pou zis kritike e zanmen remersye. Nou'n vwar sa apre lensidan le 7 Desanm e nou pou kontinyen vwar li toulezour.

Nouvel *SBC* i *focus* lo sa 30 pye Takamaka kot *Regatta*

Site Beau Vallon ki swadizan ti pe al ganny koupe annefe nou aprann ki ti napa sa kantite pye takamaka. Me personn pa koz lo sa *seawall* ki'n ganny konstri lo lans lanmenm la devan.

(APPLAUSE)

HON BERNARD GEORGES

Sa *seawall* ki fer ki en gran kantite, gro pye Takamaka ki donn sa lans son labote in ganny proteze.

Me Mr Speaker, nou pa les sa bann tapaz anpes nou avanse. Prezidan in konsey nou. Parey Prezidan in konsey nou pa ekout tapaz lo semen, kontinyen ou larout e *focus* lo ou lobzektif. Sa Gouvernman in aprann fer sa tre byen. Tou sa ki mon demande avek Lopozisyon isi dan Lasanble, avek bann responsab medya deor e avek nou pep se konsantre lo sa ki byen e sa ki pozitiv e aret viv dan negativite, spesyalman ler zot pe repet fo lenformasyon.

Mon pran en moman la ki nou lo sa size pou rekonnèt zefor eksepsyonnel ki sa 4 *MNA*, Onorab Philip Monthy, Cascade. Onorab John Hoareau, Beau Vallon. Onorab Sandy Arissol, Bel Ombre e Onorab Regina Esparon, Glacis e zot *DA* e tim dan zot distrik, ansanm avek Ladministrasyon Ramkalawan

in fer, pou amenn soulazman pou dimoun ki'n ganny afekte dan zot distrik avek dezans le 7 Desanm.

(APPLAUSE)

HON BERNARD GEORGES

Okenn nou, nou pa ti pou anvi pas dan sa ki zot zabitan in pas ladan. E mon remersye zot e tou Seselwa pou zot lasistans ki'n fer ki vitman keksoz pe repran son normal. Ki sa lespri le 7 Desanm i reste en lenspirasyon pou nou pei pou lontan ankor.

Sa refleksyon i amenn mwan tous Mr Speaker, lo en topik sansib ki konsern lafason ki larzan ki Gouvernman i zere i ganny depanse. Akoz en seri aksyon, ou in aksyon par bann Ladministrasyon oparavan. Ozordi, nou ki viv a sa moman i bezwen atraver Gouvernman, byen sir trouv larzan pou pey en seri det e konpansasyon pou sa bann aksyon e in aksyon.

Prezidan in fer nou rapel sa bann peyman ki pou bezwen ganny fer. Polisyon delo La Misère akoz en devlopman ki pa'n ganny sipervize. *Fungus* dan plizyer landrwa travay kot aksyon pa'n ganny pran a tan. Polisyon tapaz ek lafimen kot Stasyon Elektrik Baie Ste

Anne, ki'n ganny zis balye anba karpèt.

E la, parey nou fek aprann, re pey det ki parti *SPPF* ti'n pran avek Larisi an 1980 3an apre koudeta e ki pa'n zanmen ganny re peye.

Tousala pou pran larzan ki ti pou'n kapab al dan konstriksyon lozman, lopital, lekòl e bokou lezot servis. La Misère, *fungus* e Baie Ste Anne i deza dan program ganny peye. Me i annan enn ankor, Mr Speaker. E enn gro. Viktim *TRNUC*, mon dir li koumsa pou fer pli senp, li i pa ankor rezourd.

Nou Lasanble lannen pase ti aprouv en Mosyon ki ti demann met en sistenm an plas pou determin nivo konpansasyon, e fer reparasyon pou bann viktim *TRNUC*. La ki Prezidan Zedi pase in fer sa ki bokou ti pe espere e in ofer lekiskiz lo lapar Leta Seselwa pou sa bann labi ki'n arive swit a koudeta 1977, in ler pou regard sa size reparasyon e konpansasyon pou bann viktim.

Mon ti dir lannen pase dan deba lo rapor *TRNUC* ki mon ti dezapwente ki bann ki sikseser parti *SPUP/SPPF* e ki kontinyen deklare ki zot fyer ki zot ankor dan sa parti ki son slogan i '*Fearless in Dignity*'. E ki zot ankor pe swiv prensip zot per fondater, parey *Leader* Lopozisyon in fer ankor enn

fwa bomaten. Ki zot pa'n vin devan an premye pou propoz en mwayen rekonpans viktim sa sistenm ki dan zot listwar.

Sa dezapwentman Mr Speaker, i ankor avek mwan ozordi. Olye trouv liminite pou aksepte zot koneksyon avek zot parti predeserer e rod en fason pou ed bann viktim. O kontrer, zot dirizan i plifere dir ki li e zot osi zot pa ti pran par dan sa bann zafer alor zot pa vwar akoz zot devret demann pardon e fer okenn kontribisyon.

Me selman, sa bann propriyete ki zot predeserer in pas avek zot, an kontan *Maison du Peuple*, sa zot garde.

(APPLAUSE)

HON BERNARD GEORGES

Tou sa ki bon, zot, zot benefisyè, sa i pou zot. Tou sa ki mal, kot zot bezwen peye, sa en lot ki pou fer.

Me non, Mr Speaker. Sa kalite manboulouk son letan in fini. E son letan in fini la ozordi. Sa ki responsab pou bezwen pran son responsabilite.

(APPLAUSE)

HON BERNARD GEORGES

E pran son responsabilite. Kontan, pa kontan. Ozordi, alor, le 27 Fevriye 2024,

mwan, Bernard Georges, Manm Elekte pou distrik Les Mamelles, *Leader* Zafer Gouvernman dan Lasanble Nasyonal. Mon pe propoze ki si en dimoun ouswa en lakonpanyen i fer en aksyon pou ki Gouvernman pou bezwen pey konpansasyon, ki se polisyon en lanmar, ouswa larivyer Les Mamelles, ouswa en leksplozyon, ouswa en koudeta. Ki se sa dimoun oubyen sa lakonpanyen, ouswa sa parti politik ki'n koz sa domaz ki an premye i bezwen pey reparasyon pou sa domaz.

(APPLAUSE)

HON BERNARD GEORGES

Gouvernman li, i ava antre parey in fer swivan dezans le 7 Desanm pou amenn sekour imedyà. Me apre i pou bezwen al rod ranboursman sa ki in depanse avek sa ki responsab. Se dan sa fason ki nou pou kapab montre sak Seselwa e sak parti politik ki i bezwen pran responsabilite pou tou son aksyon a tou moman.

Dan sa laliny, alor, mon propoze ki se tou *perpetrators*, partou kot zot ete ozordi, ki bezwen pey okenn konpansasyon ki bezwen ganny peye avek viktim *TRNUC*.

(APPLAUSE)

HON BERNARD GEORGES

I pa akseptab ki *taxpayers*, ki viktim zot menm, i ganny demande pou pey pou zot prop reparasyon. E la mon fer en lapel, Mr Speaker, avek parti *United Seychelles*, ki sikseser sa parti ki ti fer koudeta, e ki atraver son kontrol lo Leta e lo politik ant 1977 e 1991 in akapar plizyer propriyete avek Leta pou bann sonm tre ba.

E ki i ankor annan sa bann later ek sa bann biznes, pou vin devan e parey Prezidan in fer Zedi pase, demann lekskiz pou sa ki zot parti in fer e zot siporter in fer e servi sa bann byen pou konpans viktim *TRNUC*.

Lazistis Mr Speaker, pa demann mwens ki sa. Viktim, in atann tro lontan e zot pe depann lo nou pou amenn sa sekour pou sa ki zot in pas ladan.

In ler prezan pou met en lafen a sa sapit e rann a bann viktim sa ki pou zot. Nou pa kapab les sa ki responsab zourir zot gro later e bizness e pran larzan *taxpayers*, ki nou bezwen pou fer marse pei, pou pey pou zot krim.

Kekfwa serten dimoun ki pe ekout mwan a riye e dir ki mon pe zwe politik e ki sa zanmen pou arive. Pa tonm dan sa pyez. Sa kestyon i tro enportan pou nou zis vin koz lo la. Aksyon i bezwen swiv in

aksyon. Me pour le moman, dan lespri donn loportinite pou en parti politik koriz fot sa ki'n arive, mon pe senpleman demann avek parti *United Seychelles to do the right thing*.

Linite e rekonsilyasyon i pas par en *mea culpa*. Bondye dan son bonte i rekonpans sa ki repanti e repare. Krwar mwan, mon bann zanmi dan Lopozisyon, ki se par donn legzanp ki zot pou reganny konfyans Lepep Seselwa. Silvouple, montre ki zot annan sa anndan zot. Ki zot annan leker pou sa ki'n soufer e vin devan e fer zot devwar. Si zot pa fer li...mon kit sa la.

Prezidan Mr Speaker, dan son mesaz in deklar lannen 2024 konman en lannen aksyon pou son Ladministrasyon. Mon ti pou dir ki sa lannen 2024 i pou en lot lannen aksyon pou son Ladministrasyon, akoz zanmen dan listwar Sesel nou'n vwar plis aksyon par en Gouvernman e plis langazman par son dirizan a tou nivo.

Tan ki Wavel Ramkalawan i Prezidan nou pei, Mr Speaker, Leta Nou Nasyon pou bon, i pou menm plis ki bon.

Nou Prezidan pa en zonm ki zis asiz dan en biro *State House*. Non, i en zonm teren. Zedi swar i ti isi pou son mesaz lo Leta nou Nasyon, granmaten vandredi i ti Beau

Vallon pe enspekte sa bann pye takamaka. Se pa en zonn ki pa okouran sa ki pase dan son pei. Sa zonn se koumsa ki ler i vin isi devan nou i kapab koz lo trotwar Biznak e osi lo *Lotel Waldorf Astoria, Ile Platte* e lo laprezidans bann Pti Leta Zil e vin en sanpyon pou lendeks vilnerabilite pou bann pti Leta.

Me pa zis li, Mr Speaker. Ladministrasyon an antye i koumsa . Sakenn son Minis in ganny swazi ekspreseman pou desarz sa responsabilite ki zot konpetan ladan. Nou'n vwar sa isi dan sa Lasanble. E nou vwar ki mannyer sakenn parmi zot i kapab diriz travay zot departman e metriz nenport size a en nivo profesyonnalizm eksepsyonnèl.

Sa Ladministrasyon i angaze avek tou kous sosyete e i azir a tou nivo a tou moman. Zot pa asize. Zot an mouvman toultan.

Me Gouvernman pa zis Legzekitiv, parey nou souvan krwar. Nou osi nou form parti sa Gouvernman e lo sa kote latab, nou form parti sa Ladministrasyon *LDS* ki pe diriz pei. La osi, Mr Speaker, nou vwar langazman zonn ek fanm determinen pou fer avanse nou pei.

Sakenn parmi nou lo sa kote latab, Manm Elekte direktman ouswa Manm

proporsyonnelman, nou demontre sa langazman pou fer avanse nou pei.

Zedi pase nou Lasanble ti rann omaz premye Manm ki'n kit nou pandan ki i pe deservi en manda.

Onorab Rosie Bistoquet ti en manm egzampler nou *Caucus* e nou Lasanble. I ti enn sa bann rar Manm ki pa ti anvi reste zis kole konman en Manm Lasanble e vin isi 2 fwa par semenn. Non, i ti pran responsabilite an deor son tit *MNA*. E i ti bras plizyer fonksyon sosyal, rezyonal e enternasyonal pou fer avanse son parti, son profesyon ners, byennet Seselwa e rezidan lo Kontinan Lafrik.

En lanmor trazik in termin son servis avan ler e parti *LDS*, Lasanble Nasyonal, distrik Pointe Larue, lasosyasyon ners e lezot ankor e, byen sir, Sesel, in perdi en fanm ekstraordiner.

Me, Mr Speaker, lavi i kontinyen. Anmezir ki nou regret nou defen Manm, nou osi akey 2 nouvo Manm, 2zenn madanm, parmi nou. Permet mwan alor, lo mon non personnel e osi lo non nou *Caucus*, pou swet labyenveni parmi nou a Onorab Anne Bistoquet e Onorab Rachel Spiro.

Mon napa okenn dout ki sa 2 madanm pou amenn en kontribisyon enportan dan

nou Lasanble. E ki zot pou asiste sa ki deza la, pou elev nivo deba e fer nou Lasanble vin en lenstitisyon ki nou swete i vini en brans ki debout gal pou gal avek sa de lezot e ki resevwar tou rekonesans ki nou merite. *Welcome*, Onorab Bistoquet, *welcome*, Onorab Spiro.

(APPLAUSE)

HON BERNARD GEORGES

Me defi Mr Speaker, i ankor devan nou. Pa tou keksoz ki'n *ok*, pa tou keksoz ki'n *ok* dan sa dernyen 3an. E i annan ankor sekter ki bezwen amelyore.

Avan mon konklir Mr Speaker, permet mwan koman en senp Manm sa Lasanble pou fer sa ki pli boner mon'n demann Lopoziyon fer. Les mwan donn detrwa lide pou konble serten defayans ki ankor annan dan nou pei.

Ease of doing business i ankor en *challenge* pou plizyer rezon. Mank kapasite dan serten biro i fer ki prosedir i ankor tro dousman. En legzanp se Biro Lanrezistremant, kot i tro tarde pou anrezistre dokiman neser pou fer biznes bouze. Sa i retard devlopman e i amenn fristrasyon.

Finans e kapasite i bezwen ganny trouve pou ed

sa bann departman amelyor zot servis.

Lo nivo lozman, mon konstate ki malgre zefor Minis Rangasamy ek son lekip, i ankor annan *room for improvement*. Mon oule sizere ki sa Minister i angaz li plis avek Sekter Prive pou konstri lozman.

Malgre ki Gouvernman i bezwen konstri nouvo lozman sosyal e amelyor sa ki vye. Mon krwar ki legzizans ozordi i pou konstri plis *condominium* pou bann zenn ki anvi en lozman a sa nivo.

Mon konnen ki bokou kontrakter ti pou deswit partisip dan bann proze PPP kot Gouvernman i donn later e kontrakter i finans e konstri *condo* pou revann avek piblik. En tel propozisyon i esansyel pou agrandi nou stok lakaz rapidman. An menm tan, Gouvernman i devret angaz li pou rod en fason pou dimoun ki'n aste en kare later dan *Land Bank* e ki pa kapab- pou kapab konstri.

I pa fer okenn sans ki ozordi en lakaz 100met kare i kout plis ki R1 milyon pou konstri, me bokou dimoun pa kapab ganny plis ki R650,000 avek labank. Sa serk visye i bezwen kapab kase pou retir fristrasyon malgre bon lentansyon Gouvernman.

Epi, mon regrete pou vwar ki i annan en mank

koneksyon ant sa Ladministrasyon ki pe bouz vit e travayer pli ba dan departman ki pa angaze lo menm vites ki Gouvernman.

En legzanp i senp pou ilistre mon pwen. Gouvernman in depans R69 milyon pou fer *National Library*. Sa se son non. *National Library*. En *library* set en landrwa kot ou pret liv epi rann. Sa konstriksyon in dir pandan 2an apepre. Me ler *Library* i ouver apenn si i ti annan liv ladan.

Ki sa bann ki responsab pou rod liv ti pe fer pandan sa 2an? An plis ki sa, Ladministrasyon *library* pa pe aksepte liv dezyenmmen. Si Gouvernman in swazir pou depans sitan larzan pou remet *National Library* a sa nivo, i malere ki i *still* pa pe servi son fonksyon. *Mindset* i bezwen sanze.

Sa se en legzanp, Mr Speaker. Nou annan ankor bokou kot nou kapab vwar Gouvernman ki angaze ganny retarde par son bann fonksyonner ki swa trenn lipye, swa i pa pe aplik lareg oubyen i pe aplik lareg ki pa fer sans. Se la kot travay i bezwen ganny fer pou ki Gouvernman i vin ankor pli performan. E mon lans en lapel avek tou travayer pou silvouple pran zot

responsabilite e travay pou byennet nou dimoun.

Kominikasyon i kle, silvouple angaz zot parey zot *Leaders* i angaze.

Dan son diskour ki Lopozisyon byensir pa ti asiste Vandredi pase, ki ti ganny ofer par Minis Zafer Etranzer pou remersye bann diplomat anpos Sesel, Dwayenn Kor Diplomatik in felisit Sesel pou nou lakonplisman sa detrwa dernyen lannen. E i ti dir en fraz ki devret reste avek nou a tou moman. I ti dekrir Sesel konman en legzanp ki en pti pei i kapab en gran nasyon '*A small country can be a great nation.*' Sete son parol.

A great nation, Mr Speaker, i kapab arive selman si son pep i ini. Linite se lakle grander en nasyon. Linite pa oule dir ki nou bezwen dakor lo tou keksoz. Sesel pour tou son zanfan sete en lapel a linite. Mon kapab ozordi dir ki pli gran lakizasyon ki sa Ladministrasyon i gannyen avek son siporter se ki siporter *US* i ankor dan bann plas enportan dan Gouvernman. E ki dan serten ka, sa bann travayer pe retard devlopman pei e pe amenn fristrasyon dan bokou dimoun.

Me si Sesel i pour tou son zanfan, i bezwen osi pou zanfan *United Seychelles*. Si non, sa slogan pou vid. Larepons se pa pous travayer

US, a mwens ki zot fer move zanafan, e sa i aplik osi pou move zanafan *LDS*. Larepons se pou annan linite konman en pep, kot tou travayer i travay pou sa Ladministrasyon ki an plas dan lentere Sesel, pe enport son krwayans politik. Parey nou moto i met li, linite i bezwen pas avan diversite e non pa diversite avan linite.

Linite i demann ki en Gouvernman i regard sa ki pli kapab avan ki i regard son kouler politik. Lo sa, personn pa kapab blanm Prezidan Ramkalawan. Zot kapab dir, parey zot sef in dir, ki en kantite dimoun in ganny pouse dan Gouvernman aköz zot krwayans politik. Me laverite se le kontrè, e zot konnen.

Mwan Mr Speaker, mon pa fristre ler mon vwar ki Onorab Anbasader Marie-Antoinette Rose Quatre ki ti asiz dan sa sez li osi konman *LGB* pou Parti Lepep pe al pran en rol enportan pou Linyon Afriken Sid-Afrik, avek sipor Ladministrasyon Ramkalawan.

(APPLAUSE)

HON BERNARD GEORGES

O kontrè, o kontrè, mon rezouir pou vwar en madanm kapab pe fer flote paviyon Sesel, e ki nou Gouvernman i siport li. Bann Lanbasader ki

nou'n siporte dans sa Lasanble, zot krwar ki tousala ti vot pou *LDS* an 2020? Se pa sa ki enportan pou Ladministrasyon

Ramkalawan, Mr Speaker. Sa ki enportan se konpetans en zonn ouswa en fanm.

E lo sa size konpetans, permet mwan, Mr Speaker, pou mansyonn kaptenn Ronny Morel. En kaptenn lo *Air Seychelles*, e son *crew*, lo *flight deck* konman dan kabin, ki ti pe anmenn avyon sorti Moris semenn pase. Mon ti abor. Sa vol ti ariv Sesel pandan sa gro lapli Mercredi apremidi.

Avek en konpetans manifik, kaptenn Morel in eksplik nou bann pasaze ki nou pa ti pou kapab apoze. E nou pou bezwen espere. Son profesyonnalizm in fer ki apre lerdan fer letour dan movetan, nou'n ariv ater sen e sof. Se sa nivo konpetans ki nou pei in arive gannyen.

(APPLAUSE)

HON BERNARD GEORGES

E se sa nivo konpetans ki nou espere a tou nivo isi dan Lasanble e partou dan Gouvernman.

Nou en pep beni, Mr Speaker, pou viv a sa moman nou listwar kot nou annan en demokrasi vivan, avek en lekonomi solid e en

Gouvernman angaze. Tousala, malgre ki nou'n bezwen fer li tousel an mezir ki Lopozisyon i *missing in action* e en serten sekter medya i kontinyen benny dan reportaz negativ.

Si nou'n kapab fer sitan progre malgre sa, annou zis mazine ki mannyer nou ti pou ankor pli lwen si nou tou nou ti pe bos ansanm, ini dan en sel lobzektif pou fer Sesel ankor pli byen, e nou paviyon flot ankor pli o.

MR SPEAKER

45 Minit Onorab.

HON BERNARD GEORGES

Mon pe fini Mr Speaker. Mon lapel avek nou koleg dan Lasanble e mon lapel avek tou Seselwa, alor se menm lapel ki Prezidan in fer avek nou. Sa pei Sesel i pou nou tou. Nou tou nou annan en par ladan. Separe, nou pou les lezot pran nou plas. Ansanm, ini konman en pep beni, dan en lespri pozitiv, person, person e person, pa pou kapab bar nou.

A small country can be a great nation. Nou deza en *small country*, e anba direksyon Ladministrasyon LDS nou pe vin en *great nation*. Sa pei i pou Bondye, me sa nasyon i nou. Ansanm, nou kapab fer li. Ansanm, nou bezwen fer li. Ansanm, Mr

Speaker, konman en sel pep, ini dan nou diversite, anba Ladministrasyon parti LDS ek direksyon ou e Prezidan Wavel Ramkalawan, nou pou fer li. Mon remersye ou.

(APPLAUSE)

MR SPEAKER

Mersi. Mersi Onorab.

Lasanble aprezan pran en poz e nou a re pran repons 11er.

Mersi.

(BREAK)

MR SPEAKER

Nou rebran deba. Laparol i pour Onorab Andy Labonte. Laparol i pour Onorab Andy Labonte.

HON ANDY LABONTE

Mersi Mr Speaker. Mr Speaker tou koleg Onorab, sekretarya e *staff* Lasanble Nasyonal, zabitan La Rivière Anglaise, Lepep Seselwa. Bonzour.

Mon pou kontinyen loue ou Senyer, Bondye, Papa nou kreater. Akoz se zis ou ki annan vre pouvwar. Ou parol e promes i reste touzour senser. Nou koman imen, nou enparfe. Nou panse e leta lespri i sanze par diferan lenfliyans.

I kapab par nou lanvironnman, lekspektasyon, lanbisyon ou leksperyans. Promes ki'n ganny fer i parfwa

ganny kase. Lekspektasyon souvandfwa i pli o ki larealite. Alors nou dezapwente. Sa ki ti krwar dan en sanzman an Oktob 2020, ozordi i kapab in perdi konfyans e perdi lespwar. Akoz i ti annan son prop lekspektasyon.

Sa enn ki pa ti oule sanzman, ozordi i kapab zwaye e apresye larealite aktyel. Se sa natir imen. Sa i toutafe normal e nou bezwen aksepte larealite. Sa i fer mon mazin Sapit 7 dan liv *Saint Luc* vers 31- 35.

Mon site, “Zezi ti kontinyen, avek kwa mon pou konpar dimoun sa zenerasyon? Ki zot resanble? Zot parey bann zanfan ki pe asiz lo laplas, e ki kriy avek kanmarad. Nou ti zwe lanmizik pour zot, me zot pa ti danse. Nou ti sant kantik dey, me zot pa ti plere. Annefe, *Jean-Baptiste* in vini, i pa ti manz dipen e i pa ti bwar diven. Me zot dir i posede par en demon.

Fils-de-l’homme in vini. In manze e in bwar, e zot dir. Get sa, i en zonm voras e en soular, i zanmi bann kolekter *tax* e bann peser. Me tou dimoun ki aksepte lasazes Bondye i rekonnet ki i byen azir”. Retir sitasyon.

E menm en santer byen renonmen Mr John Wirtz, li i ti sante ki dir, “tou sa ki mon fer lo sa later napa byen”.

Mr Speaker, mon konmans koumsa akoz Oktob 2020, mon ti pran mon en desizyon vremen onorab e enportan dan mon lavi. Pour vin reprezant mon kominote La Rivière Anglaise. Vin zot lavwa e fer sa ki byen koman en imen, koz laverite, me non pa pou vin fer politik partizan, politik popilis e fer latak personnel.

En konsey ki Prezidan li menm in met lanfaz lo la dan son diskour. Ziska ozordi mon fyer avek sa desizyon, malgre tou defayans. Me mon pa pou zanmen azir parey en *Hérodien*, ni en *Pharisien*, e ni en *sadducéen*. Mon repons lo diskour Prezidan, i pour baze lo bann fe e larealite lavi ki devan nou.

Mr Speaker, 2020 in en lannen ki'n mark pep Seselwa, enkli mwan personnelman parey Prezidan ti fer resorti dan son diskour Lendi le 19 Fevriye. Lazwa ensi byen ki latristes.

Plizyer Seselwa, nou'n bezwen dir adye en pros. Ki nou fanmir, en zanmi ou konesans. Distrik La Rivière Anglaise, apard perdi Mr Mark Mathiot, nou'n perdi plizyer ankor parey Mr Michel Pharabeau, manmzel Paulette Uzice, Ms Felicia Lafortune, Mr Terence Barbe, zis pou nonm enn de. Me i annan bokou lezot ankor.

Lo non distrik, mon ankor enn fwa pas mon senser kondoleans avek tou bann fanmir. Pou mwan, tou endividi i zwe en rol dan en fason ou en lot, dan en kominote. Mon konsey, se annou montre tou dimoun ki nou apresye e kontan zot ler ki zot ankor vivan. Non pa ler zot mor.

Nou'n vwar movetan e dezans natirel, kot plizyer fanmir in perdi byen materyel e menm zabitan perdi lavi. Leksplozyon Petite Paris, kot CCCL, kot plizyer byen materyel in ganny detri e pe oblize ganny batir.

Annou dir mersi senyer ki personn pa'n perdi lavi dan sa enn. Lo sa note mon pou zwenn avek Prezidan pou salye nou Seselwa, enkli nou bann *diaspora* avek sa solidarite, patriyotizm e konpasyon. Tou bann endividi, lorganizasyon prive, ou lazans gouvènmantal ki'n ede fer en diferans avek leker e senserite.

Sa in ede soulaz sa bann kominote e donn nou bann frer ek ser kouraz pou kontinyen, rekonmanse e repran en lavi normal. Dan tousala in fer mon reflexir lo en keksoz vremen enportan dan lavi. Nou frazilite koman en imen.

I annan en tan pour tou keksoz lo sa later. Annou viv

sak zour parey i dernyen zour, aköz nou pa konnen nou fitir. Alors annou mazin dibyen dan tou sa ki nou fer, otan ki nou lo sa later. Tou imen nou bezwen kanmarad. Lapel Prezidan Wavel pe demann nou pou viv dan linite, lape ek larmoni.

Mr Speaker, Prezidan in koz lo bann fanmir for, elimin laenn ek vyolans domestik. I fermal perdi en zanmi, en manman, en granmanman, en tantin, en profesyonnel ki annan bokou ankor pou fer parey Onorab Bistoquet.

I difisil pou aksepte, me ki ou a fer. En zour pou ne, en zour pou mor. Dan ki fason ou vin dan sa monn e dan ki fason ou pour termin ou parkour lo sa later se zis Bondye ki konnen.

Mr Speaker enn bann konsey defen Onorab Bistoquet se ki nou bezwen rekonnet, apresye tou sa ki byen, kontinyen dir mersi e touzour annan gratid. Me dan tou defi nou bezwen rezilyans, rod pozitivite e pran li konman en leson pou kontinyen dan sa koridor lavi teres.

Mr Speaker, Prezidan in koz bokou lo lape ek rekonsilyasyon. Nou bezwen kontinyen kiltiv bann bon valer parey pozitivite, konpasyon, respe, latolerans, lanmour. Aköz se sa ki pou fer

nou pei e sosyete prospere. Annou denons tou form negativite, retir laenn, zalouzi ek lorgey.

Pou fer sa. Nou pep i bezwen en transformasyon e gerizon moral. La mon mazin, nou nouvo Dyak Christian Toulon, dan enn son Lapres kot i ti rapel nou. 'Se zis Bondye selman ki donn gerizon. Zonm nou zis sonnyen'.

La lo sa note mon pou pran sa lokazyon e felisit nou zenn Dyak Christian Toulon, dan son Lordinasyon e rann glwar Bondye.

Vi ki i en zenn, e baze dan nou parwas Imakile Konsepsyon, i demontre ki i annan keksoz pozitiv ki pe arive dan Sesel. Mon kontan ki Prezidan in montre son lapresyasyon pou lakres ki Katedral Imakile Konsepsyon ti fer Nwel lannen pase.

Sa i demontre son latasman, respe e valer ki i mete ver tou bann kominote relizye, ki pe ede geri nou pep. La spirityalite i reste lakle.

Mr Speaker mon'n touzour afirm mon senserite pou fer sa ki byen. I annan en diferans ant sa ki byen e sa ki meyer. Parfwa sa ki meyer i pa neserman byen pou tou endividi. Sa ki meyer pou en endividi, i pa neserman meyer pou en lot endividi. Sa i natir imen. Me fer sa ki byen, i

parfwa vedir, mars ou tousel, pran bann desizyon ki difisil e pa popilis.

Rezon mon dir sa i aköz souvandfwa mon'n tann dir ki Seselwa in elekte LDS pou fer pli meyer. Diferan endividi i annan diferan bezwen e priyorite.

Me zabitan La Rivière Anglaise i dir mon ki zot in elekte mwan pou fer sa ki byen. Ede koriz bann lenzistis, respe drwa imen e annan latolerans dan tou son splander. Pe nenport ras, kouler politik, larelizyon ou oriyantasyon seksyel parey Prezidan in koz bokou e plizyer fwa lo la. Aköz anba sa Konstitisyon Sesel, tou Seselwa i annan menm drwa e menm responsabilite.

Alors sa ki bon pou mwan, i osi bon pou ou e pou mon pei. Me sa ki pa bon pou mwan, pa kapab bon pou mon prosen. I pli move, pa bon pou devlopman nou pei. Aköz nou pei e nou zabitan i merit reste touzour nou priyorite e met li avan tou.

Lo sa not mon pou dir ki Prezidan in tras larout pou anmenn sa pep ver rekonsilyasyon. Prezidan Wavel, ki li e son parti pa ti enplike dan okenn sa bann tortir ki ti arive dan letan koudeta. Me in kapab annan sa kouraz pou demann pardon son pep, lo non Gouvernman

avek tou viktim. Sa i apel en vre dirizan ki pe montre legzanp e anvi gerizon pour son pep. Mon swete ki bann ki ti enplike, i swiv legzanp e osi fer parey.

Mr Speaker, i malere ki la dan sa bann letan kot nou pe viv an 2024. I ankore annan en minorite Seselwa, zot leta lespri in ganny anpwazonnen par en kiltir, kot politik destriktif in vin en katalis, koman en kanser progresiv ki pe anmenn dezapwentman, negativite e met retar sa pei.

La mon le fer referans lo pwen kot Prezidan in dir. Met nou pei avan tou. Akoz sabotaz pa pou ganny tolere. I annan politisyen ki pare pou fer nenport kwa pou ariv anler. Senm propagann e koz mansonz. Ankore en konsey sorti kot Prezidan Wavel, se “koz laverite e i ava liber ou”.

Si napa konsiltasyon e latransparans i donn rezon pou santer dekrir politisyen koman ‘politik’. Me Prezidan in fer resorti ki son Ladministrasyon i pare pour konsilte, ekoute e menm retourn lo bann desizyon ki dan lentere lepep, menm si *Cabinet* in fini desid lo la.

Mr Speaker, dan nenport ki lorganizasyon i annan diferan dimoun, avek diferan krwayans spirityel, lopinyon personnel ou politik ki sorti dan diferan fanmir.

Lenportans se deservi ou responsabilite avek senserite, lwayote, dinyite e respe.

Nou tou ki la, nou merit mazin en ki en zour nou pou kit sa later. Person pa endispansab e imortel. Prezidan in fer resorti ki Gouvernman se Lepep Seselwa e i reste touzour en sel. Me Ladministrasyon ki sanze.

In osi azoute, ki ler nou pe demann domaz Gouvernman se larzan piblik ki an kestyon. Alors fodre ki nou kit deryer bann bon memwar. Nou pa kapab viv konmsi ki lemonn i *appartiens* pou nou.

Ler nou kit sa later nou pou zis en listwar. San okenn pouvwar, san okenn Lotorite e san okenn larises maternal. Me nou pour kontinyen vwar – me nou pe kontinyen vwar lafen e voras pouvwar ki pe anmenn bokou destriksyon pour en nasyon e lemonn.

Nou koman bann politisyen e bann dirizan, nou oblize konstri, batir me non pa detri. Nou bezwen vin bann legzanp e pa met nou lentere personnel koman priyorite. Pli enportan se kit antet ki se lepep ki'n met nou la, nou en serviter lepep e pe ganny peye par larzan lepep.

Mr Speaker, mon kapab annan en diferan lopinyon avek ou lo nenport ki size. Me

omwen ki mon pa enpoz mon krwayans lo ou. E si mon respe ou lopinyon, i pa vedir ki mon agree e pe siport ou konpletman.

Me i demontre grander lespri, latolerans e respe. Imen in ganny kree pou koegziste avek kanmarad, viv an larmoni, vin en nasyon e lemond larkansyel.

La mon mazin 3enm let Sen Pol pou bann Galat, Sapit 3, vers 28. Mon site, "alor, i nepli annan okenn diferans ant Zwif ek non-Zwif, ant lesklav e ant dimoun lib, zom oubyen fanm, akoz zot tou, zot in vin en sel avek Zezikri". Fen sitasyon.

Konmela menm en prizonnyen i annan son drwa e dinyite koman en imen. Mr Speaker, mon kontan parey Prezidan in dir ki sa 8 benefis statistisyer, ki'n tonm anba lasistans sosyal, in ganny ogmante par 81poursan ziska 233poursan.

Mon swete ki zabitan i ganny akse avek sa servis dan en fason ki merite, enkli sa 9enm ki'n ganny azoute. Sa i pou ede pou amelyor zot lavi e ed zot fer de bout zwenn.

Prezidan in fer resorti ki konmela tou Seselwa i annan drwa koze e eksprim son lekor e lopinyon san viktimizasyon. Alors permet mwan eksprim lopinyon serten mon zabitan,

atraver 3 senaryo ki zot in met devan mon lo leta nou distrik.

Akoz se sa ki bann keksoz ki ankor pe kree serten defayans e fristrasyon dan nou pei. Sa i pa avek zis bi kritike. Mon pou vin avek bann propozisyon ki kapab anmenn solisyon pou ede amelyor sitasyon dan nou pei.

Mon pou konmans par felisit sekter piblik, kot in annan bokou amelyorasyon dan bann servis ki ganny delivre, malgre defi. En legzanp ki ti ganny resorti dan *meeting* piblik anyel dan distrik La Rivière Anglaise, boner sa lannen i konsern Lasante.

Lasante en pep i reste touzour primordyal. Sa *meeting*, i enn mon komitman avek mon zabitan ki ganny fer komansman sak lannen. Avek bi reste konekte e anmenn bann diferan departman, ou sekter enportan dan Gouvernman pli pre avek kominote.

Dan sa *meeting*, Miss Marie-Helen Niole, Ners Ansarz Sant Lasante La Rivière Anglaise, ti enform zabitan ki avek bi amelyor servis e redwir dirasyon ki paysan i espere lo ban pour vwar dokter. Donn priyorite bann dimoun aze, zanfan e bann ki pli grav.

En sistenm in ganny met an plas kot pasyan pa bezwen deplase pou vin asize lo ban, pou plizyer letan pou esper dokter. Pasyan i kapab zis telefonn lo 4388577. E la zot ava ganny en ler egzakt, menm zour pou vwar dokter koman en lapwentman. Kot ler sa paysan i vini i kapab pas pli vit e vwar en dokter.

I ti osi azoute ki i annan en sistenm elektronik an plas, kot tou paysan i ganny ankouraze pou vin avek son kart idantite. E la son kart idantite a ganny *scan* e tou lenformasyon sa kliyan i ganny anrezistre direk dan sistenm.

Sa i avek bi fer servis pli vit e pli efikas. Lo sa not mon pou felisit Ms Niole avek tou travayer kot sa sant lasante. E osi tou *staff* dan lasante an zeneral, ki pe sey zot mye pou donn en bonn servis.

Me i touzour reste bokou ankor pou fer ki servis lasante Sesel, i arive lo sa nivo ki lekspektasyon piblik Seselwa i annan.

Premye senaryo i kot *DSAPTR*, ki pe rann en servis anver nou bann adikt ki'n viktim labi sibstans. Ankor mon pour felisit tou travayer kot *DSAPTR*, anba gidans madanm Marie-Josette Louise Fanchette. Menm si legzanp i kot *DSAPTR* me sa latid e

mantalite i dan plizyer lezot antite.

DSAPTR zot donn sa servis *Methadone* 7er ziska 10.50. En kliyan i ariv kot biro - kot baro 10.51. Sekirite i ganny lord pou refize les sa kliyan antre, menm si i annan en laliny 10 kliyan par anndan baro, ki pe akse sa servis. Rezon, se Polisi i koumsa. Me Polisi se zonn ki'n fer e napa en kad legal. Si Polisi fodre revwar, fer li e met li azour.

Mon krwar lesansyel, se plito travay avek sa bann adikt pou ki zot antre dan en lanplwa, ki ava dekouraz zot groupe an deor baro, ki ale pandan preske en lazournen antye e kree en nwizans.

Dezyenm senaryo i ler looperasyon bann servis esansyel, ki merit reste ouver letan dezennen. Sa i vreman kree en bann lenkonvenyan. Ankor i deroul dan plizyer bann servis piblik, parastatal e menm prive. Serten lofis, ler i dir midi tou travayer i pran dezennen ansanm.

Legzanp pli pros se dan en Ladministrasyon Distrik. En zabitan ki travay dir e avek bi ogmant prodiktivite, i profite dan son letan dezennen, pou li vin akse en servis, i pa ganny resevwar akoz tou *staff* i dan ler dezennen.

En lot problem se nou bezwen revwar ler ki aktivite i

ganny organize pou bann *staff*. Dan lasemenn pa en zour pou ferm en biro, met en papye lo laport ki lir “travayer i dan lazournen sportif”. Sa pa akseptab. Fer ou lazournen sport en Sanmdi, oubyen en Dimans, pa pandan lasemenn. Pran legzanp lo bann labank, resepsyon dan bann lotel, *PUC* e bokou lezot ankor.

Trwazyenm e dernyen senaryo se dezans dan distrik ki son lenpak i kapab ganny redwir, ou anpese ler nou prevwar davans. Sa i kapab sov lavi e propriyete. Parey nou dir. Prevansyon i pli bon ki gerizon.

La mon krwar i annan en ledikasyon ki bezwen kontinyen ganny fer, pou endik nou pep aköz ledikasyon i enportan. En pye dibwa oubyen en miray ki kree en danze pou zabitan, oubyen propriyete. Zabitan i fer raport e i ganny dir ki sa i son responsabilite aköz i lo son propriyete. En pe letan pli tar, sa menm pye dibwa i tonbe ouswa miray i degrengole.

La prezan Lotorite Distrik i vwar li oblize entervenir e asiste. Me domaz in fini ganny fer e pou kout bokou pli ser pou repare. Nou bezwen rod en lot fason fer dan bann tel sironstans.

La mon anvii felisit bann Lotorite parey *DRMD*, kot Mr Ernesta e Mr Daniel Cetoupe e

lekip pe fer en travay vreman eksepsyonnel. Mon pou pran sa lokazyon, pou osi felisit nou nouvo *office manager* English River. Mr Michael Mwaura, ki pe fer en travay vreman ekstraordiner e pe pran plis ki de ou trwa responsabilite an menm tan. Mon swete ki i kontinyen vin sa bonn legzanp.

Mr Speaker, mon anvii Seselwa i rezonn avek mwan lo en size kot laprev i devan nou. Pa aköz ou ti en bon kaptenn avyon, alors ou pou en bonn Sef Egzekitiv en *airline*.

Egalman, en bon direkter en *airline* i kapab vin en bon Minis, si i permet e annan sa lanvi. E en bon dokter lasante, pa neserman ki i vin en bon Prezidan pei, si i napa latolerans e krwar zis dan lasyans.

Legzanp nou bann *MNA*. Nou zis ganny elekte, par nou zabitan oubyen nomenen par nou parti. Napa en lekol spesyal, pour vin en *MNA*. Alor nou bezwen aprann ekoute e delivre pou satisfere nou zabitan. Me apre sak 5an, lepep ki pour deside si nou pou ganny re-elekte ou non. Sa i larealite lavi.

En lot keksoz ankor. Seselwa nou merit adopte en prensip, kot i byen nou dir i byen. E kot i mal nou bezwen dir i mal, pou nou amelyore e avans devan. Pa aköz ou mon

dalon, ou mon fanmir oubyen akoz ou'n siport mwan. Alors ou bezwen vin en sen e tou sa ki ou fer mon bezwen dir i byen.

Pran legzanp sa transformasyon ki'n arive dan kiltir maryaz, kot in sanze. Ozordi nou vwar bokou fanmir kase. Lontan ler ou'n marye, ou oblize anmenn ou lakrwa parey nou granmoun ti toultan dir.

Konmela zenn i dir, si nou pa konpran kanmarad e nou pe fer kanmarad mizer, plito sakenn i fer pour li. Be sa kalite transformasyon ti'n bezwen ariv dan lavi an zeneral.

Legzanp, nenport ki travayer, swa en direkter, en DA oubyen PS ki pa pe performen. Akoz ou bezwen kit li e protez li?

Mon kontan ki Prezidan in dir, pa akoz nou'n dir 'Sesel pour tou son zanfan', nou bezwen toler paresez e sabotaz. Ankor listwar i devan nou.

En parti ki ti o pouvwar pou 43an. Seselwa ti vot li *out* 2020. In menm annan en sanson ki dir, 'sa ki anler i kapab desann, sa ki anba i kapab monte'.

En lot mantalite ki nou koman en pep nou bezwen transformen. I konfyans e respe pou nou bann Seselwa ki dan bann pozisyon dirizan.

Pa neseserman politik pei, la nou pe dir *supervisor* ou *manager* dan tou sekter, enkli lotelri. En mantalite ki nou erite dan nou disan depi letan lesklavaz.

Etranze i ankor pe domin Seselwa dan nou prop pei, akoz lafot nou prop Seselwa ki pa siport sikse nou frer ek ser Seselwa. Annou aprann respe e valoriz nou Seselwa ki dan bann pozisyon kle.

Mon pou osi rekonnet, respekte, apresye rol ki mazorite nou bann artis Seselwa i zwe dan pei. Mon pou pran legzanp santer, kot zot kapab atraver sanson enfliyans, fer resorti bann mesaz for. E parfwa penn en portre vre sityasyon nou kominote e pei kot napa latansyon lo la.

Zot kapab menm ede rekonsilye en nasyon. San okenn preferans mon pran legzanp, *Elijah* i sante dan enn son sanson avek tit, 'Esper ou tour', i dir, 'serpan nepli ranpe, serpan i marse, serpan i koze, zot kriy ou zanmi'.

Sa in ed mon fer refleksyon lo konportman nou Seselwa. Akoz ler nou get konfli dan nou pei an zeneral, gran mazorite i vin par zalouzi boner nou prosen. E ipokrit - ipokrizi ki pe fer nou mazin dimal pou nou frer ek ser.

Mr Speaker, avek lazwa mon pou koz e pas lo serten

lakonplisman distrik La Rivière Anglaise.

Premye lakonplisman, se ki bann zabitan i fyer ki zot in elekte mon koman zot reprezantan. Zabitan i fyer ler zot tann mon koze. Zabitan pe kontinyen fer mon konfyans.

Me nou distrik pa perfe. Nou en distrik avek bokou positive. Me parey lezot distrik La Rivière Anglaise , pa'n ganny eparnye avek lefe bann fleo sosyal, Nasyonal e enternasyonal.

Me distrik La Rivière Anglaise politik in nepli vin en divizyon pou nou. Nou kapab koze, diskite, dyaloge, sosyalize e anmize dan linite, larmoni ek lape. Ozordi mon fyer pou mon distrik avek bann lakonplisman swivan.

Nou group Trwazyenm-az ki aktiv e solid.

Komite sorti – Komite Sport ki nou'n fek formen e plizyer lezot groupman, enkli nou group kiltirel. Anba gidan miss Solana Athanase e Mr Jean-Yve Philoe.

Nou'n vwar de proze lakaz konplete Union Vale e plizyer fanmir in ganny en lozman.

Proze *re-roofing* ex-Prison Estate ki'n konplete e delo nepli pe koul dan zorey nou zabitan.

Proze drenaz La Rosiere. Drenaz Majoie par lao *bedsitter*.

Koneksyon *sewage* anler Union Vale ek dan leo Majoie. Kot plizyer lannen zabitan ti pe espere. La nou pe travay lo koneksyon *sewage* pou Vilaz Lespwar kot in ganny neglize pou plizyer lannen.

Koltar ki'n ganny mete en pe partou dan distrik, enkli anler Quincy.

Road enlargement kot *roundabout* larantre, la devan kot Ile du Port. Ki pe fasilite trafik avek en *rock hammering*, kot zabitan i kapab fer *jogging* konmela san danze. Enkli en zoli *bus stop* pou deservi zabitan sa rezyon.

Nou kominote peser i kontan ki Prezidan in reasir nou, ki konstriksyon nou bazar i ankor lo program.

Nouvo *crash barrier* ek lalimyer ki'n ganny mete en pe partou, pour ede ekler nou kominote e plis sekirite lo semen. Mon pou profite en dir ek zabitan silvouple pa bezwen vol nou bann lalimyer, ler nou enstale lo bann poto.

Si ou vwar neseseite en lalimyer pou ekler ou dan rezyon, zis telefonn Ladministrasyon Distrik. E nou ava fer provizyon pou enstal enn dan sa landrwa partikilye.

Nou'n konplet premye faz *motorable access* anler Ma Joie. Kot en zoli miray in fini fer. Sa pou ede ki transport i ariv pli pre ek lakour, sirtou

lanbilans dan bann sirkonstans maladi.

Mon pran sa lokazyon pou dir avek zabitan. Kontinyen pran kontak ek Lotorite Distrik . Ler zot santi i annan bann pti proze, ki pou ede fer zot lavi kominoter pli meyer. Parey madanm Gilbert ti fer resorti dan *meeting* piblik konsernan neseseite en *bus stop*, kot bis vire Union Vale. La demars pe ganny fer pou konstri enn e deservi sa kominote.

Malgre tou sa lakonplisman i reste bokou ankor. Parey Semen Pti Pate, kot pou plizyer lannen ti napa volonte, ozordi mon kapab dir, *survey* in fini ganny fer.

Semen Thompson Lane, kot negosyasyon lo *wayleave* in preski fini konplete.

Road diversion lo plato Ma Joie. In la pou plis ki 10an e nanryen pa ti'n ganny fer. Ozordi bann dokimantasyon kot Minister konsernen pe ganny finalize.

Nou'n vwar neseseite *upgrade* fasilite nou *court* ek laplenn Union Vale. Kot ti'n tonm an rin e bann zanfan ti preski nepli kapab servi.

Problenm basen. *Overflow* dan bann plafon, dan plizyer bann *housing estate* enkli Vilaz Trezor i lo latab diskisyon.

I domaz ki en lenfrastruktir sitan enportan,

ki ti en aki e en propriyete Gouvernman, i nou Sant Kominoter.

Ozordi La Rivière Anglaise in nepli annan en Sant Kominoter. Akoz Ladministrasyon avan ti transfer sa propriyete lo *SPPF* e la *US* in vann ek en prive. Nou pe prezan idantifye en lot teren pour nou kapab konstrir.

Proze *pavement*, an montan semen Greenwich i osi lo lalis. Pou mon bann zabitan *Condominium* Chateau Vallon, Union Vale zot reste touzour enn parmi mon bann priyorite, kot mon pe kontinyen pouse pou zot byennet.

Mr Speaker lalis i long, malgre ki nou'n akonpli bokou pandan sa 3 dernyen lannen. Otan ki Andy Labonte i la, mon pou kontinyen pouse ki sa bann proze i ganny akonplir anba Ladministrasyon *LDS*.

Mr Speaker, avan mon terminen. Mon anvi dir ki tou zabitan La Rivière Anglaise pou kontinyen koste e fer ou prezans konte. Ou plas se zis ou ki kapab konplete. Pa les naryen vin en baryer. Vini e fer sa diferans.

Fodre La Rivière Anglaise i kontinyen reste sa distrik larkansyel, ki en vre legzanp dan Sesel kot nou kontinyen fer listwar. La Rivière Anglaise i apel nou distrik e i bezwen nou tou. Se nou ki fer La

Rivière Anglaise. Mon limero i reste touzour parey '2514821'. E mon biro i touzour baze dan batiman Ladministrasyon Distrik.

Parey Prezidan Wavel i kontan dir, "mon pou kontinyen konsantre lo travay ki annan pou fer e oubliy tou sa bann distraksyon". Mon pou termin lo menm not, parey mon ti konmanse.

Annou kontinyen annan konfyans e loue selman Senyer Bondye Papa nou kreater. Akoz se zis li ki merit ganny loue e annan vre pouvwar. Son parol e promes i reste touzour senser. Mersi Mr Speaker.

(APPLAUSE)

MR SPEAKER

Mersi Onorab. Laparol i aprezan pour Onorab Desheila Bastienne.

HON DESHEILA BASTIENNE

Mersi Mr Speaker. Bonzour Mr Speaker. Bonzour tou koleg Onorab. Bonzour tou travayer sekretarya e en bonzour spesyal tou dimoun Perseverance ki a lekout.

Mr Speaker, dan Ladres Leta Lanasyon pour 2024 delivre par Prezidan Ramkalawan, Zedi le 22 Fevriye. Prezidan i prezant avek pep Seselwa bokou keksoz pozitiv pou nou reflexir

lo la e osi bokou leson pour nou tire firamezir ki nou sey konpran son vizyon pou nou pei Sesel. Kot nou'n sorti apartir Oktob 2020.

Ki nou'n pas atraver e kote ki nou ete ozordi. Mr Speaker Prezidan in koz bokou lo positivize, ek nouvo fason fer e vwar keksoz. I le vwar Nasyon Seselwa vin pli toleran, met pozitivite dan tou sa ki zot anvizaze fer, vin pli determinen pour nou kapab anmenn nou pei lo sa semen ver plis progre.

Mr Speaker, nou parkour apartir Oktob 2020. Kot Gouvernman LDS ti pran governans nou pti pei Sesel, pa'n en moman fasil. Sa ki ti pe esper nou dan gran kontour ti soka. Miray lekonomi pei ti'n preski grennen. E sa pti bout ki ti ankor pe debout, si nou pa ti zis tenir e fer byen atansyon ki nou fer. Nou ti pour deboule nou tou ansanm e personn pa ti pou ganny eparnye.

Mr Speaker. Nou pti pei Sese, ki bokou dimoun ankor pe apel li paradi lo later, sa pei kot mon'n ne. Parey nou fame santer Seselwa, Mersener i site dan son zoli sanson patriyotik. I en pei ki'n travers bokou lobstak. Me avek en Gouvernman ki'n pran laba ranpli avek determinasyon, lanmour pou son pep ek son pei. In fer tou dan son kapasite

pou re dres nou Sesel. Ki nou tou koman Seselwa nou kontan.

Mr Speaker, i pa fasil. Tou Seselwa i konnen ki i pa ti fasil letan Gouvernman LDS ti pran pei. Parey mon'n fer sorti nou ti zwenn en miray preski fini grennen. E sa ti pa lot ki leta kof nou pei.

Gouvernman pa ti les tonbe, parey nou moto i dir. I ti travay dir, i ti al tap bokou laport pour kapab relev nou pei Sesel.

Mr Speaker, nou ti fer fas avek lepidemi COVID-19 an 2021, e nou ti kapab sirmonte. Gras a sa travay dir Gouvernman pou al tap laport pou nou ganny vaksen, kot lepep in kapab omwen ganny tou doz nesaser.

Nou'n vin viktim lager Larisi, *Ukraine*, e nou'n sirmonte. E ler nou'n fini vwar sa laklerte lo lorizon pe vin pli kler. Nou pas atraver en double dezas.

Kot nou'n vwar, nou fer fas avek lanmor, perdi nou sitwayen dan lavalas. Fanmir i perdi zot lakaz. E an menm tan, nou pei Sesel, nou pti paradi, ti fer fas avek en leksplozyon. Enkrwayab, ki koman en pti Nasyon, personn pa ti pou reve pas dan en tel keksoz parey.

Mr Speaker, sa in fer nou koman en Nasyon antre dan -

sa ti fer nou koman en pti Nasyon antre dan en dey terib.

Me avek determinasyon pep Seselwa, avek sa lespri solidarite, vre lanmour pou nou bann frer ek ser e ansanm avek tou departman konsernen nou ti koste pou vre sa zour.

Nou'n met politik, larelizyon, okenn krwayans diferans dekote. E nou'n atrap lanmen kanmarad e remet lespwar dan leker nou pep.

Mr Speaker le 7 Desanm 2023, pa pou ganny oubliye dan nou listwar. Sa ki fer nou pli fyer koman en Nasyon, sa zour nou ti vin en sel fanmir.

Prezidan in fer sorti ki dan Sesel fodre pa annan diskriminasyon. Sesel i pou tou son zanfand, i pou tou Seselwa.

Mr Speaker, ler nou dan maler napa letan pour swazir lekel ki mon pou ede. Napa letan pour rode lekel ou. Napa sa zafer ou non pa lo mon lalis. Sa mon'n rezerv pou entel, napa ou ladan.

Mr Speaker, ler nou annan konpasyon dan nou leker nou get nenport ki, ki vin devan nou. Nou antre dan nenport lakour e nou don sipor nenport sitwayen Seselwa.

Mr Speaker, ler nou koz konpasyon pou nou bann frer ek ser viktim sa leksplozyon.

Ki ti arive Sanmdi le 20 Zanvye 2024 pre kot Legliz Cascade?

Mr Speaker, vre konpasyon. Eski letan nou pran en *micro*, nou debout anba en legliz, kot en fanmir pe donn sa dernyen respe en lot son manm fanmir ki'n kit li dan sa menm letan soufrans.

Kot en group dimoun pe kriye, sante, servi bann parol lensilt, *disturb* sa prop pret, ki ti pe sey priye avek larm sa defen. Avan ki i al met li dan son dernyen demer. Eski pou nou i annan konpasyon ladan? Oli sa konpasyon ki zot prese a tou moman ki zot ganny en sans?

Mr Speaker, Lepep Seselwa fodre pa ki zot les zot ganny trennen dan bann move lenfliyans. Fodre pa ki nou les nou ganny deroute par bann dimoun iresponsab, ki'n kontribye zot menm pou detri nou pei e anmenn li dan presipis.

Seselwa annou pran nou responsabilite, annou ansanm rode ki mannyer nou pou soutenir lavenir nou pei. Kot demen nou a fyer pou rakont nou bann fitir zenerasyon ki kontribisyon pozitiv ki nou'n fer.

Mr Speaker, Gouvernman LDS i kontinyen gard son parol. I delivre lo son promes e i travay pre avek son manifesto 2020. Letan nou fer refleksyon lo bann promes,

nou vwar pou nou menm ki menm avek bokou lobstak, e atraver bokou desizyon dir, ki pa ti dan faver serten nou Seselwa. Ozordi Lepep Seselwa i temwanny bokou lakonplisman, ki'n arive dan nou pei, lo Mahe ensi ki lo nou bann zil.

Mr Speaker, bokou devlopman in ganny akonpli. Tel ki lagrandisman ek nouvo semen ki'n ganny fer pou tir trafik, sirtou dan bomaten.

E ankor sa bann tel proze pou kontinyen en pe partou dan bann distrik kot i neserer. Enkli en lot *lane* desann ki pou ganny fer dan Perseverance byento.

Nouvo Lopital La Digue, ki ozordi i an plenn servis, enkli nouvo lopital ki dan plan nasyonal.

Lekol, La Digue enkli lo Mahe. Lekol *NIHSS*, nouvo Por lo Praslin e travay lo Por La Digue ki an plenn progresyon.

Sant Detansyon lo Praslin kot a ede pou refer lavi bann zenn, e koriz e ed zot sanz zot fason viv, ki zot a reantre dan lasosyete avek en lespri plis pozitiv.

Nouvo *batch* lakaz pou bann fanmir ki'n lo lalis espere pou bokou lannen. Pou nonm enn de Cascade, St Louis, Bel Air, Villaz Basen e osi dan Perseverance.

Travay lo bann fasilite sport pe materyalize pou nou

arrive donn nou bann *sportsmen* landrwa konvenab e konfortab pou pratik zot sport.

Mr Speaker, Gouvernman pe kontinyen fer tou, pou ki pri lavi i desann e reste stab malgre laplipar nou komodite de baz i ganny enporte. Apre tou bann lobstak ki nou pas atraver, ankor lager Larisi, *Ukraine*, latak dan Lanmer Rouz. Gouvernman atraver *STC*, i kontinyen rod tou fason posib pou fer pri desann lo bokou komodite de baz.

Parmi bann promes pou fer lavi sitwayen vin pli soutenab, Gouvernman in fer ki atraver Lazans Proteksyon Sosyal, bokou fanmir i ganny soulaze dan plizyer fason.

Lazans Proteksyon Sosyal in vin avek bokou revizyon lo servis ki zot ti pe donner pour bokou lannen pase, ki ti la depi 2016.

Mr Speaker, ozordi avek kou lavi Gouvernman in vwar li neser pou pran sa bann – pour pran sa pa swivan pou soulaz bann fanmir. Tel ki ogmantasyon dan lasistans *welfare* pou manman ki pe al ganny baba, ki reste lo zil. Zanfan ki'n ganny abandonnen e osi pour sa fanmir ki pare pour pran sa zanfan pour sonnyen. E bokou lezot keksoz ankor.

Bann manman ki ekspekte plis ki en baba, ki pour sorti R1500 ki pou vin R3134 e monte ziska menm ziska R6633.47sou

Pa bliy logmantasyon dan *welfare* pou bann papa ki pe travay lo baz *casual*, ouswa ki *self-employ*. Bann *semi-orphan* e osi bann *survivor benefit* pou bann vev.

Mr Speaker, Gouvernman i fer tou pou li donn sipor ek meyer lavi son pep fir amezir lekonomi pei i fer byen. Se pour sela rezon ki i kontinyen ankouraz Lepep Seselwa ki annan laz travay, pou pran en travay stab. Annou leve e al debourye.

Letan ou pe travay ou pe osi kontribye atraver *tax* ek pansyon, kot demen ou menm ou avek ou fanmir ki pou benefisyé. Fodre ki nou arete asize e rod tou rezon si pou fye lo lasistans *welfare*.

Fodre ki nou realize ki sak sou ki nou kontribye dan lekonomi nou pei, i en pa pli devan, vers plis devlopman dan ou pei.

Mr Speaker, Seselwa i kontan travay. Annan bokou Seselwa ki anvi travay e ki pe rod travay toulezour. Me i annan landrwa travay ki ankor pe sey zwe kouk avek sa pep. Travay i ganny *advertised*. Sa aplikan i fer son *interview*, i fer tou prosedir neser.

Swa tou keksoz i fini lanmenm, i pa ganny ni en *call pour vin interview*. Oubyen apre son *interview* i ganny dir ki ou napa leksperyans.

Si en dimoun pa komans dan en travay kote i pou ganny leksperyans? Si nou pa *welcome* en dimoun e pare pour montre li travay, ki manner ou pou kapab zis li i napa leksperyans?

La mon pou demande ki Minister Lanplwa, i get enn pti pe pli profon dan ki fason sa program, *My First Job* pe deroule.

Bokou zenn 18an an montan pe rod travay e zot pe kont bokou lo sipor biro lanplwa.

Mr Speaker, nou le ki nou zenn i vin serye e zot antre dan en lanplwa. I vreman fermal letan en zenn 20an, i vin dan ou biro e zot dir avek ou, '*MNA silvouple, mon anvi travay, mon pa pe gannyen, mon pe mars partou. Partou kot mon ale, person pa le anploy mwan, oubyen zot dir mwan mon napa leksperyans*'.
'Mon al kot Biro Lanplwa e zot pa zanmen kriy mwan, ni fer en swivi pou gete ki pe pase'. Fodre nou pran nou bann zenn serye e nou ed zot antre dan en lanplwa.

Mr Speaker, ler mon lo size lanplwa, mon pou osi met sa konsern ater. Annan serten landrwa travay kot nou ganny

bokou konplent ki zot ganny abize par bann etranze. Bann etranze i kontinyen eksplwat travayer Seselwa e maltret zot. E sa en fason pour dekouraz zot kit zot travay. Zot kontinyen servi sa term, 'ale laport i ouver, etranze pe esper sa sans'.

Mr Speaker, nou Seselwa i enportan pou nou. Nou anvi vwar nou Seselwa travay dan nou pei e kontribye dan lekonomi son pei. Nou anvi kontinyen vwar nou bann frer ek ser pe debout – nou pa anvi kontinyen vwar nou bann ser ek frer pe debout devan bis *methadone* tou le bomaten. Ouswa zot pe oblize al travay avek bann *drug lord*, pou en saler, ouswa pe viv lo lasistans sosyal.

Se pou sela ki ozordi mon enplor Minister Lanplwa, pour pran nou Seselwa seye. Ekout zot leokri, al rode ki pe vreman arive dan serten sa bann landrwa travay, Mahe koman lo bann zil.

Ler travayer Seselwa i demann en *meeting*, fer *meeting* avek sa group ki'n demann ou *meeting* ki pe rod ou sipor. Pa al fer *meeting* deryer laport avek sef. Pa zot ki ti demann *meeting*.

Annou pran zentere nou bann frer ek ser ki vreman anvi travay, dan son pei, me ki pe ganny abize tro bokou. E la zot reste dan sa landrwa

travay forseman. Dan sa landrwa - akoz zot napa swa, zot annan zanfan pour sonnyen, zot annan *loan*, zot annan lezot det. E zot anvi osi kontribye zot par dan zot pei.

Mr Speaker, mon pa pour kapab mank sa sans pour koz lo *child minding*. En lot travay ankor ki vreman enportan e endispansab dan nou pei.

Mon tre konsernen avek bann lensidan ki parfwa i arive dan serten landrwa kot *child minding*. Nou pa la pour zize akoz nou pa konnen ki pase. Mon leker i al pou paran ki'n pas atraver soufrans ek tromatize. Kot zot zanfan in pas atraver serten problem.

Me mon osi konsern, i pou sa bann *child minder*, ki pe fer sa travay byen, fantastik, ki fer tou pou donn konfyans bann paran e gard zot latet anpe.

Nou pe demande ki sa *quota* 12 zanfan, dan serten *childminding* ki annan sa plas i ganny met an aplikasyon. Ou menm kot serten landrwa ki ase gran e ki zot kapab annan plis ki sa zot annan ase plas. E sa i ava ede kree lanplwa pou bann zenn ki zot la deor zot pe rod en pti travay. Mon pe osi enplor *IECD* selon rekomandasyon pou travay lo sa demann silvouple.

Mr Speaker, nou Prezidan in osi mansyonn lape ek sekirite dan nou pei. Ozordi

mon senserman remersye sa travay ki pe ganny fer kont drog dan nou pei. Mr Speaker, letan nou arive pran kontrol lo sa fleo drog. Nou zenn pour ariv lwen. Zot pou kapab angaz zot dan diferan travay.

Ozordi i malere kot nou annan artis, mizisyen, ansenyan, mason, sarpantye, plonber, kwizinyen profesyonnel, e kontab, ki'n pri dan sa fleo drog. Paran nek i soufer an silans.

Silvouple, annou liber sa bann zenn zonn ek fanm. Les zot delivre dapre zot talan. Si nou tou nou korpere pou ede anmenn sa lalit kont drog, nou pou vwar en gro diferans dan nou pti paradi.

Bokou dimoun i konplent lo sa fleo, i dir i pa dormi ek tapaz, ek tou sord lezot konplent zoure, lager. Me kan en *raid* i arive, se li menm ki zoure, sot anler, konplent plis. E i menm pare pour li al lager ek sa bann zofisyé.

Mr Speaker, eski prezan nou pe demann avek Gouvernman pou met en lanons lo radyo ler pour annan en *raid*? Lo televizyon, pour dir avek bann manman, anmas zot zanfan anba laz ki lo semen piblik 8 er diswar? Anmas bann zanfan anba laz ki pe frekant dan bann kan drog? Eski nou bezwen anvoy en mesaz pou sa bann manman avek pti baba dan

lebra pou rantre dan zot lakaz boner? Akoz pour annan en - byento pour annan en *raid*.

Tou dimoun ki pe fer sa bann tranzaksyon illegal. Eski nou pour bezwen dir zot anmas zot bann komodite akoz demen pour annan *raid*?

Ou ki fatige konplent, ou ki pe *call* Lapolis. Eski koumsa ki oule lalit kont drog i marse? Eski sa i a vin nouvo fason fer? Be si nou korpere e pran nou responsabilite, nou zis konplent byensir nou pou *fail* e nou pou perdi nou bann zenn.

Zanfan pour napa papa, ni manman e byento akoz drog. I pour osi napa ase kontribisyon dan lekonomi pei. E la nou pour vwar laz sekirite ek pansyon kontinyen ogmante. Akoz pour napa ase lafors travayer, ki pe kontribye dan nou lekonomi.

Mr Speaker, ler mon nonm kontribisyon anver lekonomi pei. I osi enportan ki nou pa ferm lizye lo gaspiyaz ek bann depans initil ki pe arive dan serten departman. Si nou arive elimin gaspiyaz ek depans initil, ankor nou lekonomi pou stabilize. E nou menm demen ki pou benefisyè.

Gaspiyaz i dan tou sord fason, e la mon dir ki in plis ki ler pou mentenir lord avek sa bann transport Gouvernman. In ler pou pran *GPS*, lo bann

transport pli serye, *mileage*, kontrol lo kupon *fuel*.

Transport Gouvernman i sipoze kot son biro apre travay e osi dan *weekend*. Transport Gouvernman pe ganny servi plis pou tranzaksyon personnel, piknik, maryaz, parti, ek plizyer lezot kours.

In ler pou met en *stop* avek sa bann gaspiyaz. Transport Gouvernman pa sipoze lo semen piblik pe monte desann dan *weekend*, si napa nanryen pou fer avek travay.

Lekel ki pe pey sa bann *fuel* e osi servis lo sa bann transport. Ouswa pey garaz letan transport i kase? Pa sa bann departman konsernen. Annan dimoun ki annan son prop transpor prive, i *park* kot li e tou son tranzaksyon i dan transport GS. Nou'n koz lo la plizyer fwa. Me malerezman i ankor pe arive ozordi.

Mr Speaker, trenn lipye dan bann landrwa travay i ankor pli gro boubou dan nou Gouvernman. Pa reponn telefonn, pa reponn ou *email* i ankor en gro problem. Sa i kree gro retar dan devlopman en pei. Travay malis pe vin en pasyon pou serten.

Labi dan serten departman, kot parfwa in menm arive kot dan en Ladministrasyon zot *travel* an group. I al *CEO*, i al son *deputy*, i al son *IT*, i al

compliance officer. Tousala i *travel* ansanm? Lekel ki reste deryer? Lekel ki ansarz biro pou siny dokiman?

Ler Gouvernman i dir, Sesel pour tou son zanfan, sa pa vedir nou fer sa ki nou le. Akoz nou ki pour deside kan pou large e ziska kan nou pou sere.

Mr Speaker, Gouvernman dan son Ladres in dir annou travay ansanm pour en sel Sesel. Annou ini, annou atrap lanmen kanmarad, annou anmenn linite pou nou kapab detri divizyon.

Pou sa arive, fodre ki nou sanz nou move fason fer. Annou tir malis dan nou leker, dan nou vwazinaz e dan nou landrwa travay. Met retar dan tou keksoz i pa pour fer zistis. Letan en dimoun i tap nou laport. Savedir i bezwen en servis.

Nou swazir pou nou reste dan sa Gouvernman, pour nou kontinyen nou travay. Alor annou vin travay avek tou lonnekte. E annou pare pou met nou dan soulye en dimoun letan i debout devan nou. E i a pe rod en servis avek nou.

Letan ou rann servis ou ser ou frer, ou travay prop e ou delivre koman fodre. Aswar ou pou kapab dormi byen.

Mr Speaker, parey Prezidan in admet, nou ankor

annan bokou pou fer e ansanm letan nou vin avek en lespri konstruktiv. Nou kit politik popilis an deor nou distrik ek an deor nou travay, nou pou bouze. E nou pei osi i pou bouz ansanm.

Ler nou dir ki fodre nou kit politik an deor. E ansanm nou ralye pou fer ki nou distrik i bouze. I donn mwan sa gou pou koz lo nou distrik Perseverance.

Mr Speaker, mon pa pou zanmen manke poudir mersi Minister Ferrari atraver *SFA*. Pour ekout nou lavwa, pou donn en pti bazar pour bann peser, ferme ek vander legim dan Ile Perseverance.

Nou ti a osi swete ki bann peser dan Perseverance, zot osi zot ganny enn pti stor, pour zot bann lekipman ki kontinyelman pe ganny vole. E ki en landrwa apropiye pou stor pwason ki pa fini vann aswar.

Proze dan Perseverance pe komans demare. Lotorite Distrik 1 ek 2, ansanm nou'n *set* en target ki par premye kar lannen 2024 nou pour vwar enn de pti proze pe komans demare.

Dan Perseverance 2, avek siport *DA Nicole*, distrik in pouse pou *upgrade* sa *court basketball*. E osi ganny en *changing room* ek fasilite twalet. Sirfas koltar in fini mete e byento demarkasyon lo

court pe al ganny fer. Enkli lenstalasyon lalimyèr, kot nou bann zenn a kapab *train* ziska en pe tar.

Playground dan Perseverance 2 in ganny en kiosk, ki a deservi paran letan zot vin avek zot zanfan lo *playground*.

E byento *playground* osi dan Perseverance 1 ek 2 pou ganny nouvo zouzou. E osi nouvo fason dekore.

Mr Speaker, nou espere ki nou a ganny sipòrt lakominote pou gard sa landrwa prop e gard li an bonn eta. E dan sa nouvo leta, ki i a ganny aranze apre tou sa landrwa pour vin pour zot zanfan epanouir.

In annan proze nouvo *bin site*, dan tou lede distrik ki'n aport en pe plis lord dan fason depoz salte. Ankor proze *bin site* i lo lalis. E an menm tan nou pe esper deplasman enn de *bus stop* ki tro pre avek lakaz zabitan ki pe kre serten lenkonvenyans.

Mr Speaker, nou pou osi byento vwar lenstalasyon de *beach soccer pitch*. Enn dan Perseverance 1, ek lot dan Perseverance 2, pour nou bann zenn ki annan lentere dan sa sport.

Kot zot a kapab fer zot *training* dan distrik e profit plis, devlop zot talan. Nou annan en zoli plan lo en *outdoor gym*, ki pour deservi

zanfan koman adilt, enkli ankor lezot fasilite legzersis modern.

Proze pou en *indoor gym* ki pou deservi zabitan Perseverance osi i lo nivo nasyonal. E osi lo nivo nasyonal i osi dan plan. E la nou dir mersi Sir Riazè pou apros distrik, kot nou ti ansanm, nou ti asize pour fer diskisyon lo sa proze avek DA Aaron.

Mr Speaker, i vreman fer distrik bokou dibyen letan nou ganny zabitan ki vin avek bann plan pozitiv. Parey Sir Riazè ek Sir Emmanuel, ki touzour pare pou avans devan, pou anmenn bann bon lide, pou byennet bann zenn dan Ile Perseverance. E osi Mr Andrew, ki'n montre son dezir pou anmenn petank ver zenn Perseverance. Tousala se bann *sportsmen* ki oule devlop pozitivite dan nou bann zenn e dan nou distrik.

E mon asire ki enn fwa ki nou bann fasilite sport, i konplete. Nou pou ganny ankor bann dimoun tre pozitiv, ki pour vin devan pou vin devlop plis bann talan dan Perseverance.

Mr Speaker, pou en bon pe letan zabitan Perseverance pe esper en fasilite ATM. Parmi bann devlopman ki mon ti anvi vwar arive dan Perseverance, se fasilite ATM. E i annan de labank ki'n

montre lentere pou donn servis zabitan, enkli lezot dimoun ki pas atraver nou distrik. Alor mon le fer zot konnen ki proze *ATM* pe vini tre byento.

Proze lalimyer *solar* dan Perseverance pe travay lo la. Wi mwan avek *CEO SIA* nou'n fer en vizit e nou'n vwar tou sityasyon problem lalimyer.

I annan en travay tanporer ki pe al ganny fer pou anmenn lalimyer dan Perseverance. Antretan ki nou atann nouvo lalimyer *solar* ariv dan pei.

Mr Speaker, parey Prezidan in mansyonnen dan son ladres. Nouvo Stasyon Lapolis tre modern pe al demare, e Sant Kominoter pe al lo *tender*.

Proze ki nou'n byen kontan ki'n anmenn lazwa dan nou leker se proze lakaz sa 16-*unit*, ki'n swiv par sa 24 ki pre pour pare. Mon dir i en proze ki nou'n byen kontan akoz a de repriz mon ti demann Minis pour Labita lo konstriksyon plis lakaz afordab dan Perseverance. E i ti dir ki pa pour lemoman.

Ozordi mon dir mersi Minister Labita pour rebran konsiderasyon pou fer sa de proze lakaz. E ozordi Gouvernman in kapab ganny sa 16-*unit* pou soulaz bann fanmir ki'n viktim sa leksplozyon le 7 Desanm

2023. Kantmenm zot la pour en peryod tanporer, mon pour zot *welcome e feel at home* dan Perseverance.

Mr Speaker, mon osi dir en gro mersi zabitan ki'n fini ganny zot let pou antre dan zot lakaz. E ki'n korpere avek Gouvernman pou ed sa bann frer ek ser ki ti dan problem. Zot pasyans pou anmenn plis lazwa dan zot leker letan zot pou a lafen ganny zot lakaz ki zot in espere.

Proverb i dir ki pasyans i geri lagal. Sanmenm sa ki nou apel vre konpasyon. Mr Speaker, avan mon terminen mon le dir en gro *welcome* Onorab Anne Bistoquet.

Pour nou dan *LDS* nou'n toultan e pour toultan krwar dan liberte swa en dimoun. Nou pou toultan *welcome* en zanfana Seselwa, ki santi son fitir ek son sel opsyon i dan Gouvernman *LDS*.

Laport pou toultan reste ouver pou sa ki le sorti. E egalman pou sa ki pare pou vin zwenn nou e vin donn son siport dan sa travay pou nou pei. Parey dimoun i lib pou sanz lenz lo zot, pour met sa ki pli bel.

Sa ki pare pour zot sanz lakaz e al dan ki pli konfortab. Sa ki le sanz son landrwa travay e al dan enn kot i krwar i pou pli byen prospere. Aprann en lot fason fer. Alor i osi bon note ki dimoun ozordi

i lib pour sorti dan en parti politik e al siport en lot parti ki fer li plezir.

Sa byen lontan pe arive. Partou dan lemonn, pa zis dan Sesel. Mwan mon konn en kantite dimoun ki'n sanz parti politik parey son lenz lo li. E mon napa problemm pour sa.

Cross the floor, lontan pe arive, pa fek konmanse la 2024. Seselwa, in ganny son liberte pou li dir sa ki li i anvi, ler i le, ler i fer li plezir.

Alor i pa en leksepsyon pour nou koleg Onorab Anne Bistoquet e ni pour personn ki deside zwenn *LDS*, nenport ler. Nou isi lo sa kote latab nou dir avek Onorab Anne Bistoquet. Mersi pour vin donn nou lanmen fer sa travay pozitiv pou nou pei.

E si ou kapab anmenn ankor enn pti pe plis, pa ezite Onorab. Anvoy sa bann bon mesaz laba deor pour sa bann ki ankor pe espere. Ankouraz zot pour vin zwenn nou e ansanm nou pour zwenn dan sa travay nob. Mersi.

(APPLAUSE)

MR SPEAKER

Mersi. Mersi Onorab. Onorab Pillay ou napa laparol. Ou'n fer ou *speech*. Napa rezon pour *matter of privilege*, napa rezon pour *point of order*. Permet lezot fer zot *speech*.

Laparol i pour Onorab Audrey Vidot.

HON AUDREY VIDOT

Mr Speaker, tou Manm Onorab sekretarya Lasanble, zabitan Roche Caiman e tou manm piblik ki a lekout. Bonn apre midi.

Mr Speaker, malgre tou lesey pour anpes diskour Dirizan Lopoziyon pas lo Radyo *AM*. Dimoun in tann li, atraver stasyon televizyon e menm sours rezo sosyal.

(APPLAUSE)

HON AUDREY VIDOT

Atraver ou Mr Speaker. Mon le fer resorti ki fodre Onorab Georges ti pas, ti asiz dan sa sez koman Dirizan Zafer Gouvernman pour rekonnet ki dan *US*, nou annan bann fanm kosto, bann madanm konpetan pour kapab reprezant Sesel.

Akoz ler Mrs Marie-Antoinette Quatre, ti asiz lo sa sez ki Onorab Georges pe asize ozordi. E ler i ti reprezant Sesel koman *Ambadress*, napa kalonmni ki zot bann Dirizan *LDS* pa ti zete lo li.

Alors atraver ou Mr Speaker. Avan ler vin koz pozitivite, linite. Onorab Georges i osi i bezwen rod en laglas. Si *LDS* i kontan zwe sa rol plak anba po fler dan Lasanble, nou dan Lopoziyon

nou pou dir, nou pour kontinyen kritike kot i fodre. E nou pour kontinyen fer travay ki Lopozisyon i annan pour li fer.

(APPLAUSE)

HON AUDREY VIDOT

Dan son diskour lo Leta Lanasyon, Prezidan Larepublik ankore enn fwa in rat sa sans pour souliny bann fakter loportinite e benefis pour amelyor byennet nou pep.

Seselwa pe eksprim zot fristrasyon anver sa diskour. Akoz i klerman montre inefikasite Ladministrasyon LDS, pour elev standar e soutenabilite devlopman imen ek lasante nou pep.

Sa diskour delivre par Prezidan Larepublik Zedi pase, napa merit. E napa nanryen konkret ladan. In plito bann pwen ki'n met Seselwa an dout e poz bokou kestyon. Zeneralman in zis en repetisyon sa bann keksoz ki'n deza koz lo la dan son Konferans Lapres.

Alors si napa nanryen i ti annan zis pour reste UAE, e anvoy en let e enform Speaker Lasanble. Akoz la pa la, i kler ki Prezidan pa konnekte avek son pep.

(APPLAUSE)

HON AUDREY VIDOT

Mr Speaker. Dan sa 4an Seselwa in fatigue tann

Prezidan Larepublik vin delivre en diskour ki ranpli avek lipokrizi. Sak fwa i vin adres nou Lasanble i pres en kantite parol, ki li menm i pa kapab met an pratik.

I kontinyelman demann Seselwa pour koste e gard lespri rekonsilyasyon ek linite. Me apre ki nou vwar e tande lo medya?

Prezidan kot i denigre pep Seselwa dan son bann Konferans Lapres. E zis sa diskour semenn pase, in menm senm plis divizyon parmi nou pep.

Ler en Manm Lasanble LDS ki osi Deputy Speaker, nou lenstitisyon i mont lo medya sosyal e adres en sitwayen konmkwa i pe pas koman en nwizans. Oli sa lespri pozitivite? Oli sa lespri linite?

(APPLAUSE)

HON AUDREY VIDOT

Mr Speaker, Seselwa i en Nasyon entelizan. Mon'n deza dir isi menm dan sa Lasanble. Ki i pa akseptab pour en dirizan pran en lapros lipokrizi. Ensilte dimoun, e kontinyen fer en bann deklarasyon ki pa ni menm fonde. Zis pour sey anbet latet dimoun.

Avan ler Prezidan Larepublik i vin donn nou Lepep Seselwa leson. Sirtou lo konsekans pourswiv

Gouvernman. Akoz i pa pran responsabilite ek aksyon son Ladministrasyon pli serye. E mazine konsekans zot aksyon pou evite annan neglizans ek fristrasyon parmi sitwayen. Akoz se sa ki fer sitwayen napa swa me al rod rekour devan Lakour.

Mr Speaker, sa 7enm Lasanble pe al servi son 4enm lannen dan en manda 5an. Seselwa in vwar mannyer bann Manm LDS in les zot tonbe avek en Ladministrasyon inefikas.

In fini pran lapant dan en ranpar e pour finalman realize ki zot ti bezwen al fer en kour dan *leadership*. Antretan sa ki pli bezwen kour *leadership*, pe enterfer dan tou keksoz e oule kontrol tou pti detay dan son bann Minister.

Mr Speaker, Ladministrasyon LDS i kontinyen demann travayer Seselwa pour fer sakrifis e pran zot responsabilite. Me sa ki enteresan, ler in ariv ler pour rekonnèt travayer Seselwa, tou bann prensip ek promes SNP, LDS i aplik zis pour bann Dirizan LDS. E sa manifesto ki LDS i koz lo la i mars en pwa de mezir pour satisfèr enn pti group zanfan Sesel.

Zis pran legzanp, ler i ti dir pour met larzan dan pos Seselwa. Kot apre nou'n vwar logmantasyon *allowance* bann

Minis in vin avan e kot LDS, en letan kot LDS pe kriy leokri kof vid.

Si mon pou servi parol Onorab Bastienne, kot tou ti difisil sa letan. Ler Ladministrasyon LDS ti pe ranpli zot pos, pe pran tou sa ki apel pour zot, lo ledò sakrifis travayer Seselwa ki pa ankor kapab ganny en logmantasyon ziska ozordi.

Eski LDS ti pe fer pli byen? E person lo lot kote latab pa ti vwar labi li ledò zonm ek fanm ki pe leve travay dan Sekter Prive e pa ankor ganny okenn logmantasyon.

Ler LDS ti pe rod vot, zot ti bliy sa zoli parol ki zot Prezidan ti dir, kot pour donn travayer en gratwite lafen lannen parey politisyen.

Mon redir Seselwa i en Nasyon ki entelizan e Seselwa in ganny byen mesaz Prezidan ki *one size fit all*, i nepli bon pour aplike.

(APPLAUSE)

HON AUDREY VIDOT

Ladministrasyon LDS i prefere donn 13enm mwan lapey lo baz performans. Mr Speaker, koman mon lo sa size 13enm mwan. In fer mwan vin lo tretman ki bann travayer Seselwa IOT in gannyen avek Ladministrasyon LDS.

Ou sa travayer IOT ki pe leve, debourye pour

Gouvernman benefisye dan sa 40poursan par. Ladministrasyon LDS pa'n kapab donn zot tou Seselwa 50poursan zot 13enm mwan lapey.

I annan menm konnen ki manner in ganny kalkile pour li kapab ganny sa 13enm mwan. Lalwa i ganny aplike zis pour en bann ki ganny 13enm mwan.

Selman Ladministrasyon LDS, pour triye lekel ki pou gannye e lekel ki pa pou gannye.

Sanmenm sa Sesel pour tou son zanfane? Eski sa menm sa pa les tonbe, ki bann MNA LDS pe pran laglwar kriye lo en diskour ki napa merit e pa ni menm adres soulazman sa bann travayer IOT.

Pa fini la Mr Speaker. Sa logmantasyon R10mil pour nou bann dimoun aze ki zot ti anbete pour ganny vot. Sa kantite dimoun ki pe mor ozordi, zenn koman vye.

Oli lespwar pour nou bann travayer ki pe travay lebra kase ozordi? Pour ki ler i ariv son laz retret e ki pour li tous en larzan sekirite ek pansyon, ki permet li viv an bonn sante byen trankilman, ziska son dernyen zour.

Mr Speaker, wi atraver ou. Onorab Bastienne, si Ladministrasyon LDS i annan larzan pour Legzekitiv monte desann aletranze avek bann

gran delegasyon. Sey dir nou kan ki bann travayer Seselwa parey Brass Band Sesel pour ganny loportinite al aletranze pour kapab elev zot konpetans zot osi?

Sa group travayer ki'n vin performen dan nou Lasanble Zedi pase, ankor pe esper zot Scheme e lezot loportinite.

Prezidan i oule felisit brass band pei zanmi. Selman kot i konsern sa ki pour nou Sesel ankor pe espere e ganny anvoye demen tanto. San menm sa ki zot dir zot pa pour zanmen les tonbe zanfane Sesel e zot pe fer pli byen.

Mr Speaker, konman en Manm Elekte, i mwan devwar e mon responsabilite pour montre Prezidan Larepublik ek son bann koleg Minis e son bann Manm Lasanble Nasyonal LDS vre Leta nou Nasyon.

Akoz i paret ki zot ankor dekonekte avek pep Seselwa e menm pa konnen ki pe pase otour zot. Permet mwan ilistre ki pe pase dan nou kominote ozordi, e ki bann konsern ki zabitan mon distrik Roche Caiman in dir, ler mon pas kot zot lakour.

Zabitan ki reste Brillant. Tou dilon ziska kot semen GS Pillay, ankor pe esper sityasyon pour adres problem delo monte kot lanmar, problem drenaz e

resirfas semen. La ki semen in fini ganny konplete, adrese lo *roundabout* Plaisance tou dilon Roche Caiman.

Dan nou bann *housing estate*, rezidan pe ganny demande pour pey zot lakaz e gard li byen dan bon leta. Selman larzan – sa lazans pa pe pran responsabilite o serye. Sa kantite letan ki zot pran pour kontrakter adres defi i pa akseptab. Espesyalman dan bann nouvo flat ki fek konstri. Sa lazans ki sipoze pe travay pros avek kontrakter pour asire ki louvraz i ganny fer byen, dan en dele letan rezonnab. Akoz i pa akseptab pour en paran tousel, ki pour li fer de bout zwenn. Vwar li pe pey son lozman, e vwar li bezwen pe depans plis. Akoz kontrakter, louvraz pa pe ganny fer dapre i sipoze e dapre lagreman.

Problenm drog ek lalkol dan kominote, zabitan i tre konsernen ek sekirite zot fanmir e menm zot lakour. Sa ki ti dir i annan lalis bann trafiker, i deza annan dyalog avek zot, in donn zot *warning* final dan isi menm, dan nou Lasanble. Akoz sa bann menm dimoun ankor pe detri nou kominote? Sa kantite 100 zour ki'n pase dan sa 3an, nou ankor pe esper rezilta sa stratezi pour adres sa fleo drog dan nou kominote.

Mr Speaker, zabitan Roche Caiman i konsernen lafason ki serten dimoun i depoz zot bin salte – zot salte kot bin. Bann zabitan i sizere ki lazans ki zer salte, ansanm avek Lotorite Distrik i bezwen rod meyer fason pour travay avek bann zabitan e edik zot lo lafason pour pli byen depoz zot salte, dan en fason pour ki bann ki reste pli pre avek bin pa ganny afekte.

Bann zabitan i demande osi, ki bann bin i ganny retire toulezour. Akoz ozordi i pran tro bokou letan.

Mr Speaker, lazenes Seselwa i dan mon leker. Bokou zenn pe obzerve byen ki pe pase dan nou pei ozordi. Ler zenn pe leve debourye me pa ankor ganny sipor, partou laport kot zot tape pe demann zot pour met angaz en propriyete. An realite zot napa. Ouswa pe rod en lenvestiser pour sipor li. Kot nou konn tre byen avek klima politik Sesel ozordi, i pa fasil pour nou bann zenn.

Zenn ankor pe demande oli loportinite pour zot anba Ladministrasyon *LDS*? Zot tann Minis koz zoli parol. Me an realite zis en group ki pe vwar zot pe ganny benefis.

Dan mon distrik Roche Caiman, nou annan zenn ki ankor pe monte, desann pour rod louvraz. Menm si nou pe fasilite zot avek bann lalis ki

sorti kot Biro Lanplwa. Menm mon lofis ki pe fasilite zot pour refer zot CV, ed zot ranpli zot form laplikasyon.

Ler zot anvoy kot bann lorganizasyon ek biznes. I annan menm napa ni sa lardyes pour anvoy zot en repons, ouswa zot ganny dir ki zot in fini anploy en dimoun.

I regretab ki wi, parey Onorab Bastienne in dir etranze ankor pe okip bann travay ki Seselwa i kapab ganny fer.

E ler sa zenn pa pe ganny loportinite lanplwa mannyer i pour kapab donn siport paran kot lakour? E ler sa paran i tap laport pour rod led, i ganny dir ki i pa kalifye pour li ganny led. E i dekourazan pour sa paran fer rapel.

I annan paran ki soufer bokou plis ankor. Ler son zanfan ki'n fini en santans e pe osi pe ganny difikilte pour li kapab ganny en louvraz. Akoz kot landrwa travay, pa pe aksepte zot *Police Character Certificate*.

I regrete pour vwar sa bann zenn retourn dan bann aktivite anti sosyal e repet bann lofans. Akoz zot pa pe ganny sa siport e gidans nesaser. E sa paran ek kominote, i soufer bokou plis ler keksoz pa pe marse pour ed sa bann zenn ganny en travay e vwar zot pe vole.

Mr Speaker, mon pour dakor avek Dirizan Lopoziyon, ler in dekrir mannyer nou sistenm ledikasyon pe regrese. Lekol i ganny promet pour ganny larzan renovasyon. I ganny mete dan Bidze. Larzan pour kapab repar lekol. E ziska ozordi nou pa kapab vwar lekol Plaisance Segonder ganny sa bann renovasyon lenfrastruktir ki i pe demande.

Ansennyan ankor pe esper konstriksyon nouvo lespas, pour kapab travay osi byen lekipman pour zot kapab fer pli byen zot louvraz.

E dan libreri lekol, sez pour etidyan servi napa. Napa ase nou vwar zenn pe debout. Selman sa enn anvil i pe ganny byen meble.

Mr Speaker, en mo ki Prezidan Larepublik i kontan mansyonnen, me an realite i pa pe met li an pratik. Sa se pa lot ki konsiltasyon.

Sa Ladministrasyon LDS, in pran en lapros, en lapros larogans ki li la. Li ki poudir ki pour fer, li ki pe *rule border*. E pran desizyon iresponsab kot ler Seselwa i anvoy lavwa, se la ki Prezidan ek son bann Minis i taye pour vin eksplike akoz tel desizyon in ganny pran.

Zis pran legzanp partisipasyon Sesel dan sa zafer *Red Sea*. Konmsi nou pa'n ase ganny ase anbarase avek komanter Prezidan kot in

ensilte e fer kanmi nou bann pei zanmi, dan larezyon.

La nou bezwen al rod lager avek bann pli gro pei ki fasil pour kapab detri nou. E nou pep i kontinyen vin zavioron milye, tou sa bann aksyon, en Ladministrasyon iresponsab.

Menm zafer i aplike dan mon distrik Roche Caiman. Depi ler Lotorite Distrik in demande pour annan en konsiltasyon avek kominote, ek bann bazardye ki pe vann Roche Caiman, konsernan plan re-alokasyon bazar. Ziska ozordi, personn pa ankor kapab fer konsiltasyon.

Depi ki serten lazans lo dernyen minit ti enform Lotorite Distrik , ki zot pa pe vin fer *meeting* konsiltasyon. Zis de trwa mwan pli tar, Lotorite Distrik , i vwar kontrakter pe koup pye dibwa e pe fouy trou pour met debout bann poto paviyon.

Sa ki fer sa Ladministrasyon pli malonnet Mr Speaker. Manm piblik ek Lotorite Distrik , i konn desizyon Gouvernman ler en Minis i pas dan en reportaz *SBC* dan *Nouvel*. Ki son Ladministrasyon in sanz nide, ki pour fer dan sa zarden dan distrik Roche Caiman. Ankor tou sa i montre nivo mank respe pour sa kominote e Lotorite sa distrik. Zis pour fer

en pwen, se zot ki pe *rule border*.

Mr Speaker atraver ou les mwan fer rapel Onorab Georges. Ki *boycott* tou levennman nasyonal enkli eleksyon pour 5enm Lasanble ti komans avek *SNP* ki ozordi i *LDS*.

(APPLAUSE)

HON AUDREY VIDOT

Si nou kontinyen annan dirizan ki bliye ki i ti dir yer e fer tou le kontrer ozordi. Ki mannyer nou espekte nou sitwayen pour krwar e annan konfyans dan zot?

Si sa dirizan pa koz laverite e i akiz sitwayen konmkwa i lalang. Oli lespwar pour nou pep avans pli devan anba Ladministrasyon *LDS*?

Larepons i senp. Napa Mr Speaker! Zis fer en pti letour dan lavil, Seselwa zis i devid son fristrasyon. E regre ki zot in vot pour en sanzman Gouvernman.

(APPLAUSE)

HON AUDREY VIDOT

Sakenn. Sakenn Mr Speaker, i plenny son problem. I annan dimoun i dir. I pe zis demande ki annan ankor en pti pe pasyans, tolerans. E ki met i donn li lasante pour ki sa gran zour i arive, pour tir li dan bwat vote 2025.

(APPLAUSE)

HON AUDREY VIDOT

Mr Speaker, partou kot ou pase, dimoun i dir ou i pe priye pour li ganny son lasante. Malgre bokou defi nou sistenm lasante, nou konpran e rekonnèt ki tou nou bann travayer dan sekter lasante pe fer tou, pour zot kapab donn sa bon swen e servis.

Me lefe i reste ki sa Ladministrasyon, i annan ankor en kantite travay pour fer pour nou kapab elev nou sistenm lasante ozordi. E konpetans e byensir byennet *welfare* travayer lasante.

Mr Speaker, napa enn ant nou ki dan sa Lasanble ki kontan pour kritik nou sistenm lasante. Akoz nou tou nou servi, nou fanmir i servi.

Me kote nou vwar i annan lespas pour amelyore, nou bezwen koze. Nou bezwen anpese ki travayer i ganny blanmen pour neglizans. E ki pasyan i ganny son swen neserer pour li viv pli lontan posib, avek zot fanmir.

Nou bann profesyonnel e lezot kad travayer lasante, i bezwen pe kapab, pe travay dan en lanvironnman ki pli konfortab e konvenab pour donn sa servis pasyan.

I pa akseptab pour travayer lasante travay dan en batiman kot renovasyon fek

fer. Selman tou sa larzan ki ganny depanse lopital i ankor koule. *Come on!*

Nou pa kapab kontinyen vwar larzan *taxpayers money* pe ganny gaspiye. Ankor lekel ki pe siperviz sa bann proze pour asire ki travay pe ganny fer dan standar?

Mr Speaker, pour konklir mon lentervansyon. Leta nou Nasyon i vreman sonm. Nou pep pe viv anba en opresyon sosyal e ekonomik. Nou pep pe soufer anba sa Ladministrasyon *LDS*.

Lakantite fanmir ki pe sey tou zot mye, pour zot sirviv i enkrwayab. Petet mon bann koleg lo lot kote lata. Ansanm avek zot Prezidan ki pe *rule border*, pa ni vwar soufrans sa bann fanmir kantmenm zot annan en lizye. E zot pa ni tann leokri mizer, kantmenm zot annan zorey.

Zot senpleman napa konpasyon pour pep Seselwa. Tou fason Msye Speaker, lepep i in fatige note. Zot pe esper 2025, pour tir li o pouvwar.

(APPLAUSE)

HON AUDREY VIDOT

Wi Onorab Labonte. Nou rekonnèt, ki sa ki anler i kapab desann.

(APPLAUSE)

HON AUDREY VIDOT

E 2025 i pour desann.

(APPLAUSE)

HON AUDREY VIDOT

Akoz mazorite pep Seselwa pe dir viv *US!* Sel opsyon pour Sesel! Mersi Speaker.

(APPLAUSE)

MR SPEAKER

Mersi. Mersi Onorab. Nou a pran poz an se moman la. E nou a rebran repons 2er apre midi.

(BREAK)

MR SPEAKER

Bonn apre midi tou dimoun. Nou a rebran deba. Laparol i pour Onorab Michel Roucou.

HON MICHEL ROUCOU

Mersi Mr Speaker. Bonn apre midi *a tous* tou koleg Onorab. Bonn apre midi tou dimoun ki pe ekout nou. Espesyalman zabitan Mont Fleuri.

Mr Speaker, avan mon pran mon *speech*, mon le zis pran en pti moman letan pou mwan swet *ex-MNA* Mont Fleuri, Minis Ferrari en Zwaye Laniverser. Mon swete ki i a pas en bon zour ozordi. Mersi.

(APPLAUSE)

HON MICHEL ROUCOU

Mr Speaker, Ladres Prezidan pour sa lannen, in vreman tous bokou nou. Akoz in met an perspektiv realite pei li menm li. Ki direksyon nou pe ale. E kwa egzaktman ki lepep i ekspekte.

Ler mon'n asize Mr Speaker, mon'n ekout bann larestan Manm, espesyalman Manm lo lot kote latab. In fer mwan mazin lo bokou devlopman keksoz pozitiv ki'n arive dan nou pei.

Malgre ki pa bokou ki rekonnet sa. E i montre ou poudir zis dan sa 3an ki'n pase, ki zistans ki nou pei in kapab arive.

E ler ou pe get lo kote devlopman Mr Speaker ek bann keksoz pozitiv, ki malgre ki Lopozisyon pe dir ki zot pa vwar. Ozordi avek leokri ki ti annan, annou zis get nou laliny enternasyonal aeryen, *Air Seychelles*.

Ozordi nou vwar poudir *Air Seychelles* i ankor pe *fly*, i ankor pe anvole. Apre ki nou ti vwar poudir sa *airline*, nou *airline* nasyonal, ki ti vwar li dan en sityasyon kot pei li menm li i ti riske vwar kot nou ti pou perdi li.

E sa osi tou in ede pou kit bokou nou bann Seselwa, ki i annan zot lanplwa laba. E tousala se akoz Mr Speaker? Akoz nou annan nou en *Leader* ki egzantpler, ki annan li en lasazes Mr Speaker. Ki

kapab ozordi i gid nou pei pli devan ankor.

Lezot ankor. Lekol *NIHSS* ozordi. En *building* dan mon distrik ki ti'n ganny abandonnen. Ki ti zis la, ti en *eyesore*. Ozordi ler ou pase, si ou pou montre dimoun ki pa konnen, portre ki mannyer sa lenfrastruktir ti ete, i pa pou zanmen konnen.

E Mr Speaker, i annan bokou lezot ankor legzanp ki mon kapab donnen. *Library* Nasyonal. E, avan, avan mwan mon'n tann Onorab Vidot pe koze, lagrandisman semen Roche Caiman. Tousala i bann lakonplisman ki Gouvernman li menm li in anmennen, pou fer sir ki tou distrik. Nou pa gete lekel? Ki bor? Lekel ki son *MNA*? Nou travay ek tou distrik.

Sa Gouvernman i fer sir poudir i donnen Mr Speaker, pour ki i anmenn sa devlopman ki pour benefis son pep.

Mr Speaker, dan Leta Lanasyon, Prezidan li menm li in tous lo plizyer bann bon pwen. Ki mwan mon'n kapab asize, analize e get en pti pe pli o paravan. Nou pe gete ozordi se ki, nou annan nou en Gouvernman ki pa pe mazin zis politik, eleksyon. I pe get an alan, pli devan ankor.

Ki demen bann ki pou vin apre nou, ki zot osi zot a kapab benefisye avek bann keksoz ki

nou ozordi, nou pou travay lo la. I bann keksoz vreman pozitiv.

E ozordi Gouvernman pe koz lo kote responsabilite. Wi, in ariv en ler kot nou *as* bann *Leaders*, nou bezwen konmans edik nou pep kot zot bezwen pran serten responsabilite.

Ler nou pe koz lo kote responsabilite Mr Speaker, nou pe mazin bann responsabilite personnel. Nou pa kapab ozordi, kot nou kapab fer krwar avek en dimoun poudir se ki tou responsabilite, se ki Gouvernman ki bezwen pran.

E nou bezwen edik bann fanmir, bann travayer, bann dimoun ki dan lakominote ki mannyer nou pou pran responsabilite. Ki mannyer zot pou depan lo zot lekor zot menm zot.

Si i arive demen kot i annan okenn keksoz an mal ki arive Mr Speaker, kot la nou konnen poudir sa dimoun i pa pe depan zis lo Gouvernman. I ava annan sa responsabilite li menm li. Kot li menm li i a santi li endepandan. Kot i pa pe zis. Wi, Gouvernman i ava la pou asiste li dan nenport keksoz ki i bezwen. Be selman li i ava annan sa responsabilite Mr Speaker, kot lo li menm.

E ozordi nou vwar poudir bokou paran Mr Speaker.

Ozordi i annan bokou paran ki annan zanfan ki zot napa sa responsabilite.

Nou Gouvernman pe sey edik zot, pe dir zot ki zot bezwen annan sa responsabilite.

Kantite dimoun ozordi Mr Speaker, ki ozordi zot in ganny asiste ek en lakour avek Gouvernman, ki ozordi napa sa responsabilite.

E tousala bann responsabilite endividyel ki bann dimoun i bezwen pran. Fer sir poudir demen Gouvernman i ed ou pou ou ganny en lakour. Ki mannyer ou pou pran responsabilite ek sa lakour? Akoz Gouvernman pa pou toultan la pou li kapab vini pou antre dan tou keksoz.

Lo kote servis piblik Mr Speaker, en lot responsabilite ankor ki'n ganny tous lo la. Ozordi i annan bokou amelyorasyon dan bann servis piblik, lo kote bann servis ki ganny donnen. Be par kont, i annan serten landrwa kot nou bezwen kontinyen pe ankouraz zot. Bann ki nou konnen kot zot pe trenn lipye, zot pa pe donn sa servis lo sa nivo.

E mwan mon panse Mr Speaker, nou bezwen kontinyen donn nou servis piblik plis sa lankadremman, plis sa lankourazman, avek *leadership skill*. Kot la nou ava kapab ganny nou demen, bann dimoun ki pran

bann responsabilite Mr Speaker. Kot la nou a kapab gid bann lorganizasyon kot demen.

Akoz ki nou vwar? Ozordi dan plizyer bann departman, nou vwar kot zot pe ofer bann servis nou bann manm piblik la deor.

E nou ki nou pe dir Mr Speaker? Mwan mon'n vwar mon menm mwan kot, lo kote bann servis, kot en dimoun li menm li ler i al rod sa servis. En dimoun pe donn li sa servis li. Selman si sa dimoun i al konze, ler sa dimoun li i anvi kontinyen *follow-up*, i ganny dir pou dir sa dimoun in al konze. I bezwen esper sa dimoun tournen.

Sanmenm sa ki nou pe dir poudir se ki i bezwen kontinyen donn sa servis. Akoz ler sa dimoun pa la li, sa lot travayer ki la, i a kapab kontinyelman donn sa servis.

E nou santi poudir se ki, i annan bann landrwa kot i bezwen Mr Speaker, i bezwen ganny amelyore. Kot dan plas nou vwar nou *MNA*, nou pou bezwen vini *get involved*.

Akoz sa dimoun ler i pa pe ganny sa servis, i retourn atraver nou bann Lotorite Distrik, pou gete. Akoz i vwar li zis i pe ganny vir an ron.

E nou, nou pe demande, kot i annan landrwa kot i devret ganny amelyore dan servis piblik. Annou fer nou

travay parey nou ganny donnen, Mr Speaker.

Sa en pti pe ki nou, nou pe demande. Akoz, ozordi ler ou pe get nou Gouvernman Mr Speaker, nou Gouvernman li menm li i en Gouvernman ki'n donn sans tou dimoun. Nou pa'n gete ki politik ou ete. Dan ki parti ou ti ete. E nou Gouvernman pe donn sans tou Seselwa. Tou Seselwa pou vini pou travay. E nou, nou pe demande ki sa travay i ganny fer byen. Kot dimoun i ganny aret fer fristre. Kot dimoun i war li pe ganny sa servis kot i merite.

E mwan mon krwar Mr Speaker, dan laplipar lorganizasyon, Minister. Bann Minister, bann departman, i devret annan en dimoun ki pe kominik avek bann dimoun. Sa ki dimoun i demande.

Ler zot bezwen pe ganny en larepons sorti kot tel departman. Kot li i pa vwar li kot ler i pe vini, i pe ganny dir al kot madanm entel, al kot msye entel. Kot i annan en dimoun, kot i annan en pwen, kot li i kapab vini Mr Speaker, kot i kapab ganny son kestyon – son larepons.

Si sa ti annan, kot i annan en *public relation officer*, sa ti pou ede pou soulaz bokou dimoun. Kot sa zofisyete li i kapab ale pou rod lenformasyon lo *case* sa dimoun, pour li kapab – sa

dimoun kapab ganny en larepons.

E osi lo kote ledikasyon Mr Speaker. Ledikasyon sa pep. Ledikasyon pa tonm zis lo Gouvernman. Nou vwar ozordi kot i annan bokou lenformasyon ki'n ganny donnen.

Ti annan en letan, ou vwar zis Onorab Philip Monthy lo televizyon. Akoz Mr Speaker? I ti bezwen vwar li pe kontinyelman vini pou eksplik zabitan, apre kot i annan bann lenformasyon ki'n ganny mal donnen. Kan, lenformasyon ti direk.

E nou, nou pe demande ki i annan bann letablisman. *Be it* son zournalis, *be it* son bann zournal ki annan. Kot i annan bann lenformasyon ki ede, pour nou kapab edik nou pep byen.

E osi sa Mr Speaker, i a ede kot i ava fer keksoz en pti pe pli fasil lo kote lenformasyon. Kot i pa ti merite demen, kot nou vwar plizyer dimoun pe vin donn nenport kalite leklersisman. Zis akoz lenformasyon lo kote ledikasyon nou pep, i pa pe ganny donnen dan en fason byen.

E lo sanmenm sa kote Mr Speaker. Ozordi i vre parey Prezidan in dir, ozordi nou annan nou en Gouvernman ki ekoute. Ki'n pare pou li pran bann pwen avek manm piblik

Seselwa. Kot i annan bokou keksoz ki ganny met devan.

Si Gouvernman in pran desizyon, i normal. I en Gouvernman ki abes son lekor. I pare pou li ekout son pep, pou fer sir poudir i adres serten konsern avek konsiltasyon nou pep.

Kot i fer sir poudir bann keksoz ki ganny met devan, si nou vwar poudir i annan bann lezot keksoz ki devret ganny mete, ganny adrese. I normal ki nou annan en Gouvernman ozordi ki ekoute Mr Speaker. Akoz sa ki sa pep in vot pour sa.

E ozordi nou vwar poudir, zis nou vwar poudir se ki Gouvernman i vini. I kapab vini kennsel okenn desizyon ki li in pas lo la. Zis pou ekout son pep, pou fer sir poudir keksoz i marse. E ki lepep li menm li avek konsiltasyon, i dakor, kot nou kapab bouz devan.

Mr Speaker, lo kote respe. Mwan mon menm mon, mon'n pran mon en , apre ti ariv mwan en lensidan. Mr Speaker, bokou dimoun ki *friends* avek mwan lo *Facebook*, zot pou vwar poudir tanzantan ler mon zwenn en zanmi. Nenport ki Larelizyon ou ete. Ki perspektiv politik ou annan. Ki lopinyon ou annan. Mon fer sir mon tir en pti portre, mon met en pti mo respe avek.

Mr Speaker, akoz mwan ek mon fanmir pa bokou letan pase akoz nou soz politik, nou vwar kot nou'n ganny zoure, maltrete Mr Speaker. Lanmenm ler mon'n pran sa desizyon mon dir non, nou bezwen annan respe.

Nou bezwen annan respe dan nou kominote. Nou bezwen annan respe pour sakenn e lot. Nou bezwen annan respe si nou anvi poudir se ki sa pei Sesel i bouz devan.

E mwan mon vwar Mr Speaker, kot bokou landrwa kot mon'n pase dan lekol, dan bann landrwa travay, i annan sa kontinyasyon. I annan sa travay kot pou anmenn sa respe.

E zis en legzanp, mon ti pe koz avek en *teacher* etranze. Ti pe demann li mannyer i vwar travay, ki i fer lekol dan Mont Fleuri Segonder. Mon ti pe demann li mannyer i vwar travay, Mr Speaker.

I dir avek mwan poudir ennlér son lebra i tonbe, i dekouraze. Akoz i santi poudir parmi nou bann zenn, zot napa respe. E respe pourtan Mr Speaker, i sipoze konmans dan lakour. I sipoze konmans parmi nou.

I annan en *saying* ki dir, 'i pran en vilaz pou fer en zanfan grandi'. Be nou bezwen fer sir poudir nou pa perdi sa

valer Mr Speaker, ki apel respe.

Mr Speaker, Mr Le Prezidan dan son diskour in koz en pti pe kot pou anmenn en lamannman. Kot apre ki en Prezidan in fini son manda, kot i pou napa sa liminite.

Mwan mon pou donn mon sipor sa, akoz mon'n aprann poudir sa ti ganny anmennen en pe letan pase par Onorab Flory Larue. E sa i pou anmenn *accountability*.

I pou anmenn, ou kapab dir li menm li kot, demen sa Prezidan, apre ki i fini son manda. Lepep li menm li i pou kapab la pou kapab kestyonn li si i annan okenn keksoz.

E mon konnen poudir avek nou Prezidan, Mr Speaker, i pe fer en travay formidab, en travay drwat. Ki pou ede pour li kapab anmenn nou pei devan.

E Mr Speaker, lazennes. Mon apresye ki Prezidan dan son *speech* in tous en pti lo kote lazennes. Mr Speaker, mon annan en lespwar pour nou lazennes la deor. Akoz?

Mon'n angaz mwan dan bokou aktivite. Swa dan lekol, swa dan distrik avek nou bann zenn. Nou vwar poudir bann zenn la deor, i demande aktivite.

Lannen pase nou'n fer nou apepre 3 aktivite. Nou'n fer foutbol. Nou'n fer konpetisyon *volleyball* dan

lekol. E mwan mon pe demande Mr Speaker, kot nou annan plis zenn. Bann zenn ki pa ankor vini, vini zwenn nou.

Dernyen fwa nou ti fer en konpetisyon *basketball*. Bann zenn ti vini an gran group, pou partisipe. Sa i vin en siny lankourazman.

E mwan mon pe demann bann zenn ki annan okenn nide, okenn keksoz ki zot ti a voudre vwar kot pe bouze dan distrik Mr Speaker.

Mon pe demande ki bann zenn i vin devan, zot apros nou. Vin kot nou distrik nou a kapab fer plizyer aktivite, ansanm. Pou nou kapab bouz nou distrik. nE pou tir bann zenn ki dan fleo sosyal pou zot kapab vini, pou zot partisipe.

Akoz nou demande sa dan nou distrik Mr Speaker. Kot nou annan plis bann dimoun ki vini, i partisipe. E osi mon pe demann bann paran osi pou vini pou vin zwenn avek nou Mr Speaker.

Mr Speaker, ler nou pe koz lo kote sport. Mon vremen apresye ozordi bann travay ki bann tim sport pe fer dan nou distrik.

Mon anvi tir mon sapo avek zot, akoz tou le apre ler travay ler ou pase, ou vwar poudir i annan bann zenn ki pe *train*. E sa i donn nou en lespwar, poudir ki demen i annan bann zenn ki pou kapab pran larelev.

E nou, nou bezwen nou konman bann *Leader*, kontinyen sipòt zot. Si nou kapab envestir plis dan sport Mr Speaker, mon krwar nou devret fer li. Akòz avek bann fleo sosyal ki annan. E nou, nou pou bezwen rod en fason pou nou tir nou bann zenn ladan, Mr Speaker.

Mr Speaker, mon pou tous en pti pe lo mon distrik li menm li, ki mon'n vwar kot i annan bokou devlopman atraver Gouvernman. Zis dan semen, ozordi ou pou pas Mont-Fleuri li menm li, avek son bann zoli zabitan toultan an souriyan, ou pou vwar sa devlopman ki pe anmennen an term lo kote lenfrastriktir semen li menm li.

E zis yer Mr Speaker, mon'n ganny sans avek bann zofisye kot *SIA*, konn en pti pe bann proze ki nou'n tous lo la dan Bidze. An term lo kote lekol, nou'n vwar poudir i annan bann laklas ki ti pe koule, pe al re ganny kouver. Miray ki ti, bokou paran ti eksprim zot konsern dan *meeting* piblik.

Ki la aprezan kontrakter in fini ganny mete. Bann twalet pour bann pti marmay spesyalman *P1*, ki sa pou ganny aranze li menm li.

I annan nou *T.E Block* ki travay in konmanse kot nou lekol, pou fer sir ki i annan plis batay pour bann laklas. E osi

nou annan en miray avek gro lapli ki ti arive ki ti'n grennen. Sa osi pou demare byento.

E ler ou pe get bann proze an term dan distrik li menm li. Bokou proze, Lotorite Distrik in pran li en desizyon pou konsantre bokou lo bann proze semen. Nou konnen poudir mazorite, pa tou ki petet pou ganny fer *maintenant*. Be selman i annan ki pou konmanse. I annan ki'n fini konmanse, ki'n konplete.

Ki sa i ede Mr Speaker. Sa i ede akòz i tir sarwa ki en dimoun i bezwen pey sitan ser, pou li kapab fer son materyo ariv kot li.

Konmela mazorite bann lakour i annan en pti transpor, ki zot bezwen vwar zot pe kit o bor semen piblik. Ki mazorite fwa i ganny vandalize, i ganny kase. Sa i pou ede Mr Speaker ek bokou bann lezot proze ankor.

E pli gro konsern Mr Speaker, ki mon anvi adres avek zabitan mon distrik, se ki se *wayleave*. Ozordi tou dimoun ler i ariv kot zot, zot bezwen pa bliye poudir pou mwan ariv kot mon, mon bezwen pe pas lo propriyete kek dimoun ki'n donn permisyon pou pase.

Fodre pa ki nou bliy sa. Akòz nou vwar poudir ozordi Mr Speaker, bokou dimoun ler i ariv kot zot, zot bliye. Zot pa

le donn *wayleave* pour sa enn ki reste pli o ki li. Be si sa enn ki reste pli ba Mr Speaker, i blok semen? Ou osi ou pa pou ariv kot ou.

E nou Lotorite Distrik , sanmenm sa ki nou pe angaz nou dan bann *meeting*, dan bann kominote pou konsilte avek bann zabitan, pou fer sir poudir tou dimoun i *onboard* avek bann proze.

E la byento, nou'n fini ganny dernyen *wayleave* ki nou ti pe espere pour Semen Dan Gale. Nou swete ki i ava demare. Semen kot Gemma Govinden, kot Mr Oreddy anba in fini.

E bann lezot proze ankor Mr Speaker, ki pou benefisye bann dimoun dan nou kominote.

Kot lafanmir Cedras ki dan lefase, plizyer fwa zot in ganny dir poudir zot pa pou gannyen semen. E la mon'n ganny enformen ki plan in preski fini pare. E byento pou annan en *meeting* avek sa group dimoun laba anler.

Mr Speaker, i annan bokou lezot keksoz pozitiv dan nou distrik ki pe mars vreman byen, anba nou Gouvernman. E zabitan i vreman apresye sa travay ki nou Gouvernman ozordi i pe fer, Mr Speaker.

Mr Speaker, mon'n vreman apresye ki nou Gouvernman, Prezidan in anonse ki bokou bann dimoun

ki'n ganny afekte dan bann letan 1977, kot zot in perdi zot later.

Kot la Gouvernman pe fer laranzman byento, kot sa bann dimoun zot a kapab ganny rann zot propriyete. E sa i ava anmenn en soulazman pour bann ki dan lefase zot in vwar zot dan sa difikilte. Akoz Gouvernman li menm li in pran sa.

Nou Gouvernman in pran li aker Mr Speaker, pou li ekout nou zabitan. E parey in ganny dir oparavan, kot i annan bann lezot keksoz ankor. Ki pou annan bann diskisyon ki pou ede pou soulaz bann ki'n pas dan bann okenn evantyalite, dan sa bann letan kot ou kapab dir, kot propriyete in ganny pran. Bann ki'n ganny bate. Bann ki'n pas, ki'n perdi en manm fanmir, Mr Speaker.

Osi, mon vreman apresye avek Lanons Prezidan. Ozordi kot ou pase dimoun pe koz ou, pri lavi i o Mr Speaker. Nou vwar poudir Gouvernman li menm li, pe sey son mye pou rod diferan kalite alternatif pou ede, ki i a kapab soulaz Lepep Seselwa.

Nou konnen poudir nou pa pou kapab anpes pri lavi monte. Akoz nou vwar partou dan lemonn antye Mr Speaker, i annan sa difikilte avek, kot pri bann komodite pe monte.

Espesyalman nou

konman enn pti pei, enn pti pei ki depan bokou lo keksoz ki sorti dan bann larestan pei, ki nou enporte. Nou vwar ki nou napa kontrol lo la. Gouvernman napa kontrol.

Be selman, avek bann travay ki Gouvernman pe diskite pou fer lo kote bann komodite debaz, ki pou ede pou abes. Kot bann dimoun i kapab vwar zot avek plis larzan dan zot lanmen, ler bann komodite in desann.

Mon kontan sa travay ki Gouvernman pe fer ansanm avek STC, Mr Speaker. Kot la lepep li menm li i a kapab vwar kot zot a kapab ganny en pti pe plis sa soulazman.

Mr Speaker, mon'n ekout en pti pe bann diferan lopinyon ki'n annan *regarding* en sou distrik dan Mont Fleuri, Corgat Estate.

Avek bann travay ki pe ganny fer pou fer sir poudir sa group dimoun, sa group zabitan, zot vwar zot pe reste dan en landrwa kot i annan trankilite, i annan lape. I annan respe li menm li.

Kot i annan zenn ki demen, li menm li ler i sorti dan sa sou distrik i ava vwar poudir i annan en laklerte.

I malere Mr Speaker, aköz nou vwar poudir i annan bokou dimoun ki sorti dan bann larestan distrik, ki vini ki vin groupe dan sa landrwa.

I annan en pti group dimoun ki soutir bann serten keksoz ilegal ki pe pase. Be, i annan mazorite Mr Speaker, mazorite dimoun ki reste dan sa landrwa, ki zot in fatige. Zot in fatige avek sa bann keksoz ki pe pase. Zot in fatige avek bann *disturbance*. Bann aktivite ki pase, ki zot pa anvi zot zanfan i grandi ladan.

Corgat Estate i annan bokou dimoun ozordi ki dan bann pozisyon kle, ki'n grandi Corgat Estate. Mr Joubert, ki ti ansarz kot Lekol Touris La Misère? I en zabitan Corgat Estate li Mr Speaker. In ne, grandi Corgat Estate.

Ms Beryl Noel ki ozordi i annan son prop biznes. Ennler ler mon asize ek li, i akont mwan Corgat Estate mannyer ti ete. I annan bokou lezot ankor bann zenn. Miss Kelly ozordi ki fek sorti son *course* ki'n vini, Mr Speaker.

I annan bokou keksoz pozitiv ki'n sorti Corgat Estate. E nou, nou anvi ki nou vwar sa landrwa, sa sou distrik, i vin en landrwa kot bokou dimoun ozordi i kapab annan zot trankilite.

E nou Mr Speaker, mon koz ek bokou bann dimoun ki dan – ki bann adikt, aköz zot pran *methadone* an deor kot mon lofis. Tanzantan mon fer sir mon pran en pti moman letan mon al dyalog avek zot.

Mr Speaker, mon pa anvi demen kot mon vwar en msye ki annan en ta lafors, en ta kouraz. E mazorite zot, zot ti dan bann lanplwa. I annan ki ti dan biznes ki ozordi zot vwar zot, zot in pri dan sa difikilte, Mr Speaker.

E Gouvernman i fer sir ki i pe met an plas bann keksoz. Parey i *still* annan sa Program *Methadone* la. E nou, nou anvi ki zot ed zot prop lekor pou zot sorti. E nou anvi ki zabitan Corgat Estate i vwar li pe viv dan en landrwa kot i santi li an sekirite. I santi li dan lape.

En dimoun pa kapab leve granmaten. I annan en fiy i koz ek mwan, i travay *shift*. I dir mwan i leve bomaten, dan *staircase* i vwar en dimoun pe dormi, Mr Speaker. E nou bann keksoz koumsa ki nou anvi tire dan nou Corgat Estate.

Akoz avek sa redevlopman. Avek sa redevlopman Mr Speaker, kot nou pou vwar bann zoli lenfrastriktir. Nou anvi ki sa landrwa demen, ler en zanfan pe grandi, i pe vini.

Akoz mazorite sa bann dimoun ki vin anmenn sa bann pwazon la, zot pa reste la zot. Mont en kou kot zot laba, kot zot fanmir. Zot, zot madanm, zot zanfan zot pe dormi dan trankilite. E nou,

nou bann dimoun pe ganny afekte, Mr Speaker.

E mwan mon pou donn tou mon sipor Corgat Mr Speaker, pou fer sir poudir ki nou kontinyen annan sa ledikasyon. Mon koz ek mazorite bann zenn ki nou vwar ki vin frekant dan sa landrwa.

I annan dimoun i sorti dan diferan distrik. Takamaka i annan dimoun. I annan dimoun ki ti drayver bis. I annan dimoun ki ti annan *Barber Shop*. I annan dimoun ki ti annan diferan biznes. Tousala i vin la.

E i bezwen annan en travay ki ganny fer, pou fer sir poudir sa landrwa Mr Speaker, i vin en landrwa an sekirite pour nou bann zabitan.

Akoz i annan sa fristrasyon malgre ki pa tou zabitan ki vin devan ki dir. I annan sa fristrasyon. Ki ler zot vini zot koz avek nou, zot vini zot dir ek nou koumsa zot pa pou kapab.

Be mazorite dimoun ki'n al Perseverance ozordi, zot in dir zot pa anvi tournen. Akoz zot vwar poudir laba zot dan trankilite. E nou, nou bezwen anmenn sa bon savwar viv, respè dan sa kominote parey i ti ete avan.

Mr Speaker, e en lot proze ankor ki mon pou donn

tou mon sipor dan mon distrik, se nouvo lopital.

Malgre ki in annan bokou defi, bann travayer zot menm zot mon konnen poudir zot pe *look forward* kot i annan sa nouvo lopital. Kot zot vwar zot dan en nouvo lanvironnman.

E mwan mon fer sir Mr Speaker, konman mon ganny en pti moman letan – anvi ki Lopital Sesel i dan mon distrik, mon pas en pti kou mon get bann pasyan.

Mon get bann travayer. Mon koze ek bann *cleaners* tou. Mon fer sir mon get enn de bann zabitan osi, ki'n admet lopital. Mon fer sir mon annan sa dyalog.

I annan bokou defi lopital Mr Speaker. Be selman nou konnen la, parey in anonse dan Bidze kot Minister, i annan en kontrakter ki pou ganny en kontra pou li fer bann pti *maintenance work*.

Nou swete ki sa i ava kapab amelyor en pti pe bann keksoz. E ki bann travayer parey Prezidan in dir, kot zot a kapab ganny plis sa sipor. Kot nou, nou pou donn zot sa lankourazman Mr Speaker.

Donn zot sa sipor, pou fer sir poudir se ki ler zot pe vin travay, ki zot vwar zot dan en lanvironnman vreman formidab.

Mr Speaker, Leta nou Nasyon ozordi, nou pep. Nou'n ganny dir pou dir pep pa kontan. Pep i fristre. Pep i dan lakoler.

Mr Speaker, be Gouvernman *LDS* i annan zis 3an. Si dan 3an nou'n kapab sov *Air Seychelles*. Be kwa ankor dan sa lot 5an ki vini ki nou pa pou fer?

(APPLAUSE)

HON MICHEL ROUCOU

Ozordi, Gouvernman *LDS* pe ganny blanmen aköz i annan en *flooding* Pointe Larue. I pou annan ankor lezot landrwa Corgat Estate ti annan *flooding* li.

E ozordi ki nou'n vwar? Gouvernman, bann zabitan i dir ou apre 20an zot in demande pou fer miray.

Be Gouvernman anba *Leadership* Prezidan Ramkalawan in vini in fer miray. Gro lapli in tonbe, ti napa *flooding*.

E Pointe Larue osi tou i pou pas parey. Kot Gouvernman pou rod solisyon, ki demen nou pa vwar nou ankor dan evantyalite parey.

E mon konnen Mr Speaker, ki mon Gouvernman anba *Leadership* Prezidan Wavel Ramkalawan, Mr Speaker, nou pou kontinyen sa travay pozitiv. Nou pou

kontinyen get nou pep dan pozitivite, dan laklerte, dan laverite Mr Speaker. Pou fer sir ki nou pei Sesel i al pli devan.

Mr Speaker, mon ti ganny sans *attend* en seminar Larisi, kot ti annan diferan pei sorti Lerop, Lazi, Lafrik. Ti annan 2 Manm. Ti annan Onorab Herminie ek mwan. Apre ti annan Ms Samia Bastienne - Samia Lebon, *sorry*.

Ler ou ras ou paviyon ou pei Sesel, tou dimoun i demann ou. Be, sa ou sorti Sesel sa. En zoli paviyon. Savedir i montre ou enternasyonanman ki lenpak Sesel i annan. Ki mannyer dimoun i kontan Sesel, Mr Speaker.

E sa travay ki ozordi nou Gouvernman pe fer, pe fer sir ki nou ganny sorti lo bann *black list*. Pe fer sir ki nou pei i kontinyelman bouz devan avek nou nouvo paspor Mr Speaker. Kot la ou kapab dir se ki, nou pep i kapab mars lebra ouver. Nou pti, pti Mr Speaker, selman nou kapab frot zepol avek bokou pei.

MR SPEAKER

30 minit Onorab.

HON MICHEL ROUCOU

Wi Mr Speaker, pres pou mwan terminen.

Mr Speaker, mon bezwen dir ek Lepep Seselwa; la deor i

annan bokou bann negativite pe sey kas sa pozitivite. Pa les zot tonm dan sa latrap Lepep Seselwa!

Mwan toultan ler mon vwar en dimoun i anvoy mwan kek mansonz ki pe ganny pase. Toultan mon dir ek zot, *as long* ki Gouvernman pa vin devan, pa dir poudir tel keksoz i koumsa, mon pa ekoute sa bann mansonz.

Nou kontinyen reste dan pozitivite Mr Speaker. Nou kontinyen. E Mr Speaker, 2025, mon garanti poudir *LDS* pou reste la. *LDS* pou kontinyen sa travay ki nou pe fer, Mr Speaker.

(APPLAUSE)

HON MICHEL ROUCOU

E parey Lepep Seselwa i toultan dir, sa pti garson 2an dan mon distrik. Nou pa pou zanmen les tonbe!

(APPLAUSE)

MR SPEAKER

Mersi Onorab. Laparol i prezan pour Onorab Georges Romain.

HON GEORGES ROMAIN

Mersi Mr Speaker. Bonn apre midi tou koleg Onorab, tou dimoun a lekout. E en bonn apre midi spesyal zabitan Anse Etoile.

Mr Speaker, permet mwan pou dir en pti keksoz avan mon konmans mon entervansyon. Bomaten mon tann Onorab Vidot fer sorti ki Minis in ganny - toultan i kontan dir ki Minis in ganny logmantasyon lapey.

Mon ti a kontan dir li vin ek bann levidans. Akoz pou Minis ganny ogmantasyon lapey, i bezwen pas atraver Lasanble. E mwan mon pa okouran mon'n vwar sa dan mon 2 lizye.

(APPLAUSE)

HON GEORGES ROMAIN

Dezyenmman. Dezyenmman, mon ti a kontan dir avek *LOTO* ki in dir ki kote en pei ki ou'n deza vwar loto pe pase dan erport?

Mon anvi dir li mon'n ganny lenformasyon avek en ansyen *cabin crew* ek en dimoun ki travay dan erport, en o zofisyè. In *retire*.

De fwa in deza arive dan lepase kot an Out 1996, kot loto ti an move tan.

(APPLAUSE)

HON GEORGES ROMAIN

Kot transpor ti pase dan erport anvi ki ti annan move tan menm. E transpor ler i pase, i pa pas lo *runway*. I pas akote erport.

Mwan mon'n travay erport mon konn byen ki bor bann transpor i pase.

(APPLAUSE)

HON GEORGES ROMAIN

So, avan nou koze annou fer sir nou ganny nou bann *facts* byen. Mersi Mr Speaker. Prezan mon a retourn lo mon entervansyon.

Mr Speaker, i touzour en privelez pou mon fer mon repons lo Diskour lo Leta Lanasyon. Mon pou komans premyerman par felisit nou Prezidan pour son diskour. Ki ankor enn fwa in vin fran e koz laverite lo Leta nou Nasyon.

Mon admir son kouraz. Akoz malgre kritik e negativite, sa pa pe anpes li kontiny son travay dan son manda ki pep Seselwa in donn li.

Mr Speaker, Gouvernman *LDS* pe antre dan son 4enm lannen, dan sa 5an manda ki in gannyen depi Oktob 2020. E ozordi, mon anvi ki nou fer en refleksyon lo son parkour ki i in fer depi sa letan.

E annou konpare, ki kantite progre in annan dan sa pei dan sa pti moman letan, depi ki Seselwa in donn *LDS* sa manda, pou anmenn sanzman e transform lafason ki nou gouvern nou pei.

E pour nou kapab fer en konparezon ki zis, i enportan

pou gete kote pei ti ete an 2020? E kote nou ete la, o komansman 2024?

Mr Speaker, annou penn sa de portre. Eski nou pli dan mal, ouswa i annan amelyorasyon?

Ler *LDS* ti pran pei an Oktob 2020, nou kapab dir ki Sesel nou pti pei, ti'n malerezman ariv lo son zenou. Gras a move zesyon sa ansyen Gouvernman *US* ki ti'n mal anmenn sa pei pour plis ki 40an. E ki ti'n kit en kantite salte pour *LDS* anmase.

Annou pa bliye, nou'n vin zwenn en pei ki ti'n preski faid. Sa Gouvernman *US* ki ti la, ti'n kree en lanvironnman lesefer. Kot larzan ti pe ganny donner gos, drwat, pou zot kapab kontinyen reste o pouvwar. Bokou bann dokiman enportan ti'n disparet.

Bann lorganizasyon tel ki *JJ Spirit Foundation* ti pe benefisye ek larzan *taxpayers*. *Loan* atraver *SBFA* ki'n ganny donner ek zot bann dalon dan sa parti, ki pa'n zanmen ganny rann.

Ti osi annan latolerans pour koripsyon. *Ile Soleil* i en legzanp, kot bokou trik in arive e proze in ganny afekte. Larzan dan nou sistenm *welfare* a sa letan ti pe mal ganny zere. Kot menm dimoun mor ti ankor pe ganny peye.

Ti annan bokou labi dan lasistans ki ti pe ganny donner atraver kart *STC*.

Annou pa bliy sa fame *telenovela Irish*, ki ti annan de milyon e de milyon ki'n ganny peye atraver bann kontra manboulouk. Ki *FPAC* dan 6enm Lasanble ti dekouver.

Annou pa bliy sa disparisyon \$50milyon, ki'n disparet anba zot *watch*. En larzan ki ti'n kapab ed nou pep, ler nou ti pe pas dan bann moman difisil.

Bann pti bout, bout kare later ki zot ti'n pas lot zot parti politik. E ozordi i pe ganny vann pour de milyon e de milyon Roupri.

Mr Speaker, sa i apel en labi. E la zot a ganny lodas pou vin dir nou ki koripsyon i pli pir ozordi ki ler zot ti o pouvwar. Zot ase fer nou krwar lizour pour aswar!

(APPLAUSE)

HON GEORGES ROMAIN

Ler ou gete Mr Speaker, ou kapab dir ki sa parti *US* ti pe negliz devlopman nou pei e mazin zis zot benefis.

Pran legzanp ek nou bann lenfrastruktir ki'n kout bokou larzan pou konstrir. Ki ti'n tonm an rin e ganny abandonnen. Tel ki nou bann fasilite sportif kot ti'n ariv lo en nivo deplorab.

Nou Lekol *Nursing* ki etidyan ti nepli servi. E nou Libreri Nasyonal ki ti'n reste fermen pour en bon pe lannen. Nou bann kondisyon semen a sa letan ti'n deteryore, e devlopman ti vreman minim.

Mr Speaker, listwar i la pou fer nou rapel ki Bidze pei a sa letan ti ganny aprouve dan zis detrwa erdtan. Kestyon pa ti ganny demande.

E annou pa bliye ki se gras a 15 lo 10, ler *LDS* ti dan Lopoziyon dan 6em Lasanble, ki prezan Bidze ti ganny byen kestyonnen e detaye pour manm piblik kapab konpran.

E annou pa bliye Mr Speaker, ki avan 2020 nou drwa Lekspresyon ti vreman limite. Lafreyer e viktimizasyon ti keksoz ki ti dekouraz Seselwa pou libreman koze.

Sistenm, ek nou, pa ek nou, ti en keksoz normal a sa letan. E sa ti anmenn bokou divizyon ek fristrasyon dan nou pei.

Mr Speaker, pa bliye ki sa pandemik *COVID* ki ti'n vin tap lemonn an 2020, ek son bann reperkisyon negativ ki ti'n vin avek, in agrav sa sityasyon pei. E sa in ariv zis o moman ki *LDS* i vin o pouvwar.

Ozordi an 2024, ler nou reflesir lo sa letan e kondisyon ki *LDS* ti vin o pouvwar. E

prezan konpar progre ki nou'n kapab fer, avek tou sa bann defayans ki nou'n fer fas avek.

Mr Speaker, nou bezwen admir zefor ek determinasyon sa Gouvernman dirize par Prezidan Wavel Ramkalawan. Sa Gouvernman in sirmont bann moman difisil. E se sa ki'n fer nou vin pli for e pli rezilyan koman en pep.

Mr Speaker, prezan permet mon pou fer resorti nou bann lakonplisman, pou kapab ed nou penn sa portre Sesel ozordi an 2024. E fer nou fer sa konparezon lo sa 3an depi ler *LDS* in vin o pouvwar, e demontre nou bann sikse.

Ozordi Mr Speaker, ler nou get nou pei, mon asire ki bokou pou dakor ki nou pei in vreman diferan ozordi. E ki i annan bokou sanzman pozitiv.

Wi, i pa perfe. Wi, nou annan pou kontinyen aranze. Me nou'n fer bokou dan sa 3an. 3an Mr Speaker e sa i pa 40 ekek lannen.

Ozordi sa Sesel ki nou pe gete, in transformen gras a sa Gouvernman *LDS* ki'n dedye son kouraz, e ki'n arive remet sa pei debout. Malgre defi ki lemonn antye in fer fas avek.

Tou pei in navig sa losean kot lanmer in vreman move. Me lafason ki nou, koman en pti pei in navige, e nou resours limite, in vreman enpresyonan.

Premyerman, ozordi Mr Speaker, en keksoz enportan ki sa Gouvernman *LDS* in anmennen, ki petet bokou nou pa ni menm mazine. Se sa stabilite ek lape ki nou annan dan nou pei.

Akoz zot de eleman ki ede pou nou kontinyen anmenn progre ek lagrandisman nou krwasans ekonomik.

Ozordi, tou le zour nou vwar dimoun pe desann pou al travay, zanfan pe al lekòl, biznes pe fonksyonnen, touris pe kontinyen debarke dan nou pei. Menm si zot ti le fer nou krwar ki avyon ti pou aret vin Sesel. E ti pou napa lord ek lape si *LDS* i vin o pouvwar.

Ozordi nou pep i kapab ziz pour zot menm, sa stabilite ki nou annan dan nou pei. San sa Mr Speaker, nou ti pou viv dan en lensertitid, nou ti pou viv dan lafreyer, touris pa ti pou le vin Sesel, biznes pa ti pou agrandi. E sa ti pou move pour en pti pei parey Sesel.

Alor annou montre nou lapresyasyon, aköz pa bokou pei ki kapab zuir sa stabilite ki nou annan.

En lot transformasyon enportan ki *LDS* in anmennen depi ler in vin o pouvwar Mr Speaker. Se lafason ki lazistis i renye dan sa pei. Lazistis ozordi i aplik pour tou dimoun. San get ou kouler parti politik, oubyen ou afilyasyon.

Lakour i pour tou dimoun. Sistenm 'ek nou, pa ek nou'. I nepli relevan anba sa Ladministrasyon. Menm si *Leader Parti US* i le fer nou krwar ki sa i en problem ki zot pou vin rezourd si zot vin o pouvwar.

Mr Speaker, ozordi zot le vin fer nou krwar ki 'ek nou, pa ek nou' in ganny kree par Gouvernman *LDS*. Kan sete zot prop parti, ki ti viktimiz e tortir dimoun, fer dimoun disparet e fer zot al egzile.

(APPLAUSE)

HON GEORGES ROMAIN

E menm resaman, zot ti'n dir ki ou pou trouv ou anba en pon, si ou pa siport zot.

(APPLAUSE)

HON GEORGES ROMAIN

Sa zot Mr Speaker! Zot pa pou zanmen sanze.

Ozordi Mr Speaker, nou konnen ki annan dimoun ki travay dan sa Gouvernman ki probableman pa siport sa parti ki o pouvwar. E sa i toutafe normal, aköz nou pe viv dan en pei kot la demokrasi i egziste. E i normal pou ou annan diferan krwayans politik.

E sa i pa sipoze afekte ou loportinite dan sa pei. Aköz annou pa bliye ki, Sesel i pour tou son zanfan.

Mr Speaker, en 3enm transformasyon ki nou'n vwar anba Gouvernman LDS, se sa laliberte ki tou dimoun i annan ozordi, pou eksprim zot lekor. E sa pa ti zanmen egziste avan LDS ti vin o pouvwar.

E annefe, nou tou nou kapab mazine ki ti pou'n arive ek ou, si ou ti koz piblikman kont sa Gouvernman ki ti la avan? Swa ou ti pou'n disparet. Oubyen ou ti pou pe viv dan lafreyer e ou fanmir ti pou pe soufer.

Ozordi sa Gouvernman LDS i promouvwar la demokrasi. E ki nenport ki endividi, ki anvi eksprim son lopinyon, i kapab fer li. E sa, nou vwar pe arive ozordi dan nou pei, lo plizyer nivo.

Lo medya nasyonal, lo medya sosyal. E sa ki anvi koze i lib pou koze e met zot pwennvi. Personn pa anpes zot e Lotorite pa vin menas zot.

E nou menm vwar kot serten endividi pe abiz sa drwa. Me sa tolerans e laliberte pou drwa lekspresyon i en sanzman pozitiv ki LDS in anmennen. E annou rekonnet sa.

Mr Speaker, en lot keksoz ki nou ti vwar bokou anba ansyen Gouvernman ki'n ede penn zot portre negativ, sete koripsyon. I annan tro bokou pou nonmen.

Mr Speaker, par kont avek sa Gouvernman LDS, koripsyon pa pe ganny tolere. Ozordi nou vwar case Ankour. I annan ki pe fer fas ek kondannasyon prizon. E ozordi, striktir in ganny met an plas pou elimin sa move pratik.

Mr Speaker, o nivo mondyal, nivo koripsyon dan en pei pli presizeman dan sekter piblik, i ganny mezire par en lendis ki apel *Corruption Perceptions Index*.

Sa lendis i ant 0 a 100. E pli ou score i pli o, savedir i en lendikasyon ki ou annan mwens koripsyon dan ou pei.

Annou get Sesel. An 2017, Sesel ti ganny klase koman 36enm dan lemonn lo nivo persepsyon koripsyon, parmi 180 pei. E i ti score 60 pwen.

Pour lannen 2023 Mr Speaker, Sesel in amelyor son performans pour nivo koripsyon, e in ariv 20enm lo nivo mondyal. Sorti 36enm an 2017, pou ariv 20enm an 2023.

E son score in monte savedir in amelyore. Sorti 60 pwen, pou ariv 71 pwen. Savedir en ogmantasyon 11 pwen dan sa peryod 6an.

Ozordi, lendis koripsyon pour Sesel, i lo menm nivo ek bann pei tre devlope parey *La France*, Lotris ek Langleter.

E nou par devan Lanmerik. En gran pwisans. Ki li i 24enm pozisyon avek 69 pwen. Ler nou konpar nou lo nivo Lafrik, Mr Speaker, Sesel i premye.

Botswana i sa 2enm pei Lafrik par deryer Sesel. Me i 59enm o nivo lemonn. E pour mwan, mon sirprann pou tann *Leader US* pe dir, ki koripsyon in vin pli pir ki zanmen avek *LDS*.

Mr Speaker mon pe demann avek *Leader Parti US* alor, pou vin devan ek son bann levidans. E pa zis koze e fann lakizasyon dan vid.

(APPLAUSE)

HON GEORGES ROMAIN

Mr Speaker, i kler ki Sesel i lo en bon semen e Gouvernman *LDS* pe montre komitman anver latransparans e bonn governans.

Dan sa 3an, ki i en pti gin letan, in montre ki Sesel pe fer en travay remarkab e serye pou elimin koripsyon dan nou pei.

Ozordi, Lalwa in amande dan pei pou asire ki tou biznes i ganny fer dan latransparans. E ozordi i obligatwar pou deklar tou dimoun ki par deryer en biznes.

Ozordi i kler ki sa Gouvernman pe promouvwar la transparans. Ensi ki en Polisi ouver, kot lenformasyon

i ganny partaze ek medya dan plizyer *forum*.

Sa i enkli bann *Cabinet briefing*, kot bann desizyon Gouvernman i ganny eksplike par nou Vis-Prezidan avek medya, preski tou le semenn.

E Konferans Lapres ki Prezidan i fer regilyerman, kot zournalis i ganny sans pou demann zot kestyon, lo kwa ki pe pase dan pei. Tousala i bann fason pou edik nou pep klerman, lo bann desizyon ki Gouvernman i pran.

Mr Speaker, nou'n toultan dir ki *LDS* i en Gouvernman ki annan en vizyon pour nou pei. E menm avek resours ki'n limite pandan sa dernyen 3an, in menm kapab priyoritiz devlopman pour Sesel.

Premyerman, *LDS* in gard son promes pou asire ki saler dan sekter Gouvernman i ganny regete.

Pli o revizyon ki Gouvernman in deza donner, sete avek *LDS*, ler i ti ogmant saler par 10poursan lannen pase.

(APPLAUSE)

HON GEORGES ROMAIN

Mr Speaker dan sekter piblik, *LDS* pe anmenn plis lefikasite depi ler in vin o pouvwar. In fini entrodwir en sistenm kot performans travay i bezwen ganny mezire pli byen. E non

pa gard en sistenm lesefer ki ti egziste avan.

Ozordi sak travayer pe ganny ankouraze pou pran son responsabilite, pou delivre dapre sa ki in ganny anploye pou fer.

Mr Speaker, ler *LDS* ti vin o pouvwar an 2020, i ti annan en kantite defi dan son semen pou li kapab balans bann proze devlopman dan pei. E an menm tan, asire ki tou son zanfan pe ganny konfor de baz pou li kapab viv dan dignite.

Malgre tou sa bann defi, Gouvernman in persiste e in kapab balans sa de keksoz dan en fason responsab. E in menm anmenn bokou devlopman dan pei pandan sa peryod. San vwar enn nou dimoun mor lafen, parey Lopoziyon i abitye dir.

Par kont, Lopoziyon li, in kontinyen met presyon pou pa fer devlopman dan pei. E dapre zot, *LDS* ti'n merit zis donn larzan gos, drwat, parey zot ti abitye fer dan le pase. Kot sa ti pou anmenn nou Mr Speaker?

En pei ki napa devlopman lenfrastruktir i pa pou prospere, e aktivite ekonomik pou redwir.

Mr Speaker, si nou ti'n ekout sa bann gran koneser dan Parti Lopoziyon ozordi nou ti pou napa Lopital La Digue.

Nou ti pou napa nouvo *jetty* e terminal lo Praslin.

La Digue pa ti pou ganny son nouvo terminal.

Proze *sewage* lo La Digue pa ti pou'n demare.

Zot Kord Gard pa ti pou'n benefisye avek renovasyon.

Menm la, nou vwar La Digue pe al ganny en nouvo lekol.

Mr Speaker, si Gouvernman *LDS* pa ti serye, e i ti zis ekout sa parti Lopoziyon, ozordi, Libreri Nasyonal ti pou ankor an rin.

Lekol Lasante ti pou ankor dan son leta deplorab. E bann etidyan ti pou bezwen kontiny zot letid North East Point.

Nou pa ti pou vwar proze lagrandisman semen, nouvo semen, lalimyer ek drenaz dan plizyer distrik.

Nou pa ti pou vwar nou bann zabitan pe antre dan zot nouvo lakaz.

Bann konstriksyon pour bann bazar ek lezot fasilite pour peser, ti pou napa.

Fasilite sportif ki ti dan bann kondisyon deplorab, ti pou'n fini pouri. Net. E zis mazin, kote nou bann zenn ti pou kapab fer zot *sport*?

Nou pa ti pou vwar konstriksyon nou nouvo *Remand Centre*, ki dan en staz tre avanse ozordi. E sa pou ede tir presyon lo Prizon Montagne Posée. E annou pa bliy sa

Juvenile Centre ki'n fini ouver son laport lo Praslin,

E la Mr Speaker, SRC a kapab ganny zot batiman byento. E tousala Mr Speaker pa'n ariv par laverti, me in ariv akoz LDS i en Gouvernman ki annan en plan ek en vizyon pour sa pei kontinyen devlope.

E mon asire ki pep Seselwa i entelizan pou kapab fer zot prop analiz, e vwar ki progre ki LDS in anmennen dan nou pei, depi ler in vin o pouvwar.

Mr Speaker, si ozordi ler nou get anler nou vwar nou laliny aeryen *Air Seychelles*, pe anvole, sa se gras a zefor Gouvernman LDS. Ki'n kapab sov sa lakonpanyen e asire ki son bann travayer pa perdi zot lanplwa.

E ki Sesel i reste fyer pour son *national airline*. Nou tou nou konnen ki degenn ki parti US ti kit *Air Seychelles* ladan.

Mr Speaker, menm si pei pa ti stab finansyelman, ler nou ti pe fer fas ek sityasyon difisil. Gouvernman LDS ti rod fason pou anvoy de group etidyan pou al fer zot letid avanse aletranze.

Tousala pa ti pou arive Mr Speaker, si pa ti en Gouvernman ki serye e ki annan en vizyon kler...

(APPLAUSE)

HON GEORGES ROMAIN

Ki annan en vizyon kler e krwar dan son zenn.

Mr Speaker, en lot keksoz remarkab ki mon'n vwar depi ler Gouvernman LDS in vin o pouvwar, se lespri langazman ki pe vin pli aparant dan nou kominote.

Par sa, mon le dir ki konmela bokou bann zabitan i pare pou vin devan, pou donn zot led pou fer bouze zot distrik. Dimoun i pli ouver pou vin partaz zot konesans, oubyen siport bann proze lo nivo distrik. E pour sa, nou montre nou lapresyasyon e nou dir zot mersi bokou.

Dan Anse Etoile sa i vremen remarkab. E si ozordi nou vwar nou distrik i ganny dekore pour Nwel ek pour bann lezot lokazyon. Se akoz nou zabitan i konfortab pou vin ansanm, pou met lide e anmenn sa lazwa dan nou kominote.

Ozordi nou annan dimoun dan Anse Etoile, ki volonterman in pare pou fer en pti *bus shelter* dan son pos, pou kapab ed bann fanmir ki pran bis anler La Retraite.

Nou annan en lot fanmir ki'n pare pou donn *wayleave* pou fer en lot proze *bus shelter*.

Nou annan en biznessmenn Mr Speaker, ki li osi pe pare pou pey tou depans pou fer en bazar tanporer pour

peser Anse Etoile. Anvi ki zot bazar pe al ganny demoli, e enn nouvo pou ganny konstrir.

Nou annan kontrakter ki'n fini ofer son servis gratwitman, pou tir plizyer ros ki ti poz en danze dan lakour Lekol La Retraite, pou kapab amelyor sekirite pour nou bann zanfan kot lekol.

Nou annan plizyer bann dimoun avek konesans spesyalize, ki pe ozordi montre nou kominote mannyer pou aprann fer ladans tradisyonnell dan Anse Etoile.

I annan ki pe ed serten group zanfan pou sirmont bann problem sosyal.

Nou menm annan nou bann zabitan, ki ofer zot servis transportasyon kan i nesaser, pou asiste avek lanterman dan nou distrik. E menm pour nou bann dimoun trwazyenm-az, ler zot deplase.

Mr Speaker, ozordi nou vwar sa mouvman volontarya pe kontinyen agrandi dan nou kominote. Depi ler sa Gouvernman in vin o pouvwar, sa bann tel zes in ganny fer aker. E osi senboliz sa sanzman ki nou'n vwar dan nou pei.

Mr Speaker, si nou kontinyen promouvwar bann tel keksoz pozitiv dan plas bann ki negativ, mon personnelman krwar ki sa i pou ed tou pou senm pozitivite

dan nou pei ki ava anmenn plis lazwa, boner dan nou lavi toulezour. Si nou ti kapab aplik sa partou, nou pei ti pou bouz pli vit.

Ler mon regard nou medya nasyonal, mon sagrainen parfwa ler zot fer zot reportaz. Akoz mon vwar zot met lanfaz lo plis negativite ki pozitivite. Zot met plis latansyon lo problem ki lo solisyon. Zot mank loportinite parfwa pou balans keksoz e ede pou anmenn klarite dan fason ki lenformasyon i ganny pase.

Pran legzanp Corgat Estate ki'n arive resaman, kot Lotorite ti'n fer en lentervansyon lo bann landrwa ki zot sispe annan keksoz ilegal. *SBC* ti pas reportaz lo ki mannyer sa ti ganny deroule. E *interview* zis bann dimoun ki ti pe kritik sa loperasyon.

Me par kont, zot in mank loportinite pou fer resers lo akoz sa loperasyon in ganny fer. Ki ti son benefis, e si sa loperasyon ti vreman nesaser pou ganny fer.

Be, akoz zot pa ti *interview* lezot zabitan, ki petet ti a annan en pwennvi diferan? Menm si zot ti a protez zot idantite.

Lensidan Cascade i en lot legzanp kot nouvel i pa byen balanse. E zot mank loportinite pou vwar bann

keksoz ki'n ganny fer pou ed rezidan. Akoz Gouvernman in fer en kantite pou ed sa bann fanmir ki'n ganny afekte.

I normal pou pas nouvel lo bann ki ankor dan difikilte, akoz i vre ki zot lavwa bezwen ganny ekoute. Me annou pa bliye pou osi montre sa kantite ki'n deza fini ganny led, koumsa nouvel ti a balanse.

En lot legzanp Mr Speaker. Resaman, Lazans Proteksyon ansanm ek Gouvernman Lokal in fer en *forum* ek diskisyon avek tou bann *MNA* ek Lotorite Distrik pou partaz lenformasyon lo zot bann servis ki zot ofer?

Ki kriter i ganny servi pou kalifye bann dimoun ki pe rod akse ek bann tel benefis?

Ki mannyer pou ganny akse ek sa bann servis?

E sa pour mwan ti en keksoz pozitiv, ki ti kapab ganny partaze dan en program detaye lo *SBC*.

Me par kont, *SBC* in pas sa briyevman. E pour mwan, in pa'n ganny son lenportans dan Nouvel. Menm si zot ti pas en pti bout lo la.

Nou tou nou konnen ki Lazans Proteksyon i annan en rol tre enportan dan nou pei. E alor, okenn sanzman avek zot servis ou benefis i devret byen ganny pase avek nou popilasyon.

Mr Speaker, mon lans lapel pour nou medya

nasyonal osi vin pli proaktiv. Pou pa zis donn lenformasyon, me osi servi zot loportinite pou edik nou pep lo bann size enportan.

Mr Speaker, dan mon lentervansyon ozordi, mon'n kapab montre sa ladiferans ant ler *US* ti o pouvwar, e ozordi apre 3an anba Ladministrasyon *LDS*. I pa difisil pou vwar zistans ki nou pei in avanse ozordi.

Si nou onnet ek nou lekor, nou pou bezwen admet ki dan sa moman letan, Sesel in bouze. E menm lemonn in admir lafason ki nou'n fer fas ek bann defi mondyal.

E nou koman en Seselwa, nou merit fyer pour lakonplisman nou pei. Espesyalman ler nou konpar nou ek bann lezot pei ki pli devlope ki nou.

Annou pa bliye, ki i ankor annan bokou pou fer pou anmenn nou pei pli lwen. Nou lefikasite dan sekter piblik i bezwen kontinyen ogmante. Nou bezwen kontinyen ankouraz nou lafors travayer dan pei, pou devlop plis konpetans, e pran plis zot responsabilite.

Nou bezwen kontinyen lager kont fleo drog. Akoz sa i afekte prodiktivite dan nou pei e i detri nou kominote. Nou bezwen kontinyen ek proze devlopman dan diferan sekter. E nou bezwen fer sir ki nou

popilasyon i kontinyen viv dan dignite.

Pou konklir Mr Speaker, mon ti a kontan remersi nou Gouvernman, dirize par Prezidan Wavel Ramkalawan, pour sa bon performans pandan sa dernyen 3an.

Nou Prezidan i en dimoun ki reste konekte ek son pep e i touzour pare pou melanz ek tou dimoun. Menm resaman nou'n vwar li tre konfortab pe anmize dan en *show* lanmizik *reggae* parmi son pep. Zanmen nou'n deza vwar en tel keksoz parey dan listwar Sesel, Mr Speaker.

(APPLAUSE)

HON GEORGES ROMAIN

Mr Speaker, nou Prezidan i enn ki war tre lwen. E nou konnen ki nou pei i lo en bon semen avek li koman nou dirizan. E fodre nou kontinyen avek sa bon travay.

Mon profite pou remersi tou dimoun dan Gouvernman, enkli sekter prive, ki pe fer en gran kontribisyon dan nou lekonomi. Sesel i pour tou, Sesel i pour nou tou e i responsabilite tou dimoun pou anmenn plis progre dan nou pei.

A sa pwen, mon oule osi profite pou remersi Miss Shirley Mussard, DA Anse Etoile ek son tim, ansanm ek mon *Clerk*, Mrs Doreen

Dugasse pour sa travay ki nou pe fer pour nou distrik.

San oubliy tou zabitan Anse Etoile. Mersi pour zot sipor ki zot ankor pe kontinyen donn nou, pou nou kapab vwar plis devlopman dan nou distrik.

Dan 2024, i annan bokou proze ki nou pe anmennen pou nou distrik. Enkli, proze *flat* ki konpri 24-*unit* ki'n deza fini demare. Lagrandisman bann semen segonder. Detrwa Proze *Bus Shelter*. Amelyor nou bann *bin sites*. Konstriksyon nou nouvo Bazar Anse Etoile ki pa'n materialize an 2023.

E la, nou'n demar travay pou ogmant vizibilite partou dan Anse Etoile pou amelyor sekirite pour bann motoris ek lezot proze ankor Mr Speaker.

Mon priye ki Bondye i a touzour kontinyen beni nou pei, e gid nou pou fer bann bon desizyon dan lentere pei.

Mon priye ki lannen 2024 i ava annan plis boner pour tou Seselwa. E ki Bondye i a kontinyen protez nou pei. Mersi bokou Mr Speaker.

(APPLAUSE)

MR SPEAKER

Mersi Onorab. Laparol pour Onorab Churchill Gill.

(APPLAUSE)

HON CHURCHILL GILL

Mersi Mr Speaker. Bonn apre midi tou Manm Onorab. Bonn apre midi tou dimoun ki pe swiv Lasanble. Bonn apre midi tou zabitan Baie Ste Anne.

Mr Speaker, ou a permet mwan avan mon kontinyen, mon a zis fer 2 koreksyon ki Onorab ki'n koz avan mwan, in fer sorti.

Enn, Onorab Vidot ti fer sorti pwen lo *allowance* ki bann Minis pe donnen. Non pa zot saler, akoz Minis Derjacques ti vin donn detay tou *allowance* ki Minis i gannyen dan Lasanble.

(APPLAUSE)

HON CHURCHILL GILL

Dezyenm, ler eleksyon Oktob 2024 ti fini. 2020 pardon, *LDS* ti pran pouvwar, Lasose Baie Ste Anne ti'n fini fer.

(APPLAUSE)

HON CHURCHILL GILL

Sel keksoz ki *LDS* in fer ler in pran pouvwar, se in met sa lenfrastriktir lo sa lasose, ki deza i en problem pou nou, akoz i tro pti, pti.

(APPLAUSE)

HON CHURCHILL GILL

Mr Speaker, premyerman, mon pe demann tou Seselwa pou reflexir lo 2 senp kestyon.

Eski nou'n vremen ganny en kontrandi lo vre Leta Nasyon Seselwa? Vwar vre direksyon kote ki sa pei pe ale?

Eski diskour in esey adres konsern ki bokou sitwayen Seselwa ozordi pe fer fas avek, espesyalman bann ki pli vilnerab?

Malerezman, dapre sondaz, bokou Seselwa pe dir zot pa'n tann en vre kontrandi. Zot pa'n konpran kote nou pei pe ale. Napa okenn direksyon kler e konkret.

Mazorite Seselwa pe dir zot pe viv dan en kosmar, ki de zour an zour i vin pli terib. Natirelman, zis sa ki pe fer fas avek sa sityasyon ki pou konpran sa. Seselwa pe kontinyelman demande kan eski zot pou vwar en lafen avek sa kosmar?

Mr Speaker, ozordi lekonomi Sesel an zeneral i enkyetan. An partikilye, nou Lendistri Tourist. Vi ki Praslin, 80poursan aktivite ekonomik i depan lo sa lendistri, mon profite pou alert Lotorite konsernen, ki si nou pa fer atansyon, nou lendistri pou antre dan *ICU*.

Konsekaman, nou bann pei konpetiter dan larezyon pou kontinyen benefisye an gran parti lo *market share* dan Losean Endyen.

San pran kont lezot destinasyon ki osi konpetitiv

ki nou, avek prodwi ase similer, me pri pli afordab. E sa i annan en lenpak direk lo bann pti letablisman Seselwa.

Nou'n tann donn leksplikasyon statistik. Me sa bann leksplikasyon pa pe vremen donn Seselwa en vre portre lakantite arive parey i ete.

Dan plas esey eksplik statistik, aköz nou pa ganny dir ki kantite reveni Sesel in anmase dan sa bann peryod ki nou pe donn statistik?

(APPLAUSE)

HON CHURCHILL GILL

Nou kapab pe koz lo 350mil touris in antre Sesel. Me an term reveni, Sesel pa'n vremen anmas okenn sonm sibstansyel pou zistifye sa bann statistik.

Mr Speaker, Seselwa i enterese avek reveni, zisteman aköz se reveni ki primordyal pour nou pei e lekonomi pei an zeneral.

Me Sesel konman en destinasyon, nou'n swazir sa letan pour nou entrodwir plizyer kou adisyannel. *Levy* pour lanvironnman, *passenger port fees*.

Sa larzan pou adisyannelman, sa bann menm larzan ki ti pou ganny depanse atraver aktivite bann lezot diferan pti biznes ki osi depan lo touris. Me i pe al dan

kof Gouvernman. Eski i pa ti ava meyer al dan pos biznes Seselwa?

(APPLAUSE)

HON CHURCHILL GILL

An pasan, nou bezwen mazin pri tiket tre eleve atraver *Air Seychelles* pour larout Praslin, Mahe, ale e retournen.

Mr Speaker, tou sa bann desizyon pa pe ed nou Lendistri Touris ditou. I met an kestyon ki vre direksyon konman en pei, nou le anmenn sa Lendistri Touris.

Nou pa'n ganny dir ki fason ki letablisman Seselwa, pti e mwayen operater, pou ganny gete avek bi konpran zot dilenm ozordi.

Mr Speaker, sa *levy* i annan en lenpak direk lo biznes group fanmir ki ti abitye vin Sesel. Espesyalman dan letan vakans Lerop. E menm bann *staff* ki travay dan sa lendistri, zot pou nepli ganny okenn *tips*. Tou pe al dan *levy*.

Mr Speaker, Sekter Lapes Lendistri Ton, pe fer fas avek serten defi. Me pep Seselwa pa pe ganny enformen ki vremen pe pase dan sa lendistri.

I annan serten konpanyen ki'n bouz *Madagascar*, avek bi pou fer zot loperasyon *Madagascar*. Menm zot lenstiti resers ki ti

pe investir bokou larzan dan resers Sesel, zot in fermen.

Ki sa i vedir pour Sesel? Kwa ki pe pous sa bann konpanyen pou pran tel desizyon? Mr Speaker, eski sa i en lendikasyon ki nou stok pwason in redwir dan en fason konsiderab?

Kestyon alor. Ki Gouvernman ek Minister konsernen pe fer pou adres sa sityasyon? Eski pou annan ankor bato ki pou aret lapas dan delo Sesel?

Mr Speaker, donnen lenportans sa lendistri pour Sesel, sa bann kestyon i devret ganny en larepons, an tenir kont lenpak ki sa sityasyon pou annan lo lekonomi Sesel.

Minis responsab pour Lagrikiltir ti vin devan Lasanble, dir nou ki i annan en plan konpreansiv pou devlop lagrikiltir dan Sesel. 4 lannen pli tar, fermye i ankor pe ganny bokou difikilte pou vann zot prodwi.

Fermye i vwar zot pe zet serten prodwi ki pa'n kapab ganny vann. Fermye i vwar zot dan e konpetisyon feros avek prodwi enporte. Lakantite lenportasyon in kontinyen ogmante. Pri prodwi enporte i kout bokou pli bon marse ki prodwi lokal.

Kwa ki pe ganny fer lo sa size lenportasyon, avek bi ed nou bann fermye vann zot prodwi pli byen? *Store*

lagrikiltir i kontinyen annan mankman stok. Parmi bann stok, i menm annan prodwi ki'n ekspire.

Dan mon distrik, laboratwar *Cap Samy* ki'n ganny fer renovasyon 3an pase, i ankor fermen aköz napa lekipman. Fermye pa kapab ganny akse avek okenn servis. Zot bezwen rod lezot fason pou touy zot zannimo.

I annan dimoun ki pe esper later lagrikiltir depi sa dernyen 3an. Zot ankor pe esper en larepons. Napa larepons.

Mr Speaker, kestyon. Eski sa plan konpreansiv pour lagrikiltir i vremen konpreansiv? Eski bann fermye pe benefisye pli byen avek sa plan konpreansiv, oubyen zot pe ganny plis difikilte?

Mr Speaker, bokou fermye zot dir ou ki zot pli dan mal ki zot ti ete avan. Minis silvouple, get dan sityasyon tou nou bann fermye Seselwa.

Mr Speaker, sport lo Praslin i enkyetan. Bann atlet pe fer fas avek bokou defi. Swa an term lenfrastruktir e lezot sipor ki zot bezwen.

Mr Speaker, sa bann defi pa pe kontribye pour spor lo Praslin kontinyen devlope dan en fason konsistan, malgre bann *coach* pour diferan disiplin pe fer zot mye avek preski naryen.

Mr Speaker, i annan en gran disparite dan lafason ki spor i ganny zere lo Praslin, konpare avek Mahe. Sa kestyon disparite i devret ganny adrese dan en fason tre serye par Minis ek zofisye konsernen.

(APPLAUSE)

HON CHURCHILL GILL

Silvouple, annou aret pran tou nou letan, zis pe koz lo ki manner pou fer plan, program ek stratezi.

(APPLAUSE)

HON CHURCHILL GILL

Mon sizere ki nou bouz ver aksyon. *Sportsmen* in ganny ase. *Coach* pe rod sipor neserer pou kontinyen fer zot bon travay. Fodre note, ki malgre tou sa bann difikilte, bann *coach* lo Praslin zot delivre. Rezilta i la pou koz pour zot menm.

Mr Speaker, kestyon. Eski nou bann *coach* pe ganny rekonnet? Eski zot pe ganny tou benefis ki zot devret gannyen? Eski benefis bann *coach* lo Praslin i parey avek bann *coach* lo Mahe?

Mon napa okenn dout ki zot bann problem e konsern i devret ganny adrese imedyatman, si nou swete ganny meyer rezilta.

Mr Speaker, lo kestyon Bidze 2024 pei. Tou Seselwa in fini konpran ki Leta Lanasyon Seselwa ozordi, demen e dan lavenir, i depan en kantite lo realizasyon bidzeter en pei.

Alor, mon ti ava ekspekte ki dan son ladres, Prezidan ti ava abord serten konponan enportan Bidze 2024. Me i regretab, naryen pa'n ganny dir lo sa Bidze 2024 pei.

(APPLAUSE)

HON CHURCHILL GILL

Mr Speaker, alors kestyon ki'n oblize demande, baze lo leksperyans sa 3 dernyen lannen 2021, 2022, 2023. Eski tou sa bann prozeksyon pou kapab ganny realize?

Ki kantite sipor finansyel ki Labank Mondyal e lezot lorganizasyon enternasyonal in donn Sesel, avek bi soutenir prozeksyon bidzeter 2024, donner tou sa bann lensertitid ki lemond pe eksperyanse?

Eski prozeksyon repeyman det pei pou ganny realize parey ti'n prevwar? Oubyen, nou pou bezwen etidye posibilite pou ganny en lot louvertir pou revwar kalandriye term repeyman det Sesel?

Egalman Mr Speaker, i osi enportan pou konnen ki kantite larzan i annan dan rezerv Sesel ozordi. Eski i

annan larzan ki'n ganny tire dan rezerv pei resaman?

Ki'n ganny fer avek sa bann larzan, si in ganny tire dan rezerv pei? Larzan ki pei i annan dan rezerv ozordi, ki kantite letan i kapab soutenir Seselwa? Mr Speaker, Seselwa i bezwen larepons pour sa bann keston.

Dan sa nouvo demars pou aprofondi demokrasi dan konteks leta Seselwa, mon konvenki ki i tre enportan pour Seselwa konn tou detay sa bann lenformasyon. E sa zisteman, i sa fason pour nou Seselwa apresye e konpran vre leta nou pei.

Mr Speaker, ler mon koz avek plizyer dimoun dan kominote, zot fer resorti ki sityasyon ekonomik famiyal Seselwa i enn ki reprezant pli gro defi, ki okenn fanmir Seselwa in fer fas avek, apre bokou lannen.

Ozordi, en gran poursantaz fanmir Seselwa, zot dekrir zot realite ekonomik finansyel konman terib, ensiporab. Mr Speaker, pour mwan, sa i en vre santiyon leta lanasyon Seselwa.

(APPLAUSE)

HON CHURCHILL GILL

Mr Speaker, semen depi *Vallée de Mai* ziska kot Labank ABSA, i dan en leta vreman deplorab.

An tenir kont tou kontribisyon *road tax* ki bann propriyeter transport lo Praslin i peye. Mon panse ki ti devret annan en programm byen planifye, ki donn bann lendikasyon kan ki semen i devret ganny remet sirfas lo la.

Mon dir sa, akoz personn pa bezwen ganny fer rapel ki Praslin i enn parmi bann zil touristik tre popiler. Alor, mentenir en o nivo standar semen i en nesesite.

Mr Speaker, ler ou pre avek ou elektora, ou konn zot moman lazwa. Ou osi konn zot moman tristes, sagrinasyon. Ou osi konnen, kan ki zot pe viv dan dezespwar. Pe swete, priye, kan en lot sanzman pou arive.

(APPLAUSE)

HON CHURCHILL GILL

E si konman en dirizan ki pe diriz sosyete, si ou konpran byen ou pep, ou pa zanmen - mon repete, ou pa zanmen koup lasistans ki endispansab. Ki pour plizyer lannen, in soutenir plizyer fanmir pli vilnerab dan sosyete. Mon pe koz sosyete Seselwa, Mr Speaker.

(APPLAUSE)

HON CHURCHILL GILL

Domaz in fini ganny fer. I regretab, malgre ozordi nou

vwar en retourn an aryer lo sa desizyon lasistans sosyal.

Sa pou kout Gouvernman *LDS* byen ser. Sa pep ki zot in fer soufer, la baz ki zot pe elimin gaspiyaz e labi. Wi, i pou kout zot byen ser, dan en lavenir byen pros.

(APPLAUSE)

HON CHURCHILL GILL

Mr Speaker, soufrans nou sekter vilnerab dan sosyete Seselwa ozordi, i reflekte dan en fason tre vizib, Leta Lanasyon Seselwa.

Ki bokou nou, ki refize pou trouv kler, malgre nou pa aveg. Zwe pa trouve, pa tande pa sanz nanryen dan sa realite lavi ki bokou nou bann ser, frer Seselwa pe eksperyanse, lannwit konman lizour, toulezour.

Legzanp devan nou, tou nou bann dimoun aze in ganny kit ater depi 2020.

(APPLAUSE)

HON CHURCHILL GILL

La nou 2024, zot ankor ater. Zot pa'n ganny okenn ogmantasyon. Eski sa i lafason pour Ladministrasyon tret zot?

Mr Speaker, Lopital Baie Ste Anne i enn parmi bann lopital ki'n ganny plis vizite dan sa dernyen 3an. Me

lakantite defi i kontinyen reste parey.

Malgre mon'n anmenn bokou kestyon isi dan Lasanble ki Minis in vin reponn, tou defi i ankor reste parey. Napa progre. Napa amelyorasyon.

(APPLAUSE)

HON CHURCHILL GILL

Mr Speaker, kan eski zabitan Praslin pou kapab finalman vwar ki sa bann defayans kot lopital Baie Ste Anne i ganny adrese?

Leta Lopital Baie Ste Anne i egalman reflekte leta lasante, Minister Lasante lo nivo nasyonal. I en levantay Leta Lanasyon Seselwa, ki bezwen al rod zot lasante dan diferan klinik, lopital, partou dan Sesel.

Egalman, dan okenn sirkonstans, serten mal entansyonnen pa kapab dir nou pe atak nou bann travayer Lasante.

Sa i pou en fo preteks. Travayer i travay avek zouti, lekipman, latizann ki zot ganny donner. Zot pa kapab envant ni lekipman, ni latizann. Zot travay tre dir avek sa ki zot ganny donner dan servis lasante Seselwa.

Felisitasyon e bravo, tou nou bann travayer Lasante, ki determinen...

(APPLAUSE)

HON CHURCHILL GILL

...konman bann profesyonnel dan zot domenn respektif.

Mr Speaker, en regar lo size materyo konstriksyon lo Praslin. I en manifestasyon vre leta Pralinwa, spesifikman dan sekter konstriksyon, dan sa moman aktyel.

Ozordi, kontrakter Pralinwa i tre konsernen, lo provizyon materyo konstriksyon pou zot kapab fer zot travay. Sa sityasyon pe fer ki zot ganny bokou retar pou delivre travay proze, dan letan ki'n tonm dakor lo la avek kliyan. I kree fristrasyon ki pa nesese.

Mr Speaker, i mon swe ki bann konpanyen furniser ava fer le nesese pour ki sa problem i ganny adrese dan en fason ase vit, avek bi pou soulaz bann kontrakter konstriksyon.

Mr Speaker, dan lespri kontinite ant Ladministrasyon e Gouvernman dan en pei, i normal pou erite. Parey in ganny fer sorti dan diskour Leta Lanasyon. Spesyalman lo bann proze dan distrik Baie Ste Anne.

Par egzanp, Gouvernman ozordi in erit. Peyman konpansasyon PUC. Semen Salazi. Nouvo teren pou fer *land bank* Salazi. Proze semen pou al kot fanmir Brioche. Tou

rikord i dan seksyon proze Minister e kopi dan Ladministrasyon distrik Baie Ste Anne.

Stasyon teste transpor lo Praslin. Semen *Pasquièr*. Teren pou fer Proze Kato Nwar. Kordgard Baie Ste Anne, ki zabitan i ankor pe espere, menm si i'n ganny erite depi 2020.

Mr Speaker, sa paragraf ki mon pe al fer sorti, en paragraf ki mon'n repete dan dernyen 2 Leta Lanasyon. E la i fer trwazyenm.

Mon oule atir latansyon sa Ladministrasyon konsernan zabitan Praslin ek La Digue, konmkwa nou tou lo sa 2 zil, nou ankor pe pey keksoz pli ser ki Mahe.

Kan ki sa Ladministrasyon pou get dan sa problem? Kan ki zabitan Praslin ek La Digue, pou ganny en soulazman reel e dirab?

(APPLAUSE)

HON CHURCHILL GILL

Konbyen letan ankor ki zabitan sa 2 zil pou kontinyen sibir sa fardo pri lavi ser?

(APPLAUSE)

HON CHURCHILL GILL

Mr Speaker, dan repons Bidze, mon ti soumet en demann tre enportan avek bann Minis,

pou konmans vin vwar dimoun lo Praslin ek La Digue, parey zot vwar zabitan lo Mahe.

Sa vizit i posib, akoz dan sak zot Bidze, i annan en provizyon pour *domestic travel airfare*. Silvouple, servi sa pou donn en zour pou zot vwar zabitan Praslin ek La Digue. I sel fason, pou zot konpran vre soufrans sa bann dimoun.

(APPLAUSE)

HON CHURCHILL GILL

Mr Speaker, tou dimoun Sesel i konnen ki Praslin i depan bokou lo larzan depanse dan plizyer aktivite touris, pour lekonomi zil marse, an term lanplwa e biznes.

Sa sekter pe seryezman ganny afekte. Konsekaman, biznes lo Praslin pe ganny afekte. E pou kontinyen ganny afekte dan le fitir, si naryen pa ganny fer.

Mr Speaker, tou biznes lo Praslin i devret kapab ganny en bout sa gato ki pe ganny kwi Sesel, dan nou Lendistri Touris.

(APPLAUSE)

HON CHURCHILL GILL

E la mon pe koz pour sa bann biznes swivan:-

<i>Guest</i>	<i>House.</i>
<i>Ekskirsyon. Passenger Ferry</i>	
<i>baze lo Praslin. Dive Centre.</i>	

Restoran. Vander fri. Artizan. Artis. *Taxi Drivers. Omnibus. Car Hires. Gid pour Nature Reserve. Take away venders;*

Nou tou ansanm, nou bezwen kontinyen pouse, pou nou vwar en solisyon dan sa lendistri tre enportan pour zil Praslin.

Mr Speaker, pour konklizyon, i annan 3 parol ki'n ganny dir dan diskour Leta Lanasyon, ki bezwen ganny met an *context* dan son realite.

Premye se sa mo 'koz laverite'. Mr Speaker, eski senserman pep Seselwa in ganny dir tou laverite par Sef Deta, depi 2020?

Dezyenmman, sa mo 'linite'. Eski aksyon e desizyon ki'n ganny pran par Sef Deta depi 2020, pe vremen anmenn okenn linite dan nou pei Sesel?

Trwazyenmman, se sa mo 'sabotaz'. En travayer sekter piblik, ler swadizan i fer sabotaz, in ganny *warning* ki i pou ganny met deor dan son travay.

Mr Speaker, kekyon fondamantal e ekstrememan enportan pou demande, se kwa ki Lepep Seselwa i devret fer ler i santi, oubyen i vwar son Sef Deta pe sabotaz son pei?

(APPLAUSE)

HON CHURCHILL GILL

Atraver bokou move desizyon ki'n ganny pran, ki konpromiz lekonomi pei. Ki konpromi prosperite biznes dan pei. Ki konpromiz lavenir nou pei. Ki konpromiz fason viv sa pep, dan en fason degradab.

Mr Speaker, Sesel i nou pei. Nou tou ansanm, nou bezwen dan linite, pou sey en fwa pour tou met en Sesel avan, dan tou keksoz. Ralye pep Seselwa pou re batir Sesel, kree plis larises.

Kondisyon, se pour ki sak zanzan ozordi, demen, dan le fitir, i kapab kontinyen zourir en morso sa larises pei dan en fason ekitab.

Pou fer sa arive Mr Speaker, se pa lot ki *United Seychelles...*

ALL US MEMBERS

Sel opsyon pour Sesel!

HON CHURCHILL GILL

Mersi Mr Speaker.

(APPLAUSE)

MR SPEAKER

Mersi Onorab. Lasanble a pran en poz la. E nou a rebran. Nou a rebran repons 3er. Nou a rebran repons 4er. Mersi.

(BREAK)

MR SPEAKER

Laparol pou Onorab Waven William.

HON WAVEN WILLIAM

Mersi Mr Speaker. Mon remerci Bondye ki mon vivan e an bonn sante. Mon remerci li pou son lagras e faver touzour lo nou pei. Tou louanz e laglwar i pou li tousel Mr Speaker. Mr Speaker, zom pa viv par dipen tousel. Me par tou parol ki sorti dan labous Bondye. Depi kreasyon zom.

Dan konteks devlopman nasyonal, an fas avek realite devlopman lemonn frer ek ser Seselwa annou annan gratitud anver nou Bondye. En legzanp se sikonstans e ler ki leksplozyon CCCL ti arive, prenon kont si ti'n ariv dan en moman kot sirkilasyon dimoun ti lo son *peak* Providence.

Mr Speaker, mon swe senser se ki tou sa ki'n ganny afekte zot reganny zot lavi normal. E tou sa posibilite posib pou zot retourn dan *normal say*.

Mr Speaker, performans lekonomi Sesel i lo bon semen. I pa mon lenvansyon ouswa en zistwar ki mon pe rakonte. Se sa laverite ki bann eksper ekonomi mondyal, tel parey Fon Monneter Enternasyonal, Labank Mondyal e Lorganizasyon lekonomi korperasyon devlopman zot dir nou.

Prezidan i osi dir enkli Minis Finans. I annan ki pe dir si pei pe fer sitan byen, aköz pa ogmant saler. Aköz pa donn bann lezot benefis parey o paravan.

Mr Speaker, sa menm Lopozisyon ki responsab pou bann diferan negligans dan lepase, tel parey levennman polisyon La Misere, *fungus* Libreri Nasyonal, Arsiv, stasyon elektrisite Baie Ste Anne Praslin parmi lezot.

Kot R2 milyon i bezwen ganny peye ozordi. Pa fini sa plizyer travay renovasyon lo fasilite nasyonal sportif enkli lezot lenfrastruktir anba zot *watch* ki ti pe kout milyon pou repare.

Zot ankor pe sey tou pou met bar dan larou sa Ladministrasyon pou fer progre. Frer e ser Seselwa, Lopozisyon pe viv lo zot linyorans, lo zot febles e lo zot soufrans ek en gran lekspektasyon pou zot retourn o pouvwar.

En gran *US* i dir mwan ki sa se en kalite politik ki'n perdi son relevans. E ki parti Lopozisyon i vreman krwar ki Seselwa i nepli annan lentelizans.

I kontinyen dir mwan ki *US* nepli opsyon relevan pou Sesel. Petet sel opsyon pou serten ki fou ouswa fol an 2025.

(APPLAUSE)

HON WAVEN WILLIAM

Mr Speaker, en Gouvernman responsab, en Gouvernman serye ki konnen ki bor i sorti pou ariv kot i ete. En Gouvernman ki pe swivre tou sa bann lafors e lenfliyans lo lekonomi mondyal. Sirtou lenpak *COVID*, lenpak konfli ant Larisi e *Ukraine*. Lenpak mondyal lager ant *Izrael* avek *Hamas*. Tansyon dan lanmer rouz ki pe enpakte lo nou transpor maritim e lo kou lavi.

Sa Gouvernman responsab ki'n pran bann desizyon e mezir ekonomi pridan pou lekonomi transform dan sa ki i ete ozordi.

Frer e ser Seselwa, e etandan ki nou sa pti sou distrik dan sa vilaz global nou pou bezwen konpran e aksepte nou bann febles.

Pou bezwen konpran ki nou, o moman Gouvernman nou bezwen solider pou reste rezilyan e soutenab. Si vreman transpor ti bezwen pas lo *runway* erport pou degaz lasasen. Sel Seselwa ki'n konplent se *Leader* Lopozisyon.

Me a sa bann sitwayen ki ti pe esper en solisyon pou kontinyen zot larout Mr Speaker, zot pa'n fer konplent. Aköz zot in vwar en solisyon.

Mr Speaker, Prezidan i pa dan biznes vin fer en dezyenm diskour Bidze 2024. I annan konfyans dan Minis Finans, e son zenn lekup profesyonnel. Prezidan koman en dirizan ki ofet ek sor sa bann diferans kous popilasyon in koze e met a latansyon diferan size enportan pou sa pep analize pou azir koman fodre. In pozitiv dan son lapros.

Mr Speaker, sa 2 kestyon senp ki Onorab Gill in demande i dan plan Bidze 2024. Kot Onorab Gill, parey ek tou Manm ti ganny sans koz lo la. Mr Speaker, i posib in ekoute. In ekout Minis, me i pa'n tande.

(Laughter)

HON WAVEN WILLIAM

Ler ou pa tande ou kapab dir nenport kwa. Akoz ou krwar ou sourd.

(Laughter)

(APPLAUSE)

HON WAVEN WILLIAM

Swa i avek Lepep Seselwa. Ouswa en pozitiv, ouswa negativ an mezir koman en nasyon pou batir sa pei.

Mon pou sezi sa loportinite e pa rat sa sans pou ranforsi lo la, dan lentere nasyonal.

Me pa ek en destinasyon politik ki mon anvi. Me pou onor sa langazman politik e manda ki pep Grand Anse in konfyete mwan. Premye sezi ki mon anvi touse Mr Speaker, se sa size linite.

Mr Speaker, linite si i pa ganny ranforsi e batir lo la i pou met pei retar. Polariz popilasyon, senm divizyon, kre lensertitid e anmenn avek li persepsyon enstabilite dan pei, dan kominote ant vwazen ek vwazen. E parmi manm fanmir.

I ti en pe difisil koman en ansyen Manm US pou dizer sa moto "Sesel pour tou son zanfan" e lespri pozitiv Prezidan, pou reziste lekspektasyon Manm LDS pou travay ek siporter US dan servis piblik Mr Speaker.

Mr Speaker, Prezidan in fer li ek en leker kler, ek en lapros pridan zisteman pou ranforsi linite. Kre sa lanvironnman pou rekonsilyasyon nasyonal e lape. Setou.

Politisyen i bezwen a tou pri ini lo serten fe e realite Sesel dan lentere nasyonal Mr Speaker. Rimer, tir realite an deor konteks dan zot fason fer politik koman en Lopozisyon bezwen sanze, si vremen nou anvi pep ini e solider anver son patri.

Se laverite ki primordyal pou dan sa konstriksyon

fondasyon, rekonsilyasyon e pou konstri kad linite nasyonal. Nou pe devlope wi, nou pe aspire viv parey Ameriken ouswa Eropéen san tenir kont sa laspe vilnerabilite nou pei.

Soutenabilite plizyer stil e fason fer dan en Pti Leta Zil. I enportan ki sa refleksyon i ganny fer par tou zanfan Seselwa.

Tou i permetab dan lavi. Eski tou i benefisyab ver devlopman personnel e pei atraver nou bann diferan desizyon e aksyon? Eski nou pe mazin ouswa pran moman pou reflesir lo zot bann konsekans e lenpak zot bann rezilta.

Eski nou pe kapab ganny sa bon balans ant desizyon personnel e kolektiv pou al lwen ouswa pou limit nou progresyon ek en politik partizan ki fer nou aveg ek sa pli gran portre pei ouswa nou lanbisyon politik.

Pa in ler pou sa divizyon lespri e idolozi partizan ganny zete dan bin. Pran lo nou menm e dir ki Sesel i mon pei. Mon en zanfan Sesel. Aksepte ki sanzman Gouvernman i normal dan en pei demokratik.

Ki sanzman e transformasyon i bann prosis ki pou la pou lavi Mr Speaker. Annou pa les politik partizan fer nou viv dan *denial*.

Mr Speaker, pandan enn mon bann vizit, mon ti pas kot en lakour kot en fanmir i siport *United Seychelles*. En paran ki mon ti byen ek li, me ki letan mon ti sanz kote pa ti oule annan naryen pou fer ek mwan. Mon ti demann li “eski ou ankor ankoler avek mwan?” i ti dir mwan Mr Speaker, mon’n *move on*.

Mr Speaker, sa fason panse sa madanm i pozitiv. E la mon pou ankouraz tou bann ki’n les politik mark zot pou liber zot panse. Mazin kominote, mazin konstriksyon pei. E mazin bon legzanp pou nou zenerasyon batir lo la.

Me pa les zot lespri vin prizonnyen e ganny kontrole ek bann tandans negativ ek limit zot lanbisyon pou en Sesel. Mr Speaker, dan mon analiz Prezidan pe delivre lo son manda.

Lekonomi ki pli enportan ki i ti dir i pou refer, i pe fer li. Sak voyaz ki Prezidan in fer an mazorite i pa’n retourn ek lanmen vid. Ou krwar Lopozisyon i per ki sak fwa Prezidan i voyaze, aköz zot per son konpetans pou negosye larzan avek proze pou pei.

(APPLAUSE)

HON WAVEN WILLIAM

Mr Speaker, mon anv i ki nou Gouvernman, ki Gouvernman Sesel i kontinyen fer pli byen

ankor. Legzekitiv pe byen travay, e enn mon rol se pou li pou fer touzour pli byen.

Mon lot pwen Mr Speaker, se resours imen avek responsabilite.

Mr Speaker, en size enportan dan devlopman en pei se resours imen. En resours imen ki responsab i anmenn bokou valer azoute dan kof Leta e devlopman.

Resours imen i kot sa formasyon depi zanfan ziska larz konesans, ekstrememan enportan pou sa adilt dan servis piblik ouswa dan prive demen.

Mr Speaker, nou'n eksperyans bokou dekalaz dan lavi lafanmir. Enteripsyon, kontaminasyon e degradasyon kiltirel atraver devlopman e lentegrasyon ek larestan lemond. Move eleman tel parey stil lavi, kalite sanson, kalite koutim e fason fer e viv in destabiliz nou kiltir.

Alor ozordi bann mo pli frekan e apropiye pou zonn se adaptasyon e mitigasyon. Akoz parey granmoun in dir, ki botan, botan in fini ale. Les lebra tonbe, e repete ki botan, botan in fini ale pa pou anmenn nou lwen. E sirtou Mr Speaker, i pa benefisyab. Lavi i kontinyen, nou ki la. Annou fer nou mye pou repar, aziste, adapte e sey kontrol e *mitigate* bann defayans pou reste

rezilyan e soutenab koman en pti pei.

Paran, depi nesans bers byen zot zanfan. En pti kout roten pa pou touy li. Pik zip anler e al zour *miss* lekol pou mankman dan sa responsabilite paran pa veditribyen pou sosyete. Akoz konsekans pli tar. Rezilta sa zanfan i pou swa ou lafyerte, ouswa i pou ou regre ziska lanmor.

Mesaz alor, se annou met responsabilite avan gard dan nou bann desizyon e aksyon koman zanfan, zenes lafanmir, sitwayen e koman sa travayer.

Mr Speaker, lot size ki mon trouv vreman, *still* enportan se lanvironnman. Nou teritwar Sesel. Wi, nou'n ganny beni, me zonn pe enterfer ek tro bokou kreasyon Bondye dan en fason egois e iresponsab.

Mon'n dir egois e iresponsab, i pa zis Sesel me mondyal. Ki ozordi nou pe rekolte move fri nou bann tel desizyon egois pou fer plis larzan e iresponsab, akoz nou oubliy ouswa zwe oubliy konsekans lavenir.

Sanzman klima i gran parti i annan pou fer ek aksyon zonn, Mr Speaker. Mr Speaker, mon konsernen e mon demande ki *LWMA*, i revwar son fason administre *landfilled*. Ki Egzekitiv zot vin pli proaktiv an partenarya ek

sekte prive dan aktivite resiklaz.

Ki Gouvernman i lans en konpany asarnen pou vremen gard Sesel prop. Dan sa konteks i demann en revi konplet dan lapros travay. Frer ek ser Seselwa e zabitan Grand Anse Mahe, si nou kontan nou pei, kontan ler etranze i koz byen lo nou pei.

Letan viziter i retournen tou-le-z-an pou pas vakans Sesel. Annou pa zet nou salte an bonnavini. Annou *etre* responsab ek nou desarz lakaz. Servi bann bin byen.

Mon ankor demande ki Lotorite i revwar netwayaz larivyèr, lanmar, semen, e lans. Annou atak problemm avan i vin pli grav. Bann kontra i bezwen ganny revwar pou satisfè lekspektasyon sa nivo travay ki bann distrik i ekspekte.

Mr Speaker, tenir kont ki letan pou vin pli so e Egzekitiv koman fasiliter pou bezwen donn direksyon lo nouvo fason fer. Mon pe sizere ki kalite plan lakaz *housing estate*, zot fasilite ase lespas vantilasyon. Ki fasilite *emergency exist* lakaz i ganny byen enkorpoze ladan.

Ki dan bann *housing estate*, Minister Lakaz ek Later ek Minister Lanvironnman zot travay ansanm pou kot i posibil pou replant serten norm pye

dibwa. Sa a ede gard lafreser e lonbraz e gard nou ler fre.

Ki *PMC* i pran responsabilite pou enspekte tou sistenm difil elektrik dan plafon, pou kontrol dife koze par lasaler avek bann vye difil ki deteryore deplizanpli avek lasaler.

Ki sa konpany sak lakour annan son tenk delo i vin pro aktiv, anmezir ki tandans logmantasyon lasaler e lasesres i probab Mr Speaker.

Mon pa pe dir ki tou i *ok*. Me ki annan lespas pou touzour fer pli byen a nivo nasyonal e lokal dan distrik. Parti prenon ki ganny sa tit Lotorite Distrik , nou pe demande ki i annan en pli bon konprenezon, konsiltasyon e korperasyon dan servis e lenplimantasyon proze dan kominote.

Osi lontan ki nou pa asir sekirite zeneral nou kliyan Mr Speaker, dan Sesel. Se zimaz Sesel deor ki ganny *blacklisted* dan diferan fason. Departman Lanvironnman e Tourizm nou annan solisyon posibil dan distrik. Sey donn nou en pe letan, ekout nou e travay ek nou lo bann proze pilot ki distrik i krwar i kapab marse.

Nou pa pe demann Gouvernman pou fer tou. Se nou ki konn sa fron batay. Nou demann fasiliter pou asiste nou. Si ou napa ase

zofisye pou fer vizit, zot ki donn *spot fine* me zot pa pe fer li pou rezon ki zot mon pa konnen. *Empower* distrik ankor plis, e nou a donn zot en koudmen pou prezerv nou bol diri.

Partaz serten sa bann responsabilite ek distrik. Selman pa zis donn travay, me pa bliye pou ogmant Bidze distrik pou ofer sa servis pli efikas. Mazorite nou bann *housing estate*, serten fason zet salte pe ankouraz moustik e lera.

PMC fodre pran en rol pli proaktiv dan bann *housing estate*. Lotorite Distrik i anvi travay kot a kot ek *PMC*. Me *PMC* fodre reste motive dan sa langazman. Si nou'n tonm dakor lo desizyon pou en tel aksyon pa sanz lide san averti nou davans.

Mr Speaker, dan kominote Grand Anse Mahe, pandan sa letan distrik in benefisye ek plizyer proze an rezilta sa bon travay Prezidan e Legzekitiv. Mon remersi travay ki *Land Transport* in fer e pou kontinyen fer pou met nouvo sirfas lo semen e bous bann trou.

Mersi pou travay kontinyel pou fer trotwar, enstal drenaz, gard *rail*, met bann laglas kot i nesaser. Sa ki zabitan i vreman apresye e pe koz lo la, se ki mannyer semen primer in ganny klere

ki fer li pli an sekirite pou marse aswar.

Travay sa lannen pe kontinyen pou al dan bann semen segonder. Mon osi remersi Gouvernman e Minister Gouvernman Lokal pou realiz nou bann pti proze distrik tel parey fasilite akse semen, drenaz parmi lezot.

Louvraz i kontinyen sa lannen. Se pandan mon anvi ki lazans *SIA*, i ankor revwar lapros travay ek Lotorite Distrik pou ki lenformasyon presi i ganny donnen. En legzanp se sa proze koneksyon Vilaz Ex Troian ek sistenm tretman desarz vilaz Orchid.

Kot lenformasyon pa'n presi pou vreman konnen kan travay pou konplete. Mon demande ki avan kontrakter i kit *site*, ki en *joined site visit* i ganny fer pou asire ki louvraz ki'n ganny agree i fini ganny konplete.

Plizyer fwa kontrakter in ale, kit deryer plizyer keksoz ki ti kapab ganny rezourd atraver sa vizit konzwent. Sirtou kot i konsern drenaz, kot ler ou rezourd problemm en porsyon teren i al kre domaz pli lwen.

Kot i annan sa nesosite pou en lot faz proze pou satisfer kominote pli tar. Mon propoze ki *SIA* dan kad sa 80 *unit* lakaz ki pou ganny fer, ki plan agrandisman sa sistenm tretman desarz zot tenir kont

volim adisyonnèl dan plan final.

Mon osi demande, demann Minister Lakaz ek Later la ki en site pli apropiye in ganny idantifye pou fer en pli gro sistenm tretman desarz, ki pou deservi rezyon SCC *flat*, *Savy Estate*, plato Grand Anse, *Rivière Sèche*, krwaze Grand Anse e *flat BBC* e son lezalantour. Pou finaliz sa plan ki proze i a kapab ganny demare a lavenir.

An sa ki konsern sekirite distrik, mon demande ki Minister Zafer Entern i revwar Lafors Lapolis, ek bi pou pli byen kapab organiz travay nou bann zofisyè gard.

Sa mankman transpor, lekipman e latitud serten zofisyè *senior* bezwen ganny dil avek pou les sa lafors reponn a lekspektasyon sa pep e distrik.

Mr Speaker, mon pou remerci sa bann rezidan ki'n travay lo propozisyon pou en plan devlopman Grand Anse Mahe lo zalantour lans Grand Anse.

Plan i kot Lotorite *Planning*. E letan i ganny aprouve, zabitan pou ganny prezante sa plan dan en *meeting*. Zabitan ki anvi form parti sa devlopman, zot sans i la.

Atraver bann vizit mon pe vwar ki serten louvraz ki merit ganny fer par serten

lazans pa pe ganny fer ziska ler i annan en maler. In ler pou Gouvernman atraver Lotorite konsernen pou met en lord ek bann ki responsab pou met diferan difil lo poto pou pran zot responsabilite.

Fer zot fer vizit pou re aranz sa bann diferan difil ki pe tonbe, e poto ki pe baskile apre serten letan. Mon demande ki CAMS zot kontinyen angaze ek distrik pou enplimant proze ekskavasyon lanmar. Si nou'n komanse pa fer zis bout travay. Me plito annou annan en komitman lonterm e bann faz travay.

Mr Speaker, sa Gouvernman pe pas son letan fer plizyer *maintenance* lo diferan lenfrastruktir, Akoz zot in ganny neglize par mank konsistans dan travay ansyen Ladministrasyon.

Mr Speaker, mon propoze ki dan sak Minister e Lazans Gouvernman i annan bann pti lekip *maintenance* propriyete. Mr Speaker, parey dan lakour nou fer kot i annan en pti *crack*, nou aranze. Kot mwazi pe aparet, nou dil avek vitman parmi lezot.

Pti travay par egzanp penn, Mr Speaker, mon krwar si sak bann Minister ouswa Lazans Gouvernman zot fer sa i pou sov Gouvernman en ta larzan parey in arive dan lepase.

Mr Speaker, mon lot pwen se ki Gouvernman i rezourd sa lenzistis ki'n la tro bokou letan anba ansyen Ladministrasyon ziska konmela. Ki ek sipor Mrs Mohideen nou get sa zafer *bridge the gap* ant travayer ki annan bokou lannen leksperyans ek sa zenn profesyonnel ek son bagaz akademik.

Mazorite fwa, se sa enn ki napa sertifikata me annan konnesans ek leksperyans ki bezwen montre routin travay sa zenn *graduate* ouswa sa etranze letan i vini. Zot letan leksperyans e konesans bezwen ganny rekonpanse.

Ler i posibil konsider aziste zot saler pou bann ki vremen devoue e performan. Mr Speaker, Gouvernman i bezwen touzour pe rod solisyon. Sa i tre byen. Mon pa kont ki zot in swazir en sit Grand Anse Mahe, pti Barbarons pou met dinanmit, stok dinanmit.

Menm si US in sey lans en konpany kont dan laform en petisyon, mwan mon pe demann Legzekitiv pou en *site visit*. Laba zot a montre nou plan sa *bunker* e norm enternasyonal, e dan ki dele letan zot pou met anba later. Pou Lotorite Distrik swivre e donn pep sa konfor ki tou prekasyon posibil pe ganny pran.

Mr Speaker, mon met lanfaz lo la nou anvii ki sa i ganny fer. Akoz levennman CCCL Mr Speaker, pou touzour reste grave dan lespri Seselwa.

Mon demande, mon demann ek Minis Finans pou prezant en plan aksyon lo bann prosedir ki pou govern peyman konpansasyon La Misere. Lotorite Distrik i la pou ede si i neser ki asire ki sa prosesis ziska lafen i mars byen.

I annan serten pwen konsern ki dan moman apropriye i enportan zot port latansyon lo la, ki nou pou met devan zot byento.

An terminan Mr Speaker, mon'n ekout *Leader* minoriter bomaten, Parey mon'n toultan dir i kontan tir realite an deor konteks.

Envant zistwar pou maske son azanda politik. Nou konpran ki politisyen i bezwen fer politik. Me koz laverite. Ou dir ki Lopozisyon pa ganny konsilte. Mon dir ou'n rat sa sans pou form parti *nexus*, pran desizyon e aksyon.

Be ler ou ti deside al *MIA, missing in action* volonterman san ki Gouvernman in anpes ou vini. La mon koz lo Komite *Platinum* Mr Speaker, ki tou Seselwa i okouran i ti ganny sa lenvitasyon.

Ou parti in pas son letan zis *boycott*, fer lamars, krwar

ki Gouvernman i bezwen ekout e fer tou sa ki zot dir fer. Zot in zis al *AWOL* Mr Speaker. *Absence without leave*, par *boycott* preski tou levennman nasyonal ek bann leskiz anfantan.

Laport pa ankor frenmen, pran ou langazman politik e zwenn ek Prezidan. Pa ekspekte Prezidan flat ou.

(APPLAUSE)

HON WAVEN WILLIAM

Pep Seselwa in ganny ase ek sa kalite demagozi. Propagann, zwe lo soufrans e febles dimoun. Seselwa e en mazorite Manm *United Seychelles*, i anvi *move on* Mr Speaker. Zot anvi *move on*. Prezidan a latet Ladministrasyon pei in delivre depi ki in mont anler *State House*, sa lofis ki zot in fer Seselwa krwar ki *State House*, *LDS no way*.

Parey zot *sticker* “*LDS never again*” ki zot aktivis i met an misouk lo laport dimoun. O kontrer en madanm i dir mwan i pe al pourswiv zot pou met sa *sticker* lo son laport san son permisyon. San son permisyon Mr Speaker, letan i pa ti dan son lakaz.

Mr Speaker, sa madanm *US* ki’n *move on* ki apresye zefor travay Prezidan ek *LDS* dan governans i apresye sa

moto “Sesel pour tou son zanfan”.

I dir mwan ki li osi i pa pou zanmen les tonbe, Mr Speaker. E sa Mr Speaker, i pozitiv aköz lo sa kote latab nou osi nou pa pou zanmen les tonbe. Mersi Mr Speaker.

(APPLAUSE)

MR SPEAKER

Mersi Onorab. Laparol pou Onorab Flory Larue.

HON FLORY LARUE

Bonn apremidi Mr Speaker. Bonn apremidi tou dimoun. Nou rebran koman en group Parلمانter pour fer fas avek nou lannen travay Lezislatif. Me sa lannen travay pa rebran parey tou lezot.

Pou premye fwa dan listwar nou Lasanble nou’n perdi en Manm, Miss Rosie Bistoquet ki ti ankor en *sitting Member* dan son pozisyon koman en *MNA*. Sa pert in pli difisil ankor aköz bann fe trazik otour son demer.

En koleg madanm tre dinamik ki ti anmenn bokou dan nou travay Lasanble. Nou dir li orevwar avek sa mesaz ‘*Fly high Rosie*’.

Mon ankor anvoy mon senser kondoleans pou tou son fanmir, zanmi ek aktivis parti *LDS* ki’n siport li dan son parkour politik dan Pointe Larue.

Mon osi mazin tou bann zabitan ek dimoun ki dan biznes ki'n ganny afekte avek sa leksplozyon CCCL ki ti arrive le 7 Desanm. Mon demann avek Lafors Lapolis, pou fer tou zot posibil pou met tou zefor pou anmenn en konklizyon avek zot lenvestigasyon pou ki zabitan sa rezyon e nou nasyon i ganny tou lenformasyon lo bann fe ki ti arive sa zour.

Mon remersye Gouvernman pou sa zefor ki in fer pou met en provizyon finansman a porte bann ki ti bezwen. Nou Gouvernman in *step up* pou apir son sitwayen dan sa moman difisil.

Mon gran lapresyasyon pour mon koleg Onorab Phillip Monthly ki depi zour sa lensidan i lo teren toulezour pour bann long erdtan pour asiste tou son zabitan, san leksepsyon.

Sa zour Nor Mahé ti osi sibir en dezas natirel avek en gran kantite lapli. Mon pas mon senser senpati avek bann fanmir ki'n perdi zot pros dan sa dezas. Sa dezas in anmenn dega kot bann lakour ek lenfrastruktir dan sa bann distrik. E ankor bann MNA sa bann rezyon, Lotorite Distrik e Gouvernman in vin a kote zabitan pou donn sipor pou ede.

Prezidan in dir ki vreman ti annan en korperasyon total

parmi sitwayen pour ede dan zot kominote e pour asiste kanmarad. Koman en nasyon nou'n vin ansanm atraver donasyon led finansyel ek lezot donasyon pour ed nou bann frer ki ti dan bezwen.

Mon salye tou bann ki'n partisip dan en fason ou en lot pou anmenn en lasistans. Sa lespri volontarya e sa lanmour pour byennet nou prosen i enn ki anmenn sa lespri pozitivite parmi nou sitwayen.

Sa bann sityasyon osi in montre nou serten defi. E enn byen kler se ki ler nou pa swiv bann regilasyon ki la pou protez nou ek nou kominote i annan serten ki pou pey konsekans, parfwa tre grav.

Bann regilasyon ki pei i met an plas, ki konsern bann norm konstriksyon pour bann miray, rigol, koup pye dibwa, koup lateras. Pa zet salte dan larivyer ek dan nou lanvironnman, tou sa i la pour nou proteksyon e proteksyon nou vwazen.

Sa lannen annou korpore avek bann Lotorite pour si i annan ankor dezas dan le fitir nou minimiz bann dega otour nou par swiv bann regilasyon ki govern sa bann keksoz. Gouvernman LDS in kontinyelman met lanfaz lo *rule of law*. Sa i pa an term zis krim lo semen avek vyolans, me osi anver respekte bann standar ki an plas.

Nou tou nou anvi en Sesel ki fonksyonn byen, e se la kot aksyon sakenn de nou i enportan pour pei antye. Koman en sitwayen responsab sakenn i fer son bout pou nou vin sa sosyete ki swiv *rule of law*.

Annou gard nou lakour prop, annou mars sa de pa ziska kot sa bin, annou met nou salte dan bin. Annou pa zet nou salte par lafnet, annou pa zet nou pake *chips* ater lo trotwar ler nou pe marse, annou rod en *pick up* pou deplas bann gro salte ziska kot *landfill* e non pa zet li dan bann ranpar, tel ki dan ranpar a kote semen Montagne Posee e lezot.

Si ou en propriyeter *pick up* ki pe transport bann keksoz materyo, kouver li koumsa i pa tonm lo semen e afekte transpor ou frer ek ou ser. Annou anmas nou salte apre en piknik pou li pa al dan nou zoli lanmer. Annou anmas nou salte ler nou al fer en pronmnad dan nou montanny.

Sesel i enn bann pli zoli pei o monn e sakenn nou i kapab fer son bout pou en meyer Sesel ki osi depann lo sa labote pour soutenir son Lendistri Tourism.

Gouvernman i a dan en meyer pozisyon pou li fer lezot laspe gard nou pei prop si nou, nou fer nou bout. Parey nou

fek tande ki en travay serye pou al ganny fer ek kontrakter ki anmas salte dan kominote avek en sistenm pli kler pou ki salte i ganny anmase a ler e kominote i reste prop.

Sa ki mon pe sey dir i ki Gouvernman se osi nou menm. Nou aksyon dan nou kominote toulezour i annan en lenpak lo ki mannyer nou pei i devlope e santiman nou bann vwazen otour nou. Latmosfer nou vwazinaz i osi depan lo nou.

Lanmizik for dan transpor ki park deor laboutik, lanmizik for dan bann *housing estate*. E lanmizik for dan bann kanton i anmenn lanmertim dan bann ki bezwen konstaman sibir.

Mon profite pou demann servis lapolis pou met lanfaz lo bann Regilasyon ki bezwen vin an plas pou ki zot kapab asiste bann zabitan ki pe soufer avek sa bann tel nwizans e zot ganny bann lekipman ki zot bezwen pou elimin sa fleo pou fer zot travay.

Me konsyans nou zabitan i devret zwe en rol pou anmenn pozitivite dan lavi toulezour. Leta nou Nasyon ozordi i fer ki bokou sa bann valer in perdi. Respe pou nou kominote e nou vwazen. Nou annan en lekspektasyon ek nou Gouvernman. Eski nou annan en lekspektasyon pou

nou lekor e kwa ki nou fer pou nou pei?

Sa lekspektasyon pou nou Gouvernman delivre, sirtou dan *civil service*, i osi montre ki manner Gouvernman se nou. Sakenn i annan son rol e se sa performans egzampler ki pou fer nou vin pli efikas e a lafen satisfere nou sitwayen. Plis zefor i kapab ganny servi pou idantifye defi e trouv solisyon si bann lezot keksoz in fini ganny etabli.

Mon tann en serten *Leader* politik koz lo en mank *leadership* akoz serten bann zofisyè pli o in al swiv en lantrennman *Dubai* pou kapab met zot tou lo menm paz pou kapab delivre lo nivo *leadership*. Devlopman sa bann *skill* dan nou bann *leaders* i montre ki nou Gouvernman i anvi zwenn sa lekspektasyon ki sitwayen i annan.

Eski sa *Leader* pe dir ki nou pa devret investir dan nou bann dimoun ki pran desizyon? Sa i en defayans ki Sesel in toultan annan Mr Speaker. 43an dimoun in vwar defi dan *Civil Service*. Sa ki dan Gouvernans pe rod fason pou kapab devlop bann ki annan sa responsabilite pou konpran byen zot rol e sirtou Mr Speaker, delivre pou pep Seselwa.

Mwan mon dir bravo bann zofisyè ki'n asiste sa kour. E mon espere ki sa lenvestisman ki pei in fer dan zot i a benefisyè tou nou sitwayen. Nou krwar dan nou bann *civil servants* e nou pe fer tou pou *empower* zot akoz nou pe rod solisyon pou nou piblik. Nou pa kapab kit keksoz manner in toultan etc.

Sa menm *Leader* i osi servi *ASP* pou fer politik bon marse. I en fe ki ti annan labi dan sa lazans, nou pa kapab inyore sa. In annan menm prosekisyon zofisyè ki'n tous en gran kantite larzan sa lazans e i trouv li dan prizon ozordi. Se sa ki sitwayen ti demande i arive. An lannen 2023, lazans in fer resers pou re-evalye bann benefis ki zot donnen.

Mon le anmenn dan latansyon sa *Leader* ki ti annan en *workshop* avek *CEO* Morin Mardi 13 Fevriye avek tou *MNAs*, *DAs* ek tou bann zofisyè sa lazans dan en sel lasal. Mrs Morin, ti fer en prezantasyon detaye pour eksplik tou bann nouvo benefis, formalite e dokimantasyon ki nesese pou akse led avek lazans. I premye fwa ki ledikasyon i ganny donnen avek tou bann ki lyez direk avek piblik, pou donn en gidans kler lo ki prosedir ki an plas.

Loportinite ti ganny donnen pou demann kestyon pou plis leklersisman e fer propozisyon avek bi retir bann baryer retar dan lenplimantasyon. Konplent i reste ki piblik i ganny demande pou anmenn dokimantasyon, e lazans in fer sa legzersis pour fer kler kwa ki neser koumsa bann Manm i konnen e akoz.

Lalis dokimantasyon pou *welfare assistance* kot ASP i lir koumsa, sa ki en dimoun i bezwen anmennen, si i pe rod *welfare assistance*.

En *ID Cards* pou tou mann dimoun dan son fanmir, dan sa *household*.

Lagreman *rent* si i pe lwe en landrwa.

Si sa dimoun pe travay i bezwen anmenn bann laprev. En *pay slip* ouswa son kontra lanplwa. Sa i aplik pou tou dimoun dan sa *household*.

Bil litilite pou sa *household*.

Lagreman *loan* si i annan ouswa si i aplikab.

Okenn lezot dokiman ki siport sa *claim* ki sa dimoun pe fer.

Sa lalis responsab ki nou Lazans ASP, i demann en sitwayen ki le akse led pou anmennen. Pa bliye, sa i larzan *taxpayers*. E pou le moman, se sa ki lazans i demande pou ganny akse avek en finansman. *LDS* in retir

faver dan led sosyal pou evite servi difikilte en fanmir, pou kontrol son sipor politik ek son vot.

Tou *MNA* in ganny anvoye sa prezantasyon antye, atraver zot *email*. Pou ki zot tou zot konnen ki mannyer i marse.

En lot *Leader* ki donn son pwennvi lo *speech SONA*, i met lanfaz lo lenportans ekout plis profesyonnel e non pa politisyen. Pourtan dan son pozisyon koman *Leader* en parti politik i en politisyen e i le dimoun ekout li, e vot pou li.

Leta nou Nasyon ozordi i fer ki nou sitwayen pa krwar dan zefor e louvraz ki en politisyen i fer. Me nou pa kapab re envant larou. Nou Konstitisyon i met bokou bann desizyon final nou pei dan lanmen politisyen.

Nou tou nou konnen dan lepase ki mannyer en dimoun ti antre dan politik pou vin en *MNA* ouswa pou vin en Minis. Plis lanfaz ozordi, plis lanfaz ti ganny mete ti ganny mete lo rol ki in zwe dan son parti olye son abilite pou delivre dan sa rol.

Sa i en keksoz ki Prezidan Ramkalawan in sey balanse, in konmans sa par met plis dimoun dan rol Minis ki annan bann konpetans dan son sekter respektif. In ganny kritike ki sa pa ti bann meyer kandida. Me eski bann ki

annan abilite ouswa bann kandida meyer ti vin devan pou propoz son lekor pou fer sa louvraz pou son pei?

Ozordi nou bann zenn e nou sitwayen pe demann plis dan abilite nou bann *leaders* pou fer meyer desizyon posib pou zot e nou pei e zot fitir. E nou koman en parti nou siport sa.

Me sa bann *leaders* ki nou pe egzize ki pei i gannyen i souvan bann zenn profesyonnel, ki menm si zot anvi fer sa parkour politik zot pa antre ladan akoz zot kalifikasyon i fer ki bann loportinite finansyel i pli atiran dan Sekter Prive. Sa move fason persevwar politisyen i osi afekte bann ki le vin devan.

Avan ki sa dimoun i vin dan politik i en profesyonnel. I ganny respe dan kominote e i annan en repitasyon dan son karyer. Kan i vin dan sa kad travay i ganny denigre, li ansanm ek son manman ek tou son fanmir zot met i dan en rigol, li menm li ki en voler.

I ganny akize ki i pe pran en lanvlop anba latab, me selman sa ki dir sa i napa okenn levidans pou anmenn devan pou montre ki sa i pe arive. Wi, saler i enportan menm si dimoun i kontinyen dir nou ki nou pe rod saler pou nou lekor.

Me sa i en realite ki dimoun pou bezwen fer fas avek. Ou le pli meyer politisyen ki annan, me sa i en louvraz. E sa enn ki pli meyer i ekspekte ki i ganny peye valer son konpetans pou li delivre dan son louvraz.

Nou bezwen dimoun ki pou zer pei dan en fason diferan avek fason ki in ganny zere dan lepase. Apre zis 3an edmi, nou pe seye fer en diferans dan ki mannyer nou pei i ganny gouvernen.

Nou pe ankouraz en sanzman dan fason fer, me sirtou dan fason panse e pou nou zwenn lekspektasyon. I annan ki pou konpran sa deba e i annan ki pa pou aksepte. Me deba nou bezwen fer.

Sa *leader* ki sorti dan Sekter Prive ki'n antre lo laplenn politik, ki'n annan pozisyon dan *Chamber of Commerce*, i pa'n zanmen anmenn sa deba li.

Bann ki kot *chamber* ozordi ti a bon fer sa deba. E envit sa ansyen manm pou fer en kontribisyon lo fason ki nou pou bouz devan. Sa i ava en bon linisyativ pou komans sa deba dan en fason profesyonnel e osi regard saler dan Sekter Prive.

Sa ki mon konnen i ki ler li sa dimoun ti etabli son biznes personnel, letan i ti fer son laplikasyon pou son biznes i ti soumet en fo

sertifika avek Lotorite. Sa i en fe, sa osi dan li menm i en deba ki bezwen ganny anmennen. Bann ki'n *burn the midnight oil* pa tro krwar, pa tro vwar sa koman en keksoz ki etik. Mon poz sa la! Si nou pe rod pli bon *leaders*, annou demann kestyon.

Sekter Prive i anploy en kantite Seselwa a kote Gouvernman koman en anplwayer. E mon asire ki laplipar i apresye travayer Seselwa. Mon demann zot osi pou antre dan sa deba lo saler e ekout pwennvi zot travayer lo lekspektasyon ki zot annan. Tou le de kote i annan en responsabilite.

Koman bann anplwayer zot bezwen annan respe e soutenir Lalwa Lanplwa. Koman travayer zot bezwen zwenn zot responsabilite osi pou fer sa biznes ganny en sikse li osi dan son fason respektif.

Sistenm ledikasyon i reste en defi. Gouvernman i montre son komitman anver ledikasyon nou bann trezor par donn sa Minister en pli gro porsyon nou Bidze. Anmezir ki sistenm i kontinyen marse plizyer opsyon pe ganny met an plas pou donn meyer loportinite posib pour tou nou zenn.

Ankor problem sosyal i afekte stabilite bann fanmir ki ganny reflekte par en mank

gidans moral. Nou vwar sa atraver medya sosyal kot vyolans i ganny servi pour regle diferans e en mank respe dan lakour lekol.

Mazorite nou zenn pa pran zot letid serye. I annan plizyer rezon me en mank sipor kot lakour ek lezot fleo sosyal i zwe en gran rol. Koman en pei nou bezwen inifye ansanm pou kree sa kominote ki ankouraz nou zenn pou pran zot letid a ker.

I osi annan pozitivite parmi nou bann etidyan. Bann ki vin bann *leaders* par partisip dan bann program an deor lekol. E pran bann rol tel ki vin en manm dan Lasanble Zenn ouswa zwenn en klib tel ki *Scouts, Duke of Edinburgh Award* fer en sport ouswa menm aprann zwe en lenstriman lanmizik.

Dan bann Lekol Leta i annan bann zenn ki sorti S5 avek bann rezilta vreman enpresyonan e eksepsyonnal. Sa i bann pozitivite ki fodre pa nou neglize, e mon salye zot ek zot fanmir pou sa bann lakonplisman. Souvan nou tann zot koze lo televizyon pou eksplik zot sikse e zot repet menm keksoz. Fer letan pou etidye par fer sakrifis.

Zot devouman anver zot lekor pou met zot letid premye i montre zot pozitivite anver zot fitir. En program televize ki swiv progre serten zenn

pandan zot parkour letid i kapab vin en lenspirasyon pou fer pli meyer par swiv legzanp.

Gouvernman Sesel in ekout bann zenn dan zot demann pou ganny en landrwa pou kapab met lanfaz lo zot letid e in reouver *National Library* apre ki i ti'n fermen pou bokou lannen.

Ler in reouver bokou bann liv ek dokiman resers in pouri dan bann *containers* lo konblaz enkli bokou dokiman arsiv ki'n perdi pou touzour, akoz napa ase responsabilite ki ti ganny mete dan zot stokaz.

Sa batiman i fer plizyer fonksyon e i donn loportinite pour anmenn lar ek lekspozisyon kiltirel osi pli pre avek piblik. Enn bann keksoz ki anmenn en serenite dan lavi nou pep, alor profite pou vin dekouver bann ekspozisyon e partisip dan bann aktivite ki *Library* Nasyonal i organize.

Koman en Gouvernman, *LDS* i osi met lanfaz lo byennet son pep pou li kapab detann. Bokou pe ganny fer pou nou devlop bann proze lwazir, tel ki Beau Vallon ek *Victoria Waterfront projects*.

Kot lespas ouver i disponib pou dimoun enterakte dan konfor modern e pou bann zenn annan en landrwa pou detann. Sa bann sit ti pe esper en devlopman nasyonal pou bokou lannen

anba bann Ladministrasyon avan.

Hon Pillay, atraver ou Mr Speaker, i dir ki i garanti ki 2 *Rehabilitation Center* ti pou'n fini ganny konstrir anba SS Herminie kot *APDAR*. Me devlopman pou lwazir, sport ek distraksyon pou zenn ti keksoz ki'n ganny inyore konpletman anba Ladministrasyon *US*. Ozordi se Ladministrasyon *LDS* ki pe met Bidze a kote pou adres sa bann defi.

SS, ti pe monte desann dan *first class* e manz *caviar* e pa ti pe pran traka bann zenn, sa dirizan i bliye ki i ti fer dan lepase. Ozordi son Manm ki pran direktiv ek li i vin dir nou ki pep Seselwa pou remet zot la. Pou fer *Rehabilitation Center* i ti bezwen al li menm *Portugal* ek tou son tim *business class* pe bwar *champagne* e *caviar* pou al aprann ki mannyer i pou enplimant program reabilitasyon. Ler i ti fer ti en bon fason fer. Ozordi i pa konpran ditou sa pratik.

Gouvernman pe met en plan pou en nouvo lopital pou deservi piblik dan en kad pli modern e pli efikas, tou an gardan an tet bann defi ki nou servis lasante pe fer fas avek. Lasante i en size ki sansib ozordi avek en kantite presyon lo sa servis.

Bann profesyonnel lasante ti menm fer en *workshop* pou adres en logmantasyon dan bann maladi non-kominikab an Out 2022, pou adres en logmantasyon dan sif lanmor dan pei.

Pandan lannen ki'n pase nou'n vwar dese soudan dan bann group larz bokou pli zenn dan popilasyon ki labitid. Mon espere ki Minister i vin devan e dir nou ki progre sa group profesyonnel in fer pou adres rezon deryer sa bann maladi e sirtou sa bann lanmor.

Otour lemonn ozordi i annan en logmantasyon dan sa bann kalite maladi, sirtou bann pou fer avek sirkilasyon disan.

Anmezir ki lemonn i bouz dan direksyon en vilaz global, nou vwar bann gran lorganizasyon pe donn gidans lo fason fer pou amelyor kominikasyon, sirtou dan *field* lasante. Dan sa travay Legzekitiv i siny bann Trete avek son bann Regilasyon ki fer nou oblize koman en pep pou sibir bann konsekans. Me latransparans i a la baz sa Ladministrasyon e popilasyon pe rod en lesplikasyon pli kler lo bann komitman ki'n ganny angaze ladan.

Isi dan Lasanble nou swa ratifye ouswa rezet sa dokiman. Mon sizere ki

Minister Lasante ansanm avek Minister Zafer Etranzer i fer disponib sa bann dokiman ki pei pe al sinyen *online*. Ki bann dat ki sa bann regilasyon i ganny aplike i kler.

Se zot piblik Seselwa ki bezwen enplimant sa bann Trete. Se zot ki pou pran vaksen si i annan, se zot ki bezwen ferm zot biznes si fodre. Se zot ki bezwen siport kanmarad, si nou rankontre sa bann sityasyon ankor.

Dan sa enn lagreman ki Sesel pou angaze avek *WHO* mon sizere ki Minis avek son bann teknisyen i zwenn piblik pou eklersi langazman pei e pep. Se sitwayen ki lavi i ganny afekte ler bann restriksyon i ganny enpoze.

Lasante endividi i son responsabilite. Nou koz lo *body autonomy* dan ledikasyon draw imen. La i sa moman ki Gouvernman i bezwen onor sa lotonomi e fer sa *platform* pou bann ki enterese pou adres sa.

Sa bann kalite deba i kontroversyel e difisil pou adrese. Me i annan bokou profesyonnel lasante otour lemonn ki pa dakor avek direksyon ki Lorganizasyon Lasante Mondyal pe pran.

I annan bokou bann ka legal ki pe ganny mete Ankour pour kestyonn bann desizyon ki bann Leta in pran de la par zot pep. Tou sa bann *facts* i

egziste e nou bezwen kontinyen vin en legzanp pour lemond pou adres bann pwen ki en diskisyon global.

Mon espere, atraver ou Mr Speaker, ki Onorab Pillay i pa bliye sa ki in dir ozordi. E i vin fer sa konversasyon ler in ariv ler e pa tay son responsabilite.

Onorab Georges in ankor eksplik li rol en *Leader* Lopoziyon dan sa pei. Si i negliz son devwar dan sa rol, i pa kapab vin demann pep Seselwa pou retourn zot o pouwar an 2025, kan ozordi i pran zis son saler me pa vin fer bann diskisyon kot i ganny envite.

Koman en travayer ki ganny peye ek larzan Leta fer son par pou fer sa pei bouz devan. Ler pei i pran resours e i fer *meeting* piblik, mon demann li pou koz ek son *Caucus* e dir sa zis 6 manm *US* ki elekte, zis 6 Manm *US* ki elekte dan sa 26 distrik dan Sesel pou vin partisipe.

Gid zot pou dir mersi Lotorite ki siport zot avek bann proze ki pli gran. Mon profite pou pas remersiman bann zabitan Mont Plaisir, dan Anse Royale pour lagrandisman zot semen, en promes date depi lepok Erod anba Ladministrasyon *US*.

(APPLAUSE)

HON FLORY LARUE

Ki Prezidan Ramkalawan in apiye e delivre lo la. Mersi Msye Prezidan.

(APPLAUSE)

HON FLORY LARUE

E koman en rezidan sid Mahè, mon ti a kontan dir mersi Lotorite ki'n donn laprouvasyon pour les trafik *divert* lo sa semen a kote *runway*. Apre ki motoris ti pe esper plizyer erdtan bloke dan transpor avek bokou lafatig. Sirtou avek zanfan. In enn ki'n petet menm sov lavi sirtou si lapli ti vin bokou pli for.

Annou pa bliye Moris rezilta linaksyon ti koz lanmor. Bann ki reste dan Nor Mahé i annan lodas vin fer komanter ki sa pa ti devret arive. Mon remersye Lotorite.

Ankor Mr Speaker, olye dir mersi, sa sityasyon i ganny detournen pa *Leader* parti minoriter. Sa ki mwan mon' n konpran, si zot tir li *LDS* pou napa linondasyon ankor Sesel. Nou, nou'n rod en solisyon. Ti napa lot swa. Zabitan pa ti kapab ni naze, ni anvole pou antre se zot. Alor, nou remersye Lotorite.

Mon demann *Leader* parti minoriter pou ankouraz *MNA* Pointe Larue pour angaz avek Lotorite pour vwar egzaktaman ki solisyon. Eski i pe swiv travay bann

kontrakter ki netway rigol dan son distrik? Eski i pe angaze pou ki zabitan Pointe Larue e Sid Mae i trouv en solisyon? Se sa langazman ki en *MNA* Lopozisyon i kapab fer pou bouz son pei devan.

Nou tou nou konnen ki defayans sa semen se an rezilta move planifikasyon lepase ki ozordi nou pe pey lepo kase. Isi dan Lasanble zot vin met zis problem ki serten zabitan i met devan zot. Me eski zot servi Lotorite ki zot annan pou travay ek bann lazans pou rod solisyon pour sa bann dimoun?

Dan sa 20 distrik ki mazorite zabitan in swazir en kandida *LDS*, i osi annan zot bann elektora *US*. Me zot met sa bann dimoun alekar. Sa ki'n ganny elekte avek mwens ki 50poursan vot e ganny par zis 4 vot total. Eski i vin reprezant tou son kominote, ouswa zis en group kominote?

Pep Seselwa i vwar bann lanmertim. I vwar negativite ek mank respe sorti lot kote latab. Sa pep pe rod solisyon, me zot vin zis blanmen. Zot plito les en dimoun soufer, e servi sa pour montre ledwa pour ganny gen politik.

Prezidan in ofer en leskiz koman Sef Leta Sesel pour bann labi ki en lot Ladministrasyon in fer anba non Gouvernman Sesel.

Labi pouvwar in en tre dan bann revelasyon ki'n ganny fer anba *TRNUC*. In kout Leta plis ki R50 milyon pou fer sa legzersis pour ekspoz *SPUP*, *SPPF*, Parti Lepep, ozordi *US*. *Leader* parti minoriter dan Lasanble in vin loue per fondater. Me in ankor mank loportinite ki Prezidan Ramkalawan in donn li pour aksepte fot sa parti, pour montre konpasyon pour bann ki'n eksprim zot soufrans. E tou bann ki'n soufer ler zot in anmenn zot lakwa trankil.

Zot ankor met rouz koman zot liniform e zot in gard tou sa ki zot ti gannyen koman en parti politik. Olye partisip dan rekonsilyasyon atraver kontribisyon, zot pe vann zot bann gran later sirtou La Digue, pou plizyer milyon e zot pe met dan zot pos. Bann ki'n pran pti, pti bout ti mont lo televizyon e ti dir zot pou rann. Ziska ozordi naryen.

Mon konpletman siport propozisyon ki zot kontribye lo pey bann konpansasyon bann victim *TRNUC*. Fodre zot osi rann pep Seselwa sa batiman *Maison Du Peuple*. Si zot pa fer sa volonterman, annou retourn kot pep Seselwa pou demann zot pwennvi.

Mon pou al pli lwen. Eski en *referendum* i kapab ganny mete devan pep Seselwa pou

demande ki pou fer ek *assets US* ki'n ganny vole?

(APPLAUSE)

HON FLORY LARUE

Nou bezwen ferm sa sapit pou trans en semen rekonsilyasyon e linite par donn popilasyon sa pouvwar, pou deside lo ki direksyon nou pou pran.

Dan nou parkour depi 2020, in ganny repete Zedi pase par Prezidan, Seselwa in swazir pou annan demokrasi dan Sesel. E nou met lanfaz lo la demokrasi.

Sa i fer ki tou dimoun i lib pou koze, me sa i vin avek en responsabilite. Nou konstaman ankouraz diskisyon, me siplikasyon ki nou fer se ki pe enport zot pwennvi fer li baze lo fe ek levidans. Pa per pou demann kestyon ek bann ki met plizyer kalonmni deor san okenn baz ki zot pa kapab sibstifye.

La lo medya sosyal, tou sa ki anonim i fer nenport ki *statement*. Ou pa konnen lekel ki ou pe koz avek, ou pa konnen ki son bi. Me ou pran sa mesaz e propaz li. Pa tonm dan sa pyez. Servi statistik, anvoy *email* pou rod plis ledikasyon avek bann *information officers* dan bann Minister.

Gard rikord zot bann tranzaksyon gouvènmantal

pou ler i annan en blokaz, i fasil pou fer referans avek e debloke. Nou ankouraz dimoun pou partisipe dan bann deba, e anvoy zot pwennvi e fer zot propozisyon. Nou moto i kler, "Sesel i pour tou son zanfan" i annan en plas pou tou dimoun.

Nou'n al pli lwen pou rekonnet nou bann frer ek ser ki pe reste aletranze, aköz zot osi zot Seselwa. Travay *LDS* i kontinyen toultan pou ini tou Seselwa, tou dimoun ki en Seselwa, pou zot siport kanmarad parey zot ti fer le 7 Desanm. Atraver respe e lanmour pou nou prosen, gard antet ki ou drwa i fini kot pou ou kanmarad i komanse.

Demann nou lekor kwa ki mon kapab fer pou mon pei. E non pa kwa ki mon pei i kapab fer pou mwan.

Nou dan Linyon Demokratik Sesel, i en group divers ki pou travay dan sa lannen pou anmenn plis pwennvi devan e rezourd bann size ki pa ancor ganny rezourd. Tapaz retourn o pouvwar 2025, pe ganny fer par lot kote latab i reste zis en tapaz e pou zot sirtou en rev.

Nou, nou pe gard nou vizyon lo sa ki meyer pou nou pei, aköz pozitivite i fer ki Sesel i vin premye. *LDS* Sesel Mr Speaker. Mersi.

(APPLAUSE)

MR SPEAKER

Mersi Onorab. Laparol prezan pou Onorab Sylvanne Lemiel.

HON SYLVANNE LEMIEL

Mersi Mr Speaker. Bonn apremidi Mr Speaker, tou Manm Onorab, zabitan Anse Royale, tou lezot dimoun a lekout.

Ser, frer pep Seselwa mon priye ki zot tou zot an bonn sante. Tanka bann ki malad, mon priye ki zot reganny zot lasante vitman. Mr Speaker, apre en analiz profon lo diskour Prezidan lo Leta Lanasyon, mon'n obzerve ki safwasi Prezidan in vin avek en lot lapros dan son tonasyon.

Pou enn fwa, nou dan *US* nou kontan i pe sanz son *tune*, akoz nou'n toultan pe koze e pe dir li akoz son Gouvernman- pe dir li ek son Gouvernman kote ki zot mal.

Mon swete ki lannen prosen, ler i retourn pou son dernyen *SONA* mon ti apresye si son regar anver nou bann *MNA US* lo sa kote latab i osi sanze, si i vremen oule linite.

(APPLAUSE)

HON SYLVANNE LEMIEL

En lot remark, se ki in pran en lapant filozofik angiz pou anmenn pep Seselwa pou sorti

dan sa realite lavi ki zot pe viv ozordi, e fer zot reve.

Prezidan in ankor enn fwa fer Seselwa krwar ki tou keksoz pe al byen. Ki son Gouvernman in fer bokou reisit. E in vin sey fer krwar sa pep ki tou keksoz i parfe.

I pe sey donn sa *feel good factor* parey son labitid. Pep Seselwa, eski vre tou keksoz i *ok?* Taler nou a regard en pti kou.

Prezidan in osi fer bokou pledwari avek pep Seselwa, pou annan en lespri rekonsilyasyon e gard linite. In osi demann lepep pou mars dan menm direksyon e donn lanmen ede pou ki Sesel i vin en model mondyal e osi dan Losean Endyen.

Mr Speaker, tousala i bann zoli parol ki Prezidan in vin prononse isi dan sa Lasanble Zedi le 22 Fevriye, 2024.

An zeneral sa ladres ti pirman propagann pou eleksyon. Avek en ta detay lo diferan proze ki swadizan pe al ganny fer pandan sa lannen 2024. In pirman vin repet tou sa ki Minis Finans ti vin dir dan son *speech* Bidze.

Annou koz en kou lo sa size linite. Mwan, mon enn sa dimoun ki touzour demande, ki nou ini, travay byen ansanm pour ki nou pei i kapab pli byen progresse. San linite nou pou fini koman en

pep. Nou pa pou kapab akonplir sa ki nou anvi akonplir.

Mr Speaker, ler nou regard sityasyon ozordi. Eski nou pe dir ki i annan sa bon linite antre nou? Eski Prezidan i annan linite ek son oponan politik? Eski Prezidan li menm pe vreman anmenn sa pep ansanm e inifye nou?

Letan mon obzerv tou sa ki pe pase, i annan ankor bokou pou Prezidan li menm fer, pou anmenn sa vre linite antre nou.

Ou pa kapab rod linite, kan oule met ou oponan politik dan prizon.

(APPLAUSE)

HON SYLVANNE LEMIEL

Ou pa kapab pres linite. Kan ou menm ou regar anver ou oponan politik pa zanmen bon.

(APPLAUSE)

HON SYLVANNE LEMIEL

Pou napa linite, kan *LDS* pe fer tou, pou ferm parti *US* e detri nou.

(APPLAUSE)

HON SYLVANNE LEMIEL

Ou pa kapab pres linite. Kan bokou manman tousel ki ti pe travay dan Gouvernman, in ganny met deor e zot pa ganny ankor travay dan Gouvernman.

(APPLAUSE)

HON SYLVANNE LEMIEL

Eski. Eski sa bann dimoun ki'n ganny pouse akoz politik ou espekte zot inifye avek ou? Eski nou espekte annan linite. Letan dimoun i ankor pe ganny viktimize dan tou sord fason?

En dimoun pe sey debourye pou fer son biznes e zot pe persekit li, pou sorti dan landrwa kot i pe sey debourye. E menm ganny dir, 'demerd li', si i napa en lot landrwa pou li ale.

Dan en ka parey. Eski nou mazine konbyen dimoun ki pou perdi louvraz? Konbyen zanfan ki pou bezwen al lo *dedicated fund* e lo *breakfast*, kan zot manman e papa ti annan en lanplwa e ti pe debourye?

Ladan menm, ler i al rod lasistans *welfare*, zot a dir li i pa kalifye e donn li mil e mil rezon. Kan la i pe travay e pe trimouse pour met dipen lo son latab san fatig personn.

(APPLAUSE)

HON SYLVANNE LEMIEL

Eski sa bann ka parey pou anmenn linite Mr Speaker? Me non! Mr Speaker, in plis ki ler pou Prezidan fer sa ki i dir. Me non pa demann pep Seselwa pou fer, me li i fer le kontrer.

(APPLAUSE)

HON SYLVANNE LEMIEL

Popilasyon in vin anmer atraver sa bann kalite aksyon. Si i vreman anvi linite, fodre i komans koz laverite avek sa pep. E fodre ki li menm li, fodre i pratik linite.

Met lespri vanzans dekote. Dan sa pti Sesel, napa plas pou revanze. Si nou anvi ki Sesel i ariv kot nou, nou anvi i arive. Parey li menm Prezidan i anvi, ki nou pei i arive. In dir ki i pour vin en model mondyal e dan Losean Endyen.

Dan son diskour, Prezidan in osi koz lo laliberte lekspresyon. I ti dir fodre koz laverite, edik sa pep pou ki pep pa ganny deroute, eksetera.

Ozordi mon oule demann en kestyon. Lekel ki'n koz mansonz avek sa pep? Pou Eleksyon 2016 e an 2020. Sanmenm letan ki mon'n tann gro, gro promes, ti menm pros pour zot dan *LDS* donn lesyel pep Seselwa!

Ki nou vwar ozordi? Sa pep i fristre, sirtou bann ki'n tonm dan zot pyez e vot pou zot. Akoz ti pe tro koz laverite dan zot bann *PPB*. E ler zot ti pe fer kanpanny.

(APPLAUSE)

HON SYLVANNE LEMIEL

Seselwa ti pran zot swadizan laverite dou koman dimyel. E la ozordi mazorite zot pe dir si zot ti konnen. Toudmenm, mwan a dir avek sa bann dimoun ki'n ganny sa dezapwentman. Pou esper ankor en pti pe letan, akoz zot pou ganny sans tir li an 2025.

(APPLAUSE)

HON SYLVANNE LEMIEL

Nou osi antann Prezidan pe kritik medya e zournalis. Sa i pa ni premye fwa, ni dezyenm fwa ki Prezidan i fer sa.

Ler keksoz pa ganny dir dan son faver. Zournalis i ganny dekri koman zot in fer en reportaz ki pa balanse. Ki'n ganny vize zis ver en sel kote.

Me ler *SBC* i pas tou sa ki zot fer e dir, la zournalis i bon, reportaz ti byen zoli. Mwan mon pou dir avek bann zournalis, ki zot ganny peye avek larzan *tax* ki nou tou nou kontribye. Fer zot louvraz san okenn preferans politik. Aret fer plezir Prezidan, oubyen *LDS*.

Prezidan li menm ti dir zot fer bann reportaz lenvestigasyon. Ler zot fer sa kalite reportaz, ou tann Prezidan e son bann Manm dan *LDS* osi. Tann en nespes lasasen leokri. Prezidan i bezwen vin dan *SONA*, pou defann gro Lotel parey *Cheval Blanc*. Be balanse!

Annou arete, oule mel dan tou keksoz. Ou Prezidan en pei, me non pa *project manager* okenn lotel ki pe konstri isi Sesel.

(APPLAUSE)

HON SYLVANNE LEMIEL

Mon ti a kontan ankouraz tou bann zournalis ki fer reportaz lenvestigasyon. Pou kontinyen fer zot travay e donn nou plis bann bon reportaz ankor.

Agrandi nou konesans, e fer nou konnen ki pe pase deryer bann rido. E edik sa pep, kontinyen devwal laverite, parey li menm Prezidan pe demande. Tande Miss Murray?

(APPLAUSE)

HON SYLVANNE LEMIEL

Letan nou lo sa size, lenvestigasyon. Mon ti a rekomannde ki zot retourn ankor lo sa ka bonm kot CCCL. E fer nou konn plis, ki pe pase.

Akoz ziska prezan sa zafer pe al ganny 3 mwan e laverite pa ankor ganny devwale.

Interruption

HON SYLVANNE LEMIEL

Pour annan en fwa. Pour enn fwa.

Laverite wi ou pour konnen Onorab, pa trakase. Ler mwan mon pe koze la, les mwan koze!

MR SPEAKER

Ale. Onorab donn lord silvouple.

HON SYLVANNE LEMIEL

Ou a ganny sans koze apre ou. Ou a reponn mwan.

Pour ankor enn fwa Mr Speaker, nou dan *United Seychelles*, nou demande ki en lanket endepandan i bezwen ganny fer.

(APPLAUSE)

HON SYLVANNE LEMIEL

pou nou vreman konn laverite. Akoz san sa en lenvestigasyon endepandan nou pa pou zanmen konn laverite.

Mr Speaker, Prezidan in koz en pti pe lo pri lavi. Ki mannyer li avek son Gouvernman pou travay avek *STC*. Pou fer desann tou pri komodite ki zot kapab dan sa premye 6 mwan.

Sa ki'n dir. Tou pri komodite ki zot kapab fer desann dan sa premye 6 mwan.

Si sa i arive mwan byen kontan. Akoz se Prezidan li menm ki ti dir, dan enn son kanpanyan an 2015. Ki li i pa o pouwar. Alors i pa ti kapab fer nanryen an sa ki konsern

fer desann pri lavi. I ti dir ki avek 15 lo 10, sa letan dan Lasanble zot ti anmenn Mosyon, demann kestyon. Me se tou i ti dir nou i ti kapab fer.

Annou get en kou la ozordi nou le 27 Fevriye 2024. Ki mannyer sa zafer pri lavi, in arive letan ki *LDS* in o pouvwar pour preski 4an. Eski nou'n vwar pri komodite in desann? Eski nou'n vwar sa Gouvernman lager kont *cartel e middlemen*? Ki li menm li Prezidan, ki sa letan ler i ti *Leader* Lopoziyon i ti koz for lo la?

Tousala i zis bann koze. Ozordi i pe asiz a latet sa pei. I pa ankor kapab rezourd sa problem *middlemen*. Kontrer prezan ki pri konmisyon pe pet plafon.

Konman travayer i ganny en pti ogmantasyon, tou keksoz i monte. Elektrisite, delo, manze. E tou lezot keksoz debaz ki bann dimoun i bezwen servi.

Letan *LDS* ti dan Lopoziyon, zot ti konvenk Seselwa ki i annan fason pou fer desann pri lavi Sesel. Me la vi ki zot o pouvwar mon demann zot pou aplik sa fason e montre Seselwa ki wi, Gouvernman *LDS* in kapab vwar en solisyon pou sa pli gro problem ki pe afekte mazorite Seselwa. Sirtou bann ki pe ganny en saler pli ba.

Dan son diskour, Prezidan i osi koz lo koripsyon. In fer nou konpran ki dan son Gouvernman, napa koripsyon. E i paret mwan ki tou keksoz pe al tre byen.

Me eski i vre? Mr Speaker, koripsyon dan Sesel e dan sa Gouvernman in plis ki zanmen in deza annan.

(APPLAUSE)

HON SYLVANNE LEMIEL

Me sa kalite koripsyon ozordi i ganny pase koman normal.

Dan sa ta Proze Kapital ki zot in sarze, dan zot plan. Depi ler zot in vin o pouvwar e pa'n kapab konplete. Serten ni menm komanse. I annan loder koripsyon laba.

(APPLAUSE)

HON SYLVANNE LEMIEL

Pep Seselwa. Mon krwar i mazin byen sa Lalwa apele "*Amendments to Public Persons Declaration of Assets*". Zot mazinien?

Ki *LDS* ti amande an 2021? Sa Lalwa ki *LDS* ti amande an 2021 e ki mazorite zot laba lo kote latab, zot tou zot ti vot pour sa amannman.

Sa amannman li menm ti fer provizyon pou retir non madanm, zanfan, fanmir pros, Prezidan, Vis-Prezidan, Minis e lezot ki lo apwentman

konstitisyonnèl enkli nou bann *MNA*.

Pou pa deklar zot byen e sa i enkli zot kont labank e lezot propriyete keksoz ki zot annan. Annou mazin byen akòz ki *LDS* ler in vin o pouvwar zot in deside retir zis sa morso Lalwa?

Letan *US* i vin o pouvwar an 2025. Zot laba kontan pa kontan, nou bezwen, nou pour bezwen revwar sa Lalwa.

(APPLAUSE)

HON SYLVANNE LEMIEL

Ankor pou fer ki - pour nou fer tou manm fanmir sa Prezidan, Vis-Prezidan, Minis eksetera i deklar zot byen. Akòz se dan sa fason osi ki larzan atraver koripsyon, i kapab ganny kasyet.

Mr Speaker. Be la ler mon pe koze zot tou zot pour koze? Be les mwan koze.

Interruption

MR SPEAKER

Eskiz mwan Onorab. Koze. Me i annan Manm lo ou kote osi ki pe fer en kantite tapaz. En! *Ok*. Silvouple! Silvouple gard lord. Nou a fini sa sesyon annord. Mersi.

HON SYLVANNE LEMIEL

Mr Speaker, en lot size ki Prezidan in koz lo la. Se problemm drog, e osi problemm

sosyal ki sa fleo i anmennen. Mwan mon'n toultan dakor ki nou bezwen lit kont drog. Nou bezwen lager e rod tou fason pou ki drog i ganny met anba kontrol.

Pli gro pei parey Lanmerik, pa ankor kapab *deal* avek sa zafer drog. E Prezidan li, i ti dir pep Seselwa dan enn son kanpanny an 2020. Ki dan 100 zour li i pou kapab elimin drog. La i fer plis ki 1100 zour, depi ki *LDS* in vin o pouvwar.

E nou'n tann zis serten endividi ki'n ganny kondannen. Laplipar sa bann gro pwason i ankor deor e pe andomaz lavi nou pep. Kan ki Prezidan pou pas lo sa lalis bann trafiker? Eski i pe mazin donn sa bann dimoun ankor en *final warning*? Mon poz sa lanmenm Msye Speaker.

Biro Gouvernman se landrwa kle kot pep Seselwa i vini pou ganny okenn servis e osi konsey ki zot bezwen. I tre enportan, ki travayer dan sa sekter i devret toultan pe delivre.

E asire ki i annan travayer ki serye, travayer ki delivre e donn sa bon servis. Sa i devret konmans avek tou bann Minis, *PS*, *CEO* e lezot travayer dan tou sekter Gouvernman.

Mr Speaker, ozordi i annan serten Minis ler ou *call* zot, zot pa zanmen pran ou

call. Sa problemn in ariv avek mwan a plizyer repriz.

Tou dernyerman le 29 Zanvyè 2024, apre ki ti'n ariv sityasyon kot *Home Anse Royale*. Kot bann vye dimoun dan sa *home*, ti pe bezwen manz kanz. Akoz pour plis ki 2 semenn zot *invoice* pou pey konmisyon pa ti ankor ganny sinyen.

An dizan ki i annan serten keksoz lo sa lalis, pa ti *healthy* pou zot manze. Minis pa ti reponn mon *call*. Ki i ti fer? Apre 8 zour, i ti demann son *personal assistant* pou *recall* e regarde lekel sa nimero ki ti'n *call* li.

Be Mr Speaker, alors koumsa ki zafer i marse. Sa pa ditou akseptab. Mon krwar ki lord dan servis piblik i devret aplik pou tou dimoun. Pe enport si ou Minis, *PS* oubyen *CEO*. Annou pa target zis bann pti travayer. Me get *leadership* dan tou sa Minister, Departman e Lazans. Redres zot en pe. La ki zot in al fer *course Leadership UAE*. Mon espere ki zot vin pli konsyan, lo zot fason fer e ki zot a kapab pli byen kapab diriz zot Minister, Departman e Lazans.

Prezidan dan son diskour in fer serten menas. E menm dekrir serten travayer servis piblik koman move zanfan. E dir zot ki si zot pa

anvi travay pou Sesel, pou rod en lot louvraz.

Sa i en menas tre serye sa. Mon ti a enplor tou travayer servis piblik, pou delivre pour sa pep e donn zot tou dan zot travay.

Mr Speaker, lasante. Lasante en pep i devret primordial pou en Gouvernman. Si nou annan en pep ki an bonn sante. Savedir lavenir nou pei i briyan. Annou zet en koudey ki pe arive ozordi dan nou sistenm lasante. Bokou dimoun i ou koz -bokou dimoun ki koz avek ou ozordi i dir ou sistenm lasante in pli deteryore ki avan. Kot lopital ozordi, sakenn pe fer pou li.

Zot kase, aranze, deranze me zot kontinyen ganny tou mal menm. Annou pran sa zafer randevou pou pasyan. Sa sistenm randevou, in vin en kosmar pou tou dimoun ki vin kot sa Lopital.

Laliny i ariv ziska o bor semen preski toulezour. Akoz zot in deside anmenn tou servis met apwentman kot Twa Zonn.

Servis kot Lopital Sesel in deteryore Mr Speaker. Lopital i sal. Ou fanmir i admit pou en senp maladi dan lopital, ou per pangar i kit ou. Akoz sa ta lenfeksyon ki annan dan sa lopital.

Twatir i koule. Ler lapli i tonbe, ou vwar seo ek rido pe

ganny tale ater pour enbib delo. Sa in ariv devan mwan, mon'n vwar. Dan serten landrwa e serten ward, travayer e pasyan pe plenny lasaler. *Aircon* pa marse, napa delo so pou pasyan bennyen, napa dra, zot vol tou pou met lo lili.

Selman dan serten ward ou vwar dra –

MR SPEAKER

Onorab. Apel ankor en kou pour silans silvouple? Demann ankor en kou silans?

(APPLAUSE)

MR SPEAKER

Mersi. Kontinyen Onorab.

HON SYLVANNE LEMIEL

Mersi Mr Speaker pour ou les mwan kontinyen.

Interruption

HON SYLVANNE LEMIEL

Dan serten landrwa – mon rebran. Dan serten landrwa e serten ward, travayer e pasyan i plenny lasaler. *Aircon* pa marse, napa delo so pou pasyan, napa dra pour met lo lili.

Mon krwar sanmenm sa zot ti ankoler akoz mon'n dir zot vol tou! Selman dan serten ward ou vwar dra i ganny met avek lafnet, koman rido. E rido

pe ganny met ater pour enbib delo.

Mankman latizann, napa spesyalis i osi en gro problem. Lala Leta nou Nasyon Mr Speaker! Prezidan in koz lo gro proze nouvo Lopital. Be ki Gouvernman *LDS* pe fer pou amelyor kondisyon sa enn lopital, ki Lepep pe servi konmela?

Mon dakor sa lopital in vye, Mr Speaker. Me omwen ti devret annan lapropte. Bann *Nurse* ek dokter pe travay anba bokou presyon. Minis i devret rod en fason pou kapab aranz *service delivery*, kot Lopital Sesel e apez sa bann fristrasyon.

Prezidan in vin re koz lo bann benefis sosyal e osi logmantasyon dan *welfare*. Tousala pep Seselwa ti ganny enformen pandan Bidze. I byen! Ki i annan logmantasyon dan tou sa bann benefis. Ti'n ler, ti demande.

Ler ou regard pri lavi ozordi konpare avek detrwa lannen pase. I normal pou donn bann tel ogmantasyon. I enportan, ki i annan en revi dan sa bann lasistans detanzantan, depandan lo sityasyon ekonomik e osi kou lavi.

Mr Speaker, i annan ankor dimoun ki pe kontinyen konplent e dir ki menm si zot fer zot aplikasyon pour

lasistans zot pa kalifye. Rapel, parti rapel e zot *still* pa ganny sa lasistans.

I osi i annan sa problemn esper tro bokou letan avan zot ganny en larepons. Ti a bon ki ASP i revwar sa dele letan, ki zot mete avan donn en dimoun en larepons.

Letan ki nou lo size lasistans, i osi annan nou bann vye dimoun ki pe ganny sekirite sosyal. Ki pe demande ki zot osi zot sekirite i ganny revwar ankore.

Akoz avek sa kou lavi ozordi, i fer li difisil pou zot kapab viv byen e an bonn sante parey zot ti ava anvi.

(APPLAUSE)

HON SYLVANNE LEMIEL

Lanplwa ti osi en lot size ki Prezidan ti koz lo la. I koz lo lokalizasyon dan bann landrwa travay. Kot i annan etranze ki pe okipe bann post e bann pozisyon ki o.

Konbyen Seselwa ki'n kapab okip bann pozisyon o, ki bann etranze ti pe okipe dan bann lotel? Ti a bon nou ganny en statistik pou sa dernyen 3an.

E koumsa nou a kapab fer en analiz. Bokou zenn la ater zot ankore pe rod travay. Menm si nou anvoy *vacancy list* kot zot, zot fer aplikasyon. Me zot pa zanmen kapab ganny en louvraz.

Akoz mazorite sa landrwa pe demann dimoun avek leksperyans. Sa in vin en gro problemn pou nou bann zenn. E fodre ki Minister Lanplwa i rod en fason, oubyen en solisyon pour sa problemn.

Dan son ladres, Prezidan in pran en pe letan pou eksplik pep Seselwa ki savedir Gouvernman. In fer pep konpran ki dimoun i krwar Gouvernman i la pou fer tou pou zot.

I ti annan milyon demann. Li i ti annan milyon demann anver Gouvernman. Eski ozordi, ler la ozordi Mr Prezidan i dan sa soulye. I annan problemn ozordi. Seselwa i demann en konpansasyon. Eski ozordi ler Prezidan i dan sa soulye, son zorey i fermen? Kan sa pep i vir ver Gouvernman pou rod led, pour rod domaz.

In osi fer nou konpran ki letan en dimoun i pourswiv Gouvernman. Larzan i sorti dan Kof Leta, ki nou, nou kontribye atraver *tax*.

Mr Prezidan, Mr Speaker eski Msye Prezidan fek konn definisyon Gouvernman? Likel ki ti sezi tou loportinite ki i ti gannyen e i pourswiv Gouvernman dan lepase?

In ganny en bon pe larzan avek Gouvernman US dan lepase, Gouvernman SPPF. Alors Lepep pe swiv son

legzanp. Me Selman mon konpran par kont. Akoz karma i fermal.

(APPLAUSE)

HON SYLVANNE LEMIEL

Mr Speaker. Sa SONA ki'n ganny delivre par Prezidan Ramkalawan, in enn ki'n kasyet vre Leta nou Nasyon. Mon oule ganny lenpresyon ki Prezidan pa pe viv dan menm pei avek nou.

La soufrans parmi en kous nou popilasyon pe rezonnen. Lensertitid parmi bann biznes in ogmante. Pti biznes pe vreman, *struggle!* La ler ou zet en regar lo bann biznes Providence, ki bokou pa ankor kapab re debout lo zot lipye. Sipor finansyel pa'n arive kot sa bann biznes. E ziska la zot ankor pe eskente pou sey refer zot biznes.

Sa manman, tousel partou dan tou distrik ki pe bezwen rente pou fer 2 bout zwenn. Lasistans *welfare* pa fasil pou li gannyen, menm si i la. Fristrasyon parmi sa pep i bokou menm. Laliberte lekspresyon i ganny menase dan tou sord fason.

Zournalis i ganny *ban* dan bann Konferans Lapres. Endividi ki'n siport *LDS* i ganny *call* par serten Minis. Pour demann li pou retir son post lo *Facebook* akoz i pe eksprim son lopinyon.

Pep Seselwa, lannen 2024 in ganny deklare koman lannen aksyon. Aksyon i devret sorti kot Prezidan ek son *Cabinet*.

(APPLAUSE)

HON SYLVANNE LEMIEL

LDS re donn sa pep sa lazwa de viv ki zot ti annan avan Eleksyon 2020.

Sa pep ti donn zot en manda absolli. Akoz zot ti vin avek en zoli promes. Delivre lo zot promes. Akoz ziska prezan zot pe ganny preski tou mal e zot in *fail* zot legzanmen.

(APPLAUSE)

HON SYLVANNE LEMIEL

Alors, mwan mon annan sa pou dir pep Seselwa. *US* i annan dimoun ki kapab dirize, *US* i annan leksperyans.

Ser, frer, pep Seselwa zot in pas 3an anba direksyon *LDS*. Kwa ki'n vreman amelyore pou zot? Ozordi zot in kapab balanse e zize ki mannyer zot pe viv avan - ki mannyer zot ti pe viv avan e ki mannyer zot pe viv ozordi?

Alors an 2025, fer zot bann bon desizyon. E mwan mon dir avek zot ki *US!*

ALL US MEMBERS

Sel opsyon pour Sesel!

(APPLAUSE)

HON SYLVANNE LEMIEL

Mersi.

(APPLAUSE)

MR SPEAKER

Mersi. Mersi Onorab. Nou'n ariv a lafen sesyon pour ozordi. Lasanble i ava *adjourn* e nou ava rebran demen bomaten 9er.

(ADJOURNMENT)